

San Juan

Cristo, chë Bëngbe Bëtsabe Uámana Oyebuamb-nayana ca Uabainá

¹ Quem luare ndobojátsa ora, Cristo, chë Bëngbe Bëtsabe Uámana Oyebuambnayana ya yojtsemna; chora cha, chë chca uabainá, Bëngbe Bëtsáftaca yojtsanmëna, y cachá Bëngbe Bëtsá inamna. ² Ndegombre cha, chë tempscana Bëngbe Bëtsáftaca yojtsanmëna. ³ Cháftaca, Bëngbe Bëtsá lempe tojanma; cháftaca ndóñesna, lempe ntšamo mora yomncá, Bëngbe Bëtsá tondaye matëñjanma. ⁴ Cachábeñe nyets vida inamna, y quem vídaca tojánabo quem luarentša entšangbe juabnënga jabuábinÿnayama. ⁵ Cha tonjánabo moye, chë entšangbe juabnënga ndoñe binÿniñe yonjamnoye, chiñe jabobínÿnayama. Cha sempre chca yobínÿna, y Satanás chë entšangbe juabnënga ndoñe binÿniñe chaondëtsemnama amá, ndoñe yondobena chë binÿnayabe obenana jtsejuánana.

⁶ Inamna canÿe boyabása, Juan ca uabainá; y Bëngbe Bëtsá tbojanichmó, ⁷ binÿnayabiama chaóyebuambama; entšángbeñe binÿnayabiama cháuyanama, chca, ntšamo Juan chë binÿnayabiama tojayana soyëngaca, nyetscanga Jesúsbeñe chamotsošbuáchema. ⁸ Juan ndoñe yonjamna chë binÿnayá. Cha inamna canÿe ichmoná, chë nda binÿnayá yomnabiama entšángbeñe chauabáyanama. ⁹ Chë ndegombrá

quem luaroye tonjánabo chë entsangbe juabnënga jabuábinÿnayama.

¹⁰ Chë Bëngbe Bëtsabe Uámana Oyebuambnayana quem luariñe yojtsanmëna; masque cháftaca Bëngbe Bëtsá quem luare tojanma, nda cha yojamnama muentša oyenënga ndoñe monjántatsëmbo. ¹¹ Cachabe luare entsángbioye tonjánabo, y entsanga ndoñe tmonjánbošena cha jofjana. ¹² Nÿetscanga, ndëmuanÿenga cha tmojanébuaja y chábeñe tmojtsošbuáchenga, cha derecho tonjanatsatá jtsobenama Bëngbe Bëtsabe básenga ca jtsabáinama. ¹³ Quem ošbuáchiyëngna, chca jtsemnama ndoñe tmonjanobená entsangbe buiñentšana tmojanonÿnáyeca, o ndaye entsabe juabnentšana. Nÿe Bëngbe Bëtsábeyeca chca chabe básenga imojtsabaina.

¹⁴ Cha, chë Bëngbe Bëtsabe Uámana Oye-buambnayana, entsá tojanóbema, y quem luare bëngaftaca yojëftsiyena. Cha yomna chë Bëngbe Bëtsabe nÿe canÿe Uaquiñá; chíyeca bënga tifjáninÿe chabe bëts obenana y chabe tšabe juabna, chë Bëngbe Bëtsábentšana tojanóyëngacñana. Cha corente jtsababuánÿeshanëse šojánanÿena y yojëftsiyena ntšamo ndegombre inamncá. ¹⁵ Juan mëntšá chabiamá yojanáyebuache: “Chabiamá sënjanoyebuambná, chë ndabiamá chora atše sënjánayana, chë átšbentšana jabamana atšbiamá más uamaná endmëna, er atše cabá ndonÿna orna, cha ya yojtsemna ca.”

¹⁶ Cha tša tšabe ainana bómnayeca, bënga nÿetscanga mallajta tšabe bendicionënga tmojóyëngacñe. ¹⁷ Moisesbiajana tifjanóyëngacñe

chë Bëngbe Bëtsá tojanmandá soyënga. Pero Jesucristbeyeca, Bëngbe Bëtsá tšabe bendicionënga bëngbiamá tojama y chë ndegombre soyënga bënga tmojëftsashjache. ¹⁸ Ndocná, ndocna te Bëngbe Bëtsábioye tbonjinÿe. Chë nÿe canÿe Uaquiñá ibobomná, cach Bëngbe Bëtsá yomna; y cha, Bëngbe Bëtsá chë Taitáftaca cánÿiñe mo canÿacá yomna. Mua, chë Uaquiñá, bëngbiamá tojama, Bëngbe Bëtsá juabuátmanama chaotsopodénama.

Juan chë Ubayaná Jesucristbiamá tojanabuayená

(Mt 3.11-12; Mc 1.7-8; Lc 3.15-17)

¹⁹ Canÿe te, Jerusalenoca judiënga tmojanichamó básefta chëngbe bachnanga y levitënga, chë Bëngbe Bëtsabe bëts yebnoca trabájayënga, Juan yojtsemnoye, cha nda bétsemnama chamuatjayama. ²⁰ Chocna, Juan chëngbeñe ndegombre tojanobuambá: —Atše, chë Bëngbe Bëtsabe Uámana Uabuayaná ndoñe quetsátsmëna ca.

²¹ As chora, cachiñe tmojantjá: —As, ¿ndase cojtsemna? ¿Chë Bëngbe Bëtsabe juabna oyebuambanayá Elías ca?

Y Juan tojanëjua: —Atše cha ndoñe quetsátsmëna ca.

Chora chënga tmojantjá: —As, ¿chë Bëngbe Bëtsabe juabna jabóyebuambayama jabamá ca?

Y Juan tojanëjua: —Ndoñe ca.

²² Chora chënga tmojanianya: —Asna, ¿aca ndase cojtsemna? Bënga šontsamna nda aca cojtsemnama jtsetatšëmbuana, as chë

šonjadespachenga jacúntama. ¿Ndayá cojtsobena cach acbiama jayanama ca?

²³ Y Juan mēntšá tojanějua: –Atše sēntsemna chē ndabiama Bēngbe Bētsabe juabna oyebuamb-nayá Isaías mēntšá tojanábema: “Entšanga ndoyenoca canye abuyaiynayá echántsemna, y entšanga mēntšá echántsabuyaiynaye: Bēngbe Utabná echanjabo ca. Mo nda canye benache tojtseprontacá, tšēngaftágnaca cachcá, cha jabama tšabe juabnēngaca šmochtseprontana ca.”

²⁴ Chorna, báseftanga chē fariseungbe ichmónēnguentšana, ²⁵ Juan tmojantjá: –Chē Bēngbe Bētsabe Uámana Uabuayaná, Cristo ca uabainá, ndoñe tcontsemnēsna, ni Elías, ni chē Bēngbe Bētsabe juabna jabóyebuambayama jabamá ndóñesna, ¿ndáyeca entšanga cojtsēbayana ca?

²⁶ Chora Juan tojanějua: –Atšna, bėjayeca entšanga sēndēubáyana. Pero tšēngaftangbeñe canya entsemna; cha ndoñe quešmatábuatma; ²⁷ y cha atšbe ústonoye echanjáshjango. Atše mercedo taitatobuajoñe, ni mo jotsejbiyama, chabe shecochētjonēshentša corriēja jajafjonama ca.

²⁸ Chca tojanopasá, canye pueblo Betania ca uabáinentše, Jordán bėjaye chenguana. Cach bėjayiñe, Juan entšanga yojanēbáyana.

Jesús chē Bēngbe Bētsabe Oveshatema ca uabainá

²⁹ Yěfsana, Juan yojtsemnoye Jesús yojtsebéconaye, y chē cháftaca imojtsemna entšanga tojanéyana: “Smochjinye. Chē nda Bēngbe Bētsá tbojichmó y iytanana Oveshatemcá entsobiamná cha, entsashjajuana ca. Cha

jóbanëse, quem luarentša entsanga bacna soyëngama perdonánënga mochántsemna. ³⁰ Atše chabiamá cbonjutsëtsná, mëntsá sënjánayana ora: ‘Atšbe ústonoye canýa echanjáshjango. Cha atšbiamá más uamaná endmëna, er atše cabá ndonýna ora, cha ya yojtsemna ca.’ ³¹ Tempna, cach atše ndoñe quetsjátantatšëmbo nda cha bëtsemnana. Pero atšna ínýenga béjayeca ubáyana sëndabó, Israeloca entsanga quem boyabása chamuábuatmanama ca” –Juan tojanëyana.

³² Chentsana Juan mëntsánaca tojanobuambá: “Chabiamá mëntsá bominjë sënjanjajó: chë Uámana Espíritu, mo canýe palomatemcá, celocana tonjánastjango y quem boyabásabe juatsbuañe tonjanototoná. ³³ Atše cabá ndoñe quetsjátantatšëmbo nda cha bëtsemnana, pero chë béjayeca jubáyama šonjanichmó cha, mëntsá šonjaniyana: ‘Nda chacojinýe, chë Uámana Espíritu jastjanguana y chabe juatsbuañe jototonana, chábeyeca atše chanjíchmuá chë Uámana Espíritu entsangbe ainaniñe cháuamashënguama ca.’ ³⁴ Y morna, atše aíñe chca tijinjë, y ndegombre tšëngaftanga cbëyana, cha chë Bëngbe Bëtsabe Uaquiñá entsemna ca” –cha tojanëyana.

Chë Jesusbe natsana ústonënga

³⁵ Yëfsana, Juan chabe uatsjëndayënguentsana útataftaca cachoca yojtésemna. ³⁶ Jesús yojtsachnëjuanama, Juan tbojáninjë ora, tojanëyana: “Sochjinýe. Mua entsemna nda Bëngbe Bëtsá tbojichmó y iytanana Oveshatemcá entsobiamná cha ca.”

³⁷ Chora chë Juanbe uta uatsjéndayata, chca tbojanuena ora, Jesús tmojanasto. ³⁸ Jesús tojesanon-tješé y tojánanÿe chata imojétsëstonama. As, tojanatjá: —¿Ndayá šojtsenguá ca?

Y chata tbojaniyana: —¿Rabí, ndayentše icoyena ca? (Rabí endayana “Buatëmbayá ca”).

³⁹ Chora Jesús tojanëjua: —Mabo y šochjinÿe ca.

As chata tbojána y tbojáninÿe ndayentše chayojaniyenana. Y chentše cháftaca tojëftsanajëtana, ya jetiñe mo las cuatro ora yojtsemna causa.

⁴⁰ Chë Jesusbiana oyebuambnayana Juánbioye tbojanóyeunata y Jesús tbojanasto útatëntšana cánÿana Andrés ca yojanabaina; cha yojamna Simón Pédrëbe catšata. ⁴¹ Andrés, cabá ndocna inÿe soye ndëma ora, tojána chabe catšata Simón janguanguama. Y tbojáninÿena ora, Simónbioye tbojaniyana: “Chë Bëngbe Bëtsabe Uámana Uabuayaná, Cristo, fsënjínÿena ca.”

⁴² Chentšana Andrés, Simónbioye tbojanánatse Jesús yojtsemnoye. Jesús, Simónbioye tbojáninÿe ora, tbojaniyana: “Aca condmëna Simón, Jonasbe uaquiñá, pero Cefas ca cochantsabaina ca.” (Chcana endayana “Pedro o ndëtsbé ca”).

Jesús, Felipe y Natanael tojánachembo chamuastama

⁴³ Yëfsana, Jesús tojanjuabó Galilea luaroye jama. Benachiñe Felípbioye tbojáninÿena y tbojaniyana: “Smasto ca.”

⁴⁴ Chë boyabása Felipe, Betsaida pueblócá inamna. Andrés y Pédrëna cach pueblócata ibnamna. ⁴⁵ Chentšana Felipe tojána Natanael janguanguama; y tbojaniyana: —Chë ndabiamana

leyënga librëšangañe Moisés tojanábema cha fsënjínÿena ca. Cachabiamá, Bëngbe Bëtsabe juabna oyebuambnayëgnaca tmojanábema. Cha Jesús entsemna, Josebe uaquiñá, chë Nazaretocá ca.

⁴⁶ Chora Natanael tbojanियana: —¿Ndaye tšabe soye Nazaretocana nanjopódia jóbocnama ca?

Y Felipe tbojanjuá: —Mabo y cochjinÿe ca.

⁴⁷ Natanael yojtsebéconama, Jesús tbojáninÿe ora tojánayana: —Moye canÿe entšá entsabó; cha ndegombre endomerecena Israelbentšana entšá jtsemnama. Cha tšabe entšá endmëna; ndocnábioye quebnatsingña ca.

⁴⁸ Chora Natanael Jesúsbioye tbojantjá: —¿Ntšamo atše šcuabuatma ca?

Y Jesús tbojanjuá: —Felipe cabá aca ndëchembo ora, atše tcbonjinÿe, chë higo betiye tēchetsoye condëtsomñe ora ca.

⁴⁹ As, Natanael tbojanियana: —Buatëmbayá, ¡aca chë Bëngbe Bëtsabe Uaquiñá comna! ¡Aca, chë Israeloca entšangbe Rey ca!

⁵⁰ Chora Jesús tbojanjuá: —¿Aca átšbeñe cojtsošbuaché, nÿe chë higo betiye tēchetsoye tcbonjinÿe ca tcbouyanama? Ndegombre, chë soyama más bëts soyënga cochanjinÿe ca.

⁵¹ Chentšana Jesús tojanëyana: —Ndegombre šcuayana: Tšëngaftanga šmochanjinÿe celoca atëfjniñe, y Bëngbe Bëtsabe angelotëmënga jtsetsjuajnana y jtsastjajuanana Bëngbe Bëtsá Entšá tbojanbemabe tatsëtsoca.

2

Canÿe casamento Galilea luaroca, Caná pueblentše

¹ Chentšana unga tianoye, canÿe casamento inamna, canÿe pueblentše Caná ca uabáinentše, Galileoca. Chë oboyejuayoca Jesusbe mamá yojtsemna. ² Jesús y chabe uatsjéndayëngnaca chë casamentoca ófjanënga imojtsemna. ³ Chë oboyejuayentše, vínoye yojtsopochóca y Jesusbe mamá tbojaniana: —Ya tondaye vínoye quemátsbomna ca.

⁴ As, Jesús tbojanjuá: —Mama, ¿ndáyeca chca atše scojtsatsá? Atšbe ora cabá ndoñe ntjoshjanguana ca.

⁵ Chentšana, chabe mamá, chentša oservénënga tojanëyana: —Lempe šmochjama, ntšamo cha chacmojuayancá ca.

⁶ Chocna, chnënguana ndëtsbé matbaja inamna. Chca matbajënguentsä béjayeca, judiënga imojanamana jtsacuéntšabiana cabá ndëse ora, ntšamo tempo entšanga imojanamancá, Bëngbe Bëtsabe delante tšábenga jtsatsmënana. Cada matbajiñe, mo shachna o canÿsëfta bnëtsanájua béjaye yojanába.

⁷ Chora Jesús chë oservénënga tojanamëndá: “Quem matbajënga béjayeca mobuajutetjé ca.” Y chënga, chora lempe tmojanbuajutetjé.

⁸ Y Jesús tojanëyana: “Morna, báseye mobuat-sjo y chë fiesta otocanábioye mabuyamba ca.” Y chënga chca tmojanma.

⁹ Chora, chë fiesta otocaná, chë béjaye Jesús vínoye tojanbemiye tojanftantiá, ndëmocana yojóbocnama ntsetatsëmbcá. Pero chë

oservénēngna aíñe imojtsetátšēmbō ndēmocana, er cachēnga chē bėjaye tmojanbuatsjo. As, chē fiesta otocanana, chē bobontse bouamnábioye tbojanchembo, ¹⁰ y tbojaniyana: “Njētscanga monduamana natsana chē más uámana vínōye jushebēcana, y chē ófjanēnga becá tmojatēmo ora, chē más batsá uámaniye. Pero acna, chē más uámana vínōye morscama tcojtsabofjajó ca.”

¹¹ Ntšamo Jesús tojanmcá Caná pueblentše, Galileoca, yojamna chabe natsana bēts soye Bēngbe Bētsabe obenánaca. Y chca, chabe bēts obenana y uámanana cha tojaninñanyé; y as, chabe uatsjēndayēnga chábeñe imojtsošbuaché.

¹² Chca tojanopasá chentšana, Jesús canye pueblo, Capernaum ca uabáinoye tojtsanoñe. Chorna, chabe mamá, chabe catšátanga y chabe uatsjēndayēnga cha tmojantjēmbambá, y choca baseftatescama tmojanoquedá.

Jesús Bēngbe Bētsabe bēts yebnentšana bacna entšanga tojtanēbuacna

(Mt 21.12-13; Mc 11.15-18; Lc 19.45-46)

¹³ Ya canye judiēngbe bēts fiesta, chē Bashco fiesta yojétsobeco, chē ntšamo Bēngbe Bētsá chēngbe bēts taitanga Egiptocana tojánatsebacama jtenójuaboyama. Chē fiestama Jesús Jerusalenoye tojána. ¹⁴ Jerusalenoca, Bēngbe Bētsabe bēts yebnentše, Jesús tojánanyēna uacnēnga, oveshēnga y paloma enēnga, y entšángbioye crocénana atrócayēnga, chēngbe luarēnguenache imojtsetbiámana. ¹⁵ Jesús chca tojánanyē ora,

biajēnga tojanaca, tjanjanēja tojanobopormá, y Bēngbe Bētsabe bēts yebnentšana njētscanga

tojtanëbuacna, chëngbe oveshënga y uacnëngaca. Chentsana Jesús, Bëngbe Bëtsabe bëts yebnentsama yojanoservena crocénana atrocayëngbe crocénana tojtsanëjquësheshe, y chë mesëshangá tojtsanenásatajchquëca. ¹⁶ Chë paloma enëngna Jesús tojanëyana: —¡Quem soyënga lempe muentšana matábocana! ¡Ndoñe matsbuamnana ni mátenana atšbe Bëtsabe yebnentše, mo cánÿentše jiyama luarentše cuaftsemncá ca!

¹⁷ Y as, chabe uatsjëndayënga tmojanenojuabó ntšamo Bëngbe Bëtsabe uabemana palabrenguiñe iuayanama: “Bëngbe Bëtsabe yebna jtseboguanama juabna, nÿets átšbeñe entsemna ca.”

¹⁸ Chora, judiënga Jesús tmojantjá: —¿Ndaye bëts soye cochjama bënga chašcuinÿanÿema, aca ndaye deréchoca bëngaftaca chca cojtsobenama ca?

¹⁹ As Jesús tojanëjua: —Quem Bëngbe Bëtsabe yebna menásatajchca, y atše unga tese chtëtsbaná ca.

²⁰ Chora chë judiënga tmojaniyana: —Canta bnëtsana chnënguana uatiñe, quem Bëngbe Bëtsabe yebna tmojanjebo. ¿Y aca, nÿe unga tese lempe cochtëtsjebo ca?

²¹ Pero Bëngbe Bëtsabe yebna, ndayama chora cha chca tojánayana, cachabe cuerpo yojtsemna, ndoñe chë jebna soye. ²² Chama, Jesús obanënguentšana tojtanayena ora, chabe uatsjëndayënga tmojanenojuabó ntšamo muentše cha tojanëyanama. Chca ora, Bëngbe Bëtsabe uabemana palabrenguiñe y Jesús chora tojánayana palabrenguiñe más chënga imojtsošbuaché.

Jesús nÿetsca entšangbe juabna iuábuatma

²³ Jesús Jerusalenoca chë Bashco fiestama yojtsemnëntscuana, entšanga tmojáninýe Jesús jamana bëts soyënga Bëngbe Bëtsabe obenánaca. Chiyeca, ba entšanga chábeñe imojtsošbuaché. ²⁴ Pero Jesús chëngbeñe ndoñe yontsošbuaché, cha nýetscanga yojanëbuatma causa. ²⁵ Y Jesús ndoñe bonjanájaboto chë entšangbe soyëngama chabotsebuayiynama, er cachá entšangbe ainaniñe nýetsca juabnënga yojanábuatma.

3

Jesús y Nicodemo

¹ Inamna canýe boyabása Nicodemo ca uabainá. Cha yojamna fariseunguentšá y judiëngbe canýe amëndayá. ² Chana ibeta Jesúsbioye tojána y tbojaniyana: —Buatëmbayá, bënga fsëntsetatsšëmbo aca canýe buatëmbayá comnama, Bëngbe Bëtsabe ichmoná. Ndocná quenátobena jamana quem bëts soyënga, aca contsama soyënga, Bëngbe Bëtsá cháftaca ndoñe tontsemnëse. Chiyeca bënga chca fsëntsetatsšëmbo ca —cha tbojaniyana.

³ Chora Jesús tbojanjuá: —Ndegombre cbëyana, nda ndoñe cachiñe tontonýná, cha ndoñe quenátobena Bëngbe Bëtsabe amëndayana jinýama ca.

⁴ Y Nicodemo tbojantjá: —¿Ntsámo, canýe entšá ya bëtsá tojtsemna ora, nantsobena cachiñe jtónýnama ca? Ndegombre, cha ndoñe ntsoybenana cachabe mamabe cuerpiñe jtamashënguana cachiñe jtónýnama ca.

⁵ Chora Jesús tbojanjuá: —Ndegombre cbëyana, béjayeca y chë Uámana Espíritbeyeca ntjonýnacá, ndocná quenátobena Bëngbe Bëtsabe amëndayoye

jamashënguama. ⁶ Nda bëtsëtsabentsana tojonÿná cha, quem luarentša entsàngcá jtsemnana; pero chë Uámana Espíritbeyeca tojonÿná chana, jtsemnana canÿa chë Uámana Espíritu ainaniñe bomná. ⁷ Ndoñe matenjnanana ntšamo tcbonjauyanama: “Nÿetscanga entsamna cachiñe jtónÿnama”. ⁸ Chë binÿia ndëmuajana tojtseboše jtsemnama, chëjana jtsanana. Masque entsanga, chë binÿiayama jtsuenanana, ndoñe ntsetatšëmbuana ndëmocana yobama y ndëmoye yojtsoma. Cachcá, tšëngaftanga ndoñe quešmátstatšëmbo ntšamo entsanga chë Uámana Espíritbeyeca tmojtsónÿnama; pero tšëngaftanga šmontsetátšëmbo aiñe chca yomnama ca —Jesús tbojaniana.

⁹ Chora Nicodemo tbojantjá: —¿Ntšamo chca nántsemna ca?

¹⁰ Y Jesús tbojanjuá: —Aca, canÿe Israeloca abuatambayá, ¿chë soyëngama ndoñe condétatšëmbo ca? ¹¹ Ndegombre cbëyana, bëngna chë fststátšëmbo soyëngama fsëntsoyebuambná, y chë tifjinÿe soyëngama ndegombre bëtsemnama fsëntsichamo. Pero tšëngaftangna, chë cbontsëtsëtsná soyënguiñe ndoñe quešmatošbuaché. ¹² Atše, quem luarentša soyëngama sënjoyebuambá y tšëngaftanga átšbeñe ndoñe chešmatošbuaché. Y as, ¿ntšamo átšbeñe šmochtsošbuáchiye, celoca soyëngama cbojtsëtsëtsnase?

¹³ “Ndocná, nÿe cachábeyeca Bëngbe Bëtsábioye tonjátsjua. Nÿe chë celocana tojabá aiñe, chë Bëngbe Bëtsá Entšá tbojanbemá. ¹⁴ Y chcase, ntšamo Moisés entsanga ndoyenoca bronze

mētšcuaye tsbanánoca tbojananguësëtjca, šoquënga tšabá chamotsatsmënama; cachcá entsemna, Bëngbe Bëtsá Entšá tbojanbemá entsanga chamuatsbanama; ¹⁵ chca, nÿetscanga chábeñe tmojtsošbuáchenga, chë nÿetsca tescama yomna tšabe vida chamotsebomnama ca” —Jesús Nicodémbioye tbojaniyana.

*Ntsachetšá Bëngbe Bëtsá entsanga
iuababuánÿeshana*

¹⁶ Mëntšánaca Jesús tojánayana: — Bëngbe Bëtsá quem luare entsángbioye tša yojánababuanÿeshanayeca, chë nÿe canÿe Uaquiñá ibobomná, bëngbioye tbojichmó, nÿetsca chábeñe ošbuáchiyënga ndoñe chamondóbanama, y aíñe chë nÿetsca tescama yomna tšabe vida chamotsebomnama. ¹⁷ Er Bëngbe Bëtsá chabe Uaquiñá quem luaroye ndoñe tbonjichmó quem luare entsángbiamama jabáyanama ntšamo tmojamama castigánënga chaotsamnama ca, sinó, entsanga chábeyeca atsebácanënga chamotsemnama.

¹⁸ “Nda Bëngbe Bëtsabe Uaquiñábeñe tojtsošbuáchebiamama, Bëngbe Bëtsá ndoñe queochátayana ntšamo cha tojamama, castiganá chaotsemna ca. Pero chë Uaquiñábeñe ndoñe tontsošbuáchebiamama, mora Bëngbe Bëtsá ya tojayana, ntšamo tojamama cha castiganá chaotsemna ca, chë Bëngbe Bëtsá nÿe canÿe Uaquiñá ibobomnábeñe ndoñe yontsošbuaché causa. ¹⁹ Chca, chë ndoñe tmontsošbuáchengbiamna cha ya tojayana, ntšamo tmojamama castigánënga chamotsemna ca;

er chë entsangbe juabnënga binÿnayá quem luaroye tojabo, pero ba entsanga tmojábošena jtsomñana, chë entsangbiana bacna juabnëngaca chamotsebomnama amáftaca. Chënga sempre bacna soyënga jtsamana; chíyeca chënga jtsebošana cháftaca jtsomñama. ²⁰ Chë bacna soyënga tojtsamá ndoñe ntsebošana, chë binÿnayá chabe bacna soyënga chabuinÿinÿema, ni chabe bacna soyëngama chabuácacana. Chíyeca, chë bacna soyënga jtsamëse oyená, chë binÿnayábioye jtsáboyënjana, y chë binÿnayábioye ndoñe ntjabana. ²¹ Pero nda sempre tojtsiyena ntšamo ndegombre yomncá jtsamëse, chana aíñe chë binÿnayábioye jabana, chë binÿnayá chabiana chabuinÿinÿema, chë tojama soyëngna, ntšamo Bëngbe Bëtsá tojtsebošcá tojamama ca” —Jesús tojánayana.

Juan chë Ubayaná cachiñe Jesucristbiana tojanabuayená

²² Chca tojanopasá chentsana, Jesús chabe uatsjëndayëngaftaca básefta Judeoca pueblëngoye tojtsanoñe. Chiñe, baseftatescama chë uatsjëndayëngaftaca tojanoquedá, entsanga ubáyana. ²³ Cach tempo, Juanënaca entsanga yojanëbáyana Enonoca, Salim béconana, er choca bëtscá béjaye inabinÿna. Ba entsanga choye imojtsaye, y Juan chënga yojanëbáyana. ²⁴ Chca tojanopasá, chë Heródesbe soldadënga Juan cabá ndutame ora.

²⁵ Chë tempo, básefta Juanbe ústonënga tmojanontsé inÿe judíoftaca enatsëtsnayana ntšamo tempo judiënga chë jtsacuëntsabiama imojanámanama. ²⁶ Chora, chënga Juánbioye

tmojánabo y tmojanियana: –Buatëmbayá, chë Jordán chenguánoica ácaftaca enjamná, ndabiamá tša tšabá conjanoyebuambná, mora entsanga entsëbayana y nyëtscanga cha montsëstona ca.

²⁷ As Juan tojanëyana: –Ndocná quenátobena tondaye ntsebomnana, Bëngbe Bëtsá ndoñe tbonjatsetase. ²⁸ Cach tšëngaftanga tšabá šmonjanuena y šmontsobena ndegombre yomnama jayanana, atše ndoñe chë Bëngbe Bëtsabe Uámana Uabuayaná tsjanmëna ca sënjánayanama; sinó, Bëngbe Bëtsá atše šojanichmó chë Uabuayanabe natsana, chabiamá entsanga jabábuayenama. ²⁹ Chë tobiáše tojtsobouamá ora, chë bobontse chábioye jtsebomnana; y chabe amigna, chabiamá jtsobátmanana y chë bobontse bouamnabe oyebuambnayana jtsuenanana; y chca tojtsuenana ora, tša oyejuayá cha jtsemnana. Cachá, ntšamo chë Uabuayaná yojtsamama y yojtsóyebuambnama sëntsuenana ora, átšnaca corente oyejuayá sëntsemna. ³⁰ Cha bontsemna más uamaná jtsemnana, pero atše šontsemna más nduamaná jtsemnana ca –Juan tojanëyana.

Ntšamo yomna chë celocana tojabá

³¹ Mëntšánaca Juan tojánayana: “Chë tsbanánocana tojabá, nyëtsca entsangbiamá más uamaná endmëna. Chë quem luare oyená quem luare entsangcá jtsemnana y quem luarentša soyëngama jtsóyebuambnayana, pero chë celocana tojabana, nyëtsca entsangbiamá más uamaná endmëna. ³² Cachá ntšamo tojinÿe y tojouencá entsoyebuambná, pero chë entsichamo soyënguiñe ndocná quenatošbuaché. ³³ Nda

ntšamo cha tojtsóyebuambnañe tojtsošbuaché y chca tojtsama, jtsinÿanÿnayana Bëngbe Bëtsá ndegombre soyënga inetsichámuama. ³⁴ Chcasna, Bëngbe Bëtsabe ichmonana, jtsóyebuambnayana ntšamo Bëngbe Bëtsá tojtsichamcá. Bëngbe Bëtsana chë ichmonábioye tbojichmó chë Uámana Espíritu, nÿets tempo corente chabotsájabuachanama, ntšamo cach Bëngbe Bëtsá tojtsichamo y cachcá chaotsichámuama. ³⁵ Chë Taitá Uaquiñábioye bondbobonshana, y chë Uaquiñábioye obenana tbojatsetá nÿetsca soyënguiñe jtsemándayama. ³⁶ Nda chë Uaquiñábeñe tojtsošbuaché, chë nÿetsca tescama yomna tšabe vida echántsebomna; y nda chë Uaquiñábioye ndoñe tbontsašbuaché, chana chë vida ndoñe queochátsbomna, y chë Bëngbe Bëtsabe uabouana castigo nÿetsca tescama chábeñe echántsemna ca” –cha tojánayana.

4

Jesús y chë Samaria luaroca shembása

¹ Chë fariseunga tmojanuena Jesús, Juanbiana más ústonënga yojtsabamnana, y más entšanga yojtsëbáyanama. ² Pero ndegombre, cach Jesús ndocnábioye bonÿanábayana, sinó chabe uatsjëndayënga. ³ Bëngbe Utabná Jesús, ntšamo chë fariseunga tmojanuena tojántatšëmbona ora, Judea luarocana tojëftsanbocna y Galileoye tojtaná.

⁴ Choye jtamna ibojamna Samaria luarëjana jachnënguana. ⁵ Samariocna, canÿe pueblo Sicar ca uabáinoye Jesús tojánashjango. Chë pueblo yojamna, chë Jacob chabe uaquiñá Josébioye

tbojëftsanlargá fshantse béconana. ⁶ Choca yojamna cánÿentše atëfjóniñe, búyeshe jobuatsjuama, Jacobëbe atëfjóniñe ca uabáiniñe. Mo nÿetsto ora, chentše Jesús yojtsemna, aniñe uamëntšnaya, chë atëfjóniñe batsjaca yojótbema. ⁷⁻⁸ Chabe uatsjëndayëngna chë puebloye tmojána saná jobuámiñama. Chora, canÿe shembása Samariocá, chë atëfjónoye tojánashjango, búyeshe jauafcama; as Jesús tbojaniana: —Búyeshtema šmabuatsšetá ca.

⁹ Y chë shembása tbojanjuá: —Aca canÿe judío condmëna y atšna canÿe samaritaná. ¿Ntšamo cojtsobena atše búyeshe juabuátjañama ca? (Cha chca tojánayana, er canjanopasana, judiëngna samaritanëngaftaca ndoñe monjanenatsëtsná.)

¹⁰ Chora Jesús tbojanjuá: —Aca mo cojtsetátšëmbo nÿe ntšamo Bëngbe Bëtsá aca jatšetayama yojtsebošcá, y nda chë búyeshe cmojtsábuatjanañama, acna más cha catjuábuatjañe, y chana bėjaye vida bomniye cmatjuabuátšetaye ca.

¹¹ Y chë shembása tbojaniana: —Señor, tondaye quecátsbomna nÿe mo ndayecnaca búyeshe jabuat-sjuama, y chë atëfjóniñe corente tboca endmëna; y as, ¿ndayentsana cochjobenaye bėjaye vida bomniye atše juabuatsšetayama? ¹² Bëngbe temp-sca bëts taitá Jacob, quem atëfjóniñe bëngbiana tojëftsanboshjona. Cachá, chabe básenga y chabe bayënga muentšana búyeshe tmojëftsanofšé; y ¿aca chabiana más bëtsá comna ca? —chë shembása yojtsichamo.

¹³ As Jesús tbojanjuá: —Nÿetscanga chë quem búyeshentsana tmojofšenga, chënga cachiñe

echantëtëjuendaye. ¹⁴ Pero chë chanjuabuátsetaye búyeshentšana tojofsé chana ndocna te cachiñe quebochëtajuendaye. Cha chanjuabuátsetaye búyeshna, chábeñe echántsemna mo cánýentše bėjaytema obocaniñcá, chë nyetsca tescama yomna tšabe vida jtsebomnama ca –cha tbojanijana.

¹⁵ Chora chë shembása tbojanijana: –Señor, chca búyeshe šmabuatšetá, as atše ndoñe cachiñe chašondetsajuendama, ni búyeshe juafcama moye jtsaboyama ndoñe chašondětsemnama ca.

¹⁶ As Jesús tbojanijana: –Motsa acbe boyá jachembuama y cochjésabo ca.

¹⁷ Chora chë shembása tbojanjuá: –Boyá ndoñe quetsátsbomna ca.

As Jesús tbojanijana: –Tšabá tcjayana boyá ndoñe condbomna ca. ¹⁸ Er, aca shachna boyanga conjánabamna, y chë mora contsebomnana, acbe boyá ndoñe quenátsmëna. Ntšamo tconjayancá ndegombre entsemna ca.

¹⁹ Chë shembása chca tojanuena ora, Jesúsbioye tbojanijana: –Señor, mora atše sëntsetatšëmbo, aca canya Bëngbe Bëtsabe juabna oyebuambnayá comnama. ²⁰ Bëngbe tempsca bëts taitanga quem tjoca Bëngbe Bëtsá monjánadorana; pero tšëngaftanga, judiënga šmondbétsichamo, bënga Bëngbe Bëtsá jadóramna, Jerusalenoca chë luare canmëna ca.

²¹ Chora Jesús tbojanjuá: –Shembása, šmoyeuná; canye tempo echanjóshjango y chora tšëngaftanga ndoñe quecmochátamna Bëngbe Bëtsá jadóramna, ni quem tjoye jabana, ni Jerusalenoye jana. ²² Tšëngaftanga samaritanënga ndoñe quešmatábuatma nda

šmetsadoránama; pero bēnga aīñe fsēnduábuatma, er chē atsebacayá judiēnguentsana endabó. ²³ Pero ora entsoshjajuana, ya chē tempo tocjobuache, ndaye ora chē Bēngbe Bētsá chē Taitá ndegombre atschuanayēnga, chē Espíritbeyeca y ndegombre juabnēngaca chábioye mochántadorana. Er chē Taitá entseboše chē chábioye adórayēnga chca chamotsamama. ²⁴ Bēngbe Bētsá, Espiritu endmēna; y chē chábioye adórayēnga entsamna, chē Uámana Espíritbeyeca y ndegombre juabnēngaca cha jtsadoránana ca —Jesús tbojanियana.

²⁵ Chora chē shembása tbojanियana: —Atše sēndētatsēmo, canmēna chē Bēngbe Bētsabe Uámana Uabuayaná, chē Cristo jabana ca; y cha chaojáshjango orna, cha nýetsca soyēngama cašochjabuayená ca.

²⁶ As Jesús tbojanियana: —Atše, chē ácaftaca entsoyebuambná cha, cha entsemna ca.

²⁷ Chēntscuana, Jesusbe uatsjēndayēnga tmojtashjajna, y tmojtsanēuatjaná, Jesús canýe shembásaftaca yojtsoyebuambná causa. Pero ndocná Jesús tbonjantjá: ¿Ndayá cháftaca cojtseboše? o ¿Ndáyeca cháftaca cojtsoyebuambná ca?

²⁸ Chorna, chē shembása chabe uafcanēja tojésanboshjona, y chē puebløye betsko tojtaná. Chocna, entšanga tojanéyana: ²⁹ “Mabēnga canýe boyabása jinýama ca. Cha atše šonjauyana lempe ntšamo tijamcá. ¿Chē boyabása, chē Cristo tanántsemna ca?” —cha yojtsichamo.

³⁰ As chē entšanga chē puebløcana tmojánbocana y Jesús yojtsemnoye tmojánashjajna. ³¹ Chca yo-

jtsopasánentscuana, chë uatsjéndayënga Jesúsbioye imojtseimpadana: –Buatëmbayá, batsatema mose ca.

³² Pero cha tojanéyana: –Atše canye soye jasama sëntsebomna. Tšëngaftanga chë soyama ndoñe quešmátstatšëmbo ca.

³³ Chora chë uatsjéndayënga tmojanontsé entjanayana: –¿Nderado nda jasama chabiana tojiyëbo ca?

³⁴ Y Jesús tojanéyana: –Chë šonjichmó cha ntšamo yojtsebošcá jamana, y chabe trabajo japochócana, chë soyënga mo sanacá atšbiana entsemna. ³⁵ Tšëngaftanga šmondbétsichamo: “Cabá canta ishinye entsashbena jaja saná chaotsebínýnama ca”; pero atše cbéyana: Minýënga tša entšanga moye montsabëbana; chënga montsemna mo jajañe saná játbanama tojtseprontancá. ³⁶ Tšëngaftanga šmontsemna mo chë saná atbanayëngcá. Chëngna jajañe jtsetrabájayana, y chëngbe uacanánana jtsësháchiñana. Cachcá, tšëngaftanga cmontsamna atšbiana entšanga júbuajana, chë nýetsca tescama yomna tšabe vida chamotsebomnama. Chë jaja saná átbanaye ora, jenënga y chë atbanayënga cánýiñe oyejuayënga jtsemnana. Cachcá, chë entšanga átšbeñe chamojtsošbuaché ora, nýetscanga, chë atšbiana obuájajanënga y chë atšbiana trabájayëngnaca cánýiñe oyejuayënga mochántsemna. ³⁷ Quem entšangbe ichámuana, canye ndegombre soye endmëna: “Chë jená canya jtsemnana, y atbanayana inya ca.” ³⁸ Atše tšëngaftanga cbonjichamó canye soye játbanama, y tšëngaftanga tondaye chešmatsma

chca chaotsebínŷnama. Inŷenga chiñe bĕtsá tmonjĕftsetrabája, y tšĕngaftangna, chĕngbe trabajĕnguentsana šmojologañe ca —Jesús tojánayana.

³⁹ Bĕtsá entsanga, Samarioca pueblentsĕnga Jesúsbeñe imojtsanošbuaché, ntšamo chĕ shembása tojanĕyanama. Chĕ shembása tojanĕyana: “Lempe ntšamo atše tijamcá cha šonjauyana ca.” ⁴⁰ As chĕ samaritanĕnga, Jesús yojtsemnentše tmojánashjajna ora, tmojanimpadá chĕngaftaca chaotsoquedáñama. Y as Jesús, uta te chentše tbojĕftsanjĕtana. ⁴¹ Y más entsanga, cach ntšamo Jesús yojtsanĕtsĕsnacá tmonjanuena ora, chábeñe imojtsanošbuaché.

⁴² Y chĕ shembása chĕ entsanga tmojanianyana: “Mora cocayé fsĕntsošbuaché, ndoñe nŷe ntšamo aca šcojáuyanama, sinó cach bĕnga chábioye oído fsĕnjabuajóyeca; y mora fsĕntsetatšĕmbo ndegombre cha yojtsemna chĕ quem luare entsangbiana Atsebacayá ca.”

Jesús, canŷe mandado uajabuachanabe básabioye tbojanshná

⁴³ Uta te chentšana, Jesús Samariocana tojáisanbocna y Galileoye tojataná. ⁴⁴ Cach Jesús mĕntšá tojánayana: “Canŷa Bĕngbe Bĕtsabe juabna oyebuambnayá, cachabe luarentše oyenĕnga ndoñe bĕtsá ntjabemĕngana ca.” ⁴⁵ Galileoca oyenĕnga Jerusalenoye tmojána, y tmojáninŷe nŷetsca bĕts soyĕnga ntšamo Jesús Bashco fiesta ora choca tojanmá. Chíyeca, Jesús Galileoye tojtanashjango ora, chĕnga tšabá tmojtanofja.

⁴⁶ Galileocna, Jesús cachiñe Caná pueblöye tojésanashjango, chë béjayeca vínoye cha tojánbementše. Choca yojtsemna canye mandadbe uajabuachaná, y chabe uaquiñana Capernaum puebloca šocá yojtsejájona. ⁴⁷ Jesús Judeocana Galileoye tojánashjanguama, chë uajabuachaná tojanuena ora, Jesúsbioye tojána y ibojtseimpadana chabe yebnoye cháuama, chabe uaquiñá chabuetseshnáñama, er ya jtsóbanama yojtsemna ca. ⁴⁸ As Jesús tbojaniyana: —Tšëngaftanga, Bëngbe Bëtsabe obenana jinyanñiyama bëts soyënga atše jamama ndoñe šmonjinñyëse, átšbeñe ndocna te ntsošbuáchiyana ca.

⁴⁹ Chora, chë mandadbe uajabuachaná Jesúsbioye tbojaniyana: —Taita, betscó mabo, atšbe uaquiñá cabá ndóbana ora ca.

⁵⁰ As Jesús tbojaniyana: —Acbe yebnoye mot-satá. Acbe uaquiñá ainá endëtsomñe ca.

Chë boyabásana tojanošbuaché ntšamo Jesús tbojaniyancá y tojtaná. ⁵¹ Cha yojtsataye orna, chabe oservénënga tmojánbocana jajëbenguama y tmojaniyana: —Acbe uaquiñá tšabá entsatsmëna ca.

⁵² As cha tojanatjá: —¿Ntseco orscana tbënjatëcja ca?

Y chënga tmojanjuá: —Tonjopasá yëfse, mošenana orscana chë calentora tbonjábosana ca.

⁵³ Chora chë taitá tojanenojuabó, cachca ora Jesús tbojaniyana: “Acbe uaquiñá ainá endëtsomñe ca”. Y cha y nyëtscanga chabe yebnentše oyenënga Jesúsbeñe imojtsanošbuaché.

⁵⁴ Ntšamo Jesús chora, chë uajabuachanabe uaquiñabiama tojanmcá, Judeocana Galileoye yojtsataye orna, yojamna chabe utama chca bëts soye jamama, Bëngbe Bëtsabe obenana jinýanýiyama, Galilea luaroca.

5

Jesús canýe jama ndobenábioye tbojanshná

¹ Baseftayté chentsana, chë judiënga canýe oboyejuaye te imojtsebomna ora, Jesús Jerusalenoye tojána. ² Choca, chë Oveshëngbe amashjuana ca uabáinentše yojamna canýe binche uafjónoye, entšangbe pormániñe. Chë béjayna judiëngbe biyañe Betzata ca inauabaina. Chë béjaye juachañe shachna amashjuana otsbojebniñe inamna. ³ Chiñna ba šoquënga jtanënga, coshetënga y jama ndobenënga imojtsecjana; chë béjaye chamobonjoma imojtsobátmana. ⁴ (Nderado nderado, Bëngbe Bëtsábioca canýe ángel yojanamana jastjanguana chë béjaye jabónjuama. Chca ora, chë béjayoye natsana tojamashënguá, chabe šocanama tšabá jtsatsmënana.) ⁵ Chë šoquënguiñe canýe boyabása inamna, unga bnëtsana y posufta uatama jama ndobená. ⁶ Jesús chë jajonábioye tbojáninýe ora y ba uatama chca yojamnama tojántatsšëmbona ora, tbojantjá: —¿Quecojtseboše tšabá jtsatsmënana ca?

⁷ Y chë šocá tbojanjuá: —Taita, ndocná quetsátsbomna nda chašuájabuache béjayoye jamashënguama, chë béjaye tojtsobonjná ora. Y atše béjayoye jamashënguama stseboše ora, inýa atšbe natsana jtsamashënguana ca.

8 Y Jesús tbojaniyana: —Matëtsbaná, acbe tjuashe mesocñe y matontsé jóyenana ca.

9 Cach ora chë boyabása tšabá yojsatsmëna, chabe tjuashe tojésanocñe y tojanontsé jtsanana. Chca tojanopasá ora, chë ochnayté inamna.

10 Chíyeca, chë tbojanshnbioye chë judiënga tmojaniyana: —Mëntena ochnayté. Mënté ndoñe quenátópodena aca tjuashe jtsecutsnana ca.

11 Y chë boyabása tojanéyana: —Chë šonjashná cha mëntsá šonjauyana: “Acbe tjuashe mesocñe y montsé jóyenana ca”.

12 As chënga tmojantjá: —¿Nda yojtsemna chë “acbe tjuashe mesocñe y montsé jóyenana ca” tcmojauyaná ca?

13 Pero chë shnaná ndoñe yontsetátšëmbo nda tbojanshnama. Chocna bëtscá entsanga imojtsemna; chcasna, Jesús chëngbe tsëntsajana tojanenatjëmbo.

14 Chentšana, Jesús Bëngbe Bëtsabe bëts yebnentše chë boyabásabioye tbojáninýena y tbojaniyana: —Mouena; mora aca ya ndoñe šocá quecátsmëna; bacna soyënga ndoñe cachiñe cattsama. Aíñese, acbiama puerte mal echanjopása ca.

15 Chë boyabása tojtsanoñe y chë judiënga tojanéyana: —Chë šonjashná cha Jesús entsemna ca.

16 Chë causa, chë judiënga imojtsenguaye ntšamo Jesús ndayánaca jabórlana, cha ochnayté chë soyënga tojanmama. 17 Pero Jesús tojanéyana: “Atšbe Taitá nýets tempo tšabe soyënga endbëtsama; cachcá, átsnaca tšabe soyënga sëntsama ca.”

18 Jesús tojanma ntšamo ochnayté ndoñe yonjanapodencá, y Bëngbe Bëtsabiana tojánayana “Atšbe Taitá ca”. Mëntšá Jesús yojtšanobiarná cach Bëngbe Bëtsacá. Chama, chë judiënga más imojtseboše Jesús jóbama.

Bëngbe Bëtsabe Uaquiñabe obenana

19 Chentšana Jesús tojanëyana: “Ndegombre šcuayana: Bëngbe Bëtsabe Uaquiñá, nÿe cachabe cuenta tondaye quenátobena jamana. Cha jtsonÿayana ntšamo chabe Taitá tojtsamcá. Ntšamo chë Taitá tojtsamcá, chë Uaquiñánaca jtsamana. 20 Er Bëngbe Taitá chabe Uaquiñábioye bondbobonshana, y lempe ntšamo cha tojtsamcá chábioye bondinÿinÿná; y más bëts soyënga bochanjinÿinÿiye, chë soyëngama tšëngaftanga chašmenjanama. 21 Chë Taitá endama obanënga chámuatayenama y tšabe vida chamotseboynama; cachcá, chë Uaquiñá entsama tšabe vida chamotseboynama, ndëmuanÿenga cha tojtsebošcá. 22 Chë Taitá ndocnabiana jatichámuana tšabá o ndoñe tšabá yontsama ca. Chabe Uaquiñábioye nÿets obenana tbonjatšetá nÿetscangbiana jayanama tšabá o ndoñe tšabá tmontsamama. 23 Chca, chënga chamuinÿinÿé Bëngbe Bëtsabe Uaquiñá puerte uamaná yomnama, ntšamo Bëngbe Bëtsá puerte uamaná yomnama nÿetscanga mondbetsinÿinÿnycá. Nda chë Uaquiñábioye ndoñe más uamaná tbontsebiarná, cach ndoñe más uamana ntsebiarnayana chë Taitábioye, nda chë Uaquiñá tbojichmóbioye.

24 “Ndegombre šcuayana: Nda ntšamo atše sentsichamcá šojoyeuná, y chë muentše šonjichmó chábeñe tojtsošbuaché, chë nyetsca tescama yomna tšabe vida jtsebomnana. Chabiamá chë Uaquiñá ndoñe queochátayana castiganá chaotsemna ca. Chca, Bëngbe Bëtsabiamá cha ya ndoñe más mo obanacá queochátsmëna, chábeñe ndošbuáchiye causa; y ya ndoñe nyetsca tescama castiganá queochátsmëna. Y aíñe, chë nyetsca tescama yomna tšabe vida echántsebomna.

25 “Ndegombre šcuayana: Chë jobuáchama te ya tocjobuache. Chë te, chë Bëngbe Bëtsabiamá mo obanëngcá imomnënga mochanjouena Bëngbe Bëtsabe Uaquiñá jtsóyebuambnayana. Nda chca tšabá chašojoyeuná cha, tšabe vida echántsebomna. 26 Er ntšamo Bëngbe Taitá obenana endbomncá, cachá jamama entšanga vida chamotsebomnama, chabe Uaquiñábioynaca obenana tbojatšetá entšanga vida chamotsebomnama jamama. 27 Chë Uaquiñá endmëna nda Bëngbe Bëtsá Entšá tbojábema; chíyeca chë Taitá chábioye obenana tbojatšetá nyetscangbiamá jayanama tšabá o ndoñe tšabá tmontsamama. 28 Chama ndoñe matenjnanana. Er canye tempo echanjobuache, y chora chë Uaquiñá obanënga echántsachembuana; chënga mochanjouena y cach ora, chëngbe oyenocana mochanjésebocana. 29 Tšabe soyënga tmojëftsemënga, obanënguentšana mochántayena, chë nyetsca tescama yomna tšabe vida jtsebomnama. Pero bacna soyënga tmojëftsemëngna obanënguentšana mochántayena nyetsca tescama castigánënga jtsemnama ca” —

Jesús tojaněyana.

Jesús, ndegombre Běngbe Bětsabe ichmoná in-amna

³⁰ Měntsánaca Jesús cachatbiamá tojánayana: “Něe átšbeyeca tondaye quetsátobena jamama. Chě Taitá šontsemánda ntšamo nřetscangbiamá jayanama tšabá o ndoñe tšabá tmontsamama. Něe chca atše sěntsobena chě soye jamama. Ndoñe quetsátsoše jamana nře ntšamo cach atše stsebošcá; pero sempre sěndbětseboše jamama, ntšamo Taitá, chě šonjichmó cha tojtsebošcá. Chíyeca atše nřetscangbiamá sěntsichamo tšabá o ndoñe tšabá tmontsamama; y ntšamo nřetscangbiamá sěntsichamcá, ndegombre endměna.

³¹ “Ntšamo cach atšbiamá tijayanama, ndegombre entsemna ca stsicháměse, ntšamo stsichamcá, nřetscangbiamá tondaye ntsámanana.

³² Pero inřa entsemna. Cha endětatsěmbo y entsichamo ntšamo ndegombre atšbiamá yomncá; y sěntsetatsěmbo ntšamo cha atšbiamá yojtsichamcá, nřetscangbiamá aíñe yojtsámanama.

³³ Tšěngaftanga ínřenga šmojanichamó atšbiamá Juan jatjayama; y ntšamo cha tcmojauyancá ndegombre endměna. ³⁴ Masque chě soyěnga cha tcmojáuyana, ndoñe quešnatájaboto ndocna entšá atšbiamá chaotsichamo ‘cha aíñe chca endměna ca’. Atše quem soyěnga sěntsichamo ndayá nře tšěngaftanga atsebácaněnga chašmotsemnama.

³⁵ Juan enjamna mo caně uajuinřaněsha tojtsajuinřana y tojtsabuashinřinřancá. Tšěngaftanga chabe buashinřinřanana šmonjině, y šmonjábošena rato cháftaca oyejuayěnga

jtsemnama. ³⁶ Pero chë atše sënjama soyëngacna más entsinÿinÿena ntšamo atšbiana ndegombre yomncá, chë ntšamo Juan atšbiana tojánayanama. Ndayá atšbe Taitá šojabonÿé jamama, ntšamo atše sëntsamcá, entsinÿinÿná ndegombre chë Taitá šojichmoma. ³⁷ Atšbe Taitá, chë šojichmó chánaca entsichamo ntšamo atšbiana ndegombre yomncá, masque ndocna te chabe oyebuambnayana chešmatuena, ni ntšamo cha yomncá chešmátinÿe. ³⁸ Pero tšëngaftangbe ainanoye chabe palabra ndoñe tonjómashëngo, cha tbojichmóbeñe tšëngaftanga ndoñe quešmatošbuaché causa. ³⁹ Tšëngaftanga, Bëngbe Bëtsabe palabra tša jtsatsjédayana, er šmondobátmana, chca jtsamëse chë nÿetsca tescama yomna tšabe vida jónÿenama. Y Bëngbe Bëtsabe uabemana palabrënguiñe atšbiana endayana ntšamo ndegombre yomncá; ⁴⁰ pero masque chca, tšëngaftanga ndoñe quešmátšboše atše jtsëstonana, y chca, tšabe vida jtsebomnama.

⁴¹ “Atše ndoñe quetsátšboše entsanga yapa tšabá atšbiana chamotsichámuama. ⁴² Y inÿe soye, atše puerte cbondëbuatma, y sëndëtatšëmbo tšëngaftanga Bëngbe Bëtsá ndoñe šmondbobonshánama. ⁴³ Atšna atšbe Taitabe cuenta sënjabo, y tšëngaftanga ndoñe quešmátšboše atše jofjana. Pero inÿa, cachabe cuenta tojabábioye cocayé aíñe šmatjofja. ⁴⁴ Tšëngaftanga corente jésebošana, ínÿenga tšëngaftangbiana tšabá chamotsichámuama, y ínÿengbiana tšabá jtsichámuama; pero ndoñe ntsebošana chë nÿe canÿe Bëngbe Bëtsá tšëngaftangbiana cachcá chaotsichámuama. Chca šmojtsamëse,

¿ntšamo šmochtsobena Bëngbe Bëtsábeñe jtsošbuáchiyana? ⁴⁵ Ndoñe šmattsejuabnaye, atšbe Taitabe delante tšëngaftangbe contra atše chjayana ca ntšamo tšëngaftanga šmojtsamama. Tšëngaftanga tša jtsobátmanana atsebácanënga jtsemnama, chë ntšamo Moisesbe leyinë endayancá šmojtsamama; pero ndegombre, ntšamo cha tojayancá, cach tšëngaftangbe contra entsemna. ⁴⁶ Tšëngaftanga, chë Moisés tojëftsanabema soyinë šmojtsošbuachese, átšbeñnaca šmattsošbuáchiye, er cha atšbiana tojanábema. ⁴⁷ Pero chë tojanábema soyinë tšëngaftanga ndoñe šmontsošbuachesna, ¿ntšamo šmochjobenaye chë atše séntsichamo soyënguiñe jtsošbuáchiyana ca?” —Jesús tojanéyana.

6

Jesús shachna uaranga boyabásenga saná tojanacaredadó

(Mt 14.13-21; Mc 6.30-44; Lc 9.10-17)

¹ Chë soyënga tojanopasá chentšana, Jesús chabe uatsjëndayëngaftaca tojána Galilea uafjajónaye chenguana. Chë uafjajónayna Tiberias cánaca inauabaina. ² Ba entsanga imojtsëstona, er chënga tmojáninÿe cha bëts soyënga jtsamana, šoquënga jtsashnayëse. ³ As Jesús tjoye tojántsjuá, y choca chabe uatsjëndayëngaftaca tojanótbema. ⁴ Ya judiëngbe canÿe fiesta, chë Bashco fiesta, vojëtsobeco.

⁵ Jesús tojanótbema ora, tojanontješé y tojánanÿe ba entsanga chábioye imojetsebéconaye. As Felípbioye tbojaniyana: —¿Ndayentšë

saná cuanjabuámiye nyetsca quem entsanga chamosama ca?

⁶ Jesús chca tbojaniyana, ana Felípbioye jinýama ntšamo cha tabuanjojuama; er cach Jesús tšabá inatátšëmbo ndayá jamama. ⁷ Y Felipe tbojanjuá: —Ni mo uta patse denario crocenánaca nanjopódia tandëse jabuámiyama, nyetsca entsanga nye mo batšatémnaca chamuétsesama ca.

⁸ Chorna, Jesusbe canýe uatsjendayá, Andrés ca uabainá, Simón Pédrëbe catšata, Jesúsbioye tbojaniyana: ⁹ —Muentše entsemna canýe básetema y cha shachna cebada tandëse y uta beónata entse-bomna. Pero, ¿ndayase nye nyetsatema chëfta entsangbiama ca?

¹⁰ As Jesús tojánayana: —Entsanga méyana chamotbiama ca.

Becá shácuana chë luariñe inamna, y nyetsca entsanga chiñe tmojanoshëntsjatbiama. Chë entsanguentše shachna uaranga boyabásenga imojtsemna. ¹¹ Chora Jesús, chë tandëse chabe cucuatšiče tojanca, y Bëngbe Bëtsábioye chë tandësama tbojtanchuá; y chabe uatsjéndayënga tojanëjatá, y chë uatsjéndayëngna nyetsca entsanga imojtsetbiámanënga tmojanatšatá. Cachcá Jesús chë beónaca tojanma, y ntšamo entsanga imojoanbošcá tmojanatšatá. ¹² Nyetscanga tmojanse y tmojtanoshachá ora, Jesús chabe uatsjéndayënga tojanëyana: —Chë ojamnëtëmënga šmochtsatbananga, tondaye nye cachcá ntjëftsonýayama ca.

¹³ As chënga tmojanatbaná, y chë tmojanse shachna cebada tandësentšana tojanójamëtemëngaca, bnëtsana uta sbarëcua

tmojanajutjé. ¹⁴ Chë entsanga quem bëts soye Jesús jamama tmojáninÿe ora tmojánayana: “Ndegombre quem boyabása, chë quem luaroye jabama Bëngbe Bëtsabe juabna jabóyebuambayama cha entsemna ca.”

¹⁵ Jesús yojtsetátšëmbo entsanga chëngbe rey jabemama imojetsebošama. Chíyeca cach tjoye tojtsaisanoñe canÿa jtsomñama.

Jesús béjaye juatsbuacá yojtsaye
(Mt 14.22-27; Mc 6.45-52)

¹⁶ Tojanibétata ora, Jesusbe uatsjéndayënga chë uafjajónayoye tmojantsmá; ¹⁷ barquëshañe tmojtanojayé, y tmojanontsé jenashbuachéngwana, chca, Capernaumoca jenbocnama. Ya ibeta yojtsemna, y Jesús cabá ndoñe chëngbioye ntashjanguana. ¹⁸ Chca imojtsenashbuachnëjuana orna, chë béjayiñe jabuache binÿia tojanóshjango y bëts olëshënga chë barquëshoye yojtsójantsetaye.

¹⁹ Shachna o chnëngwana kilómetro chënga tmojána ora, tmojáninÿe Jesús chëngbioye yojtsebéconaye, béjaye juatsbuacá yojtsaye. Chënga chca tmojáninÿe ora tša tmojanocochauatjaná, ²⁰ pero Jesús tojanëyana: “Atše sëndmëna; ndoñe matauatjëngana ca.”

²¹ Chora chë uatsjéndayënga oyejuayënga imojtseboše Jesús chë barquëshoye jofjana, y ndoñe bënëntscose ya chë imojtsaye luaroye tmojánashjajna.

Entsanga Jesús tmojáanguango

²² Yëfsana, nÿetsca entsanga, chë uafjajónaye chenguánoica tmojanoquedanga tmojáninÿe, chë inÿe yëfsana chë nÿe canÿe barquëshä

yojuamněshañe Jesusbe uatsjéndayënga tmojtsanoñama, y Jesús chëngaftaca ndoñe tonjánama. ²³ Pero chëntscuana, Tiberias pueblentsana inye barquëshangá tojanáshjajna canye luarentse, chë Bëngbe Utabná Jesús chabe Taitábioye tbojtanchuá chentšana, entšanga saná tmojanse luare béconana. ²⁴ Asna, ni Jesús ni chabe uatsjéndayënga chentse ndoñe montsemnama chë entšanga tmojáninye ora, chë barquëshangañe tmojtanenojayé y Capernaumoye tmojána Jesús jetsenguanguama.

Jesús, chë nyetsca tescama yomna tšabe vida jtse-bomnama tandëse

²⁵ Chë uafjajónaye chenguánoye tmojánashjajna ora, Jesús tmojáninyena y mëntsá tmojantjá: — ¿Buatëmbayá, ntseco ora muentse tcojášhango ca?

²⁶ Y Jesús tojanéyana: —Ndegombre cbéyana, tšëngaftanga ndoñe atse quešmatsnguá, chë bëts soyënga tijamama, sinó nye chë jtoshachaye nyetsá tandëse šmojasama. ²⁷ Ndoñe matenángmenana chë nye ndoñe bën y jopochócana sanama; chë ndmopochócaye saná, chë nyetsca tescama yomna tšabe vida jtsebomnama saná šmochjúanguango. Chë saná, Bëngbe Bëtsá Entsá tbojanbemá cmochanjátšataye, er Bëngbe Bëtsá chë Taitá tonjinýanýé, tšabe soyëngaca, cha chábioye tbojuábuayanama ca —tojánayana.

²⁸ Chora chë entšanga tmojantjá: —¿Ndayá fch-jama ntšamo Bëngbe Bëtsá yojtsebošcá chaotsemnama ca?

²⁹ Chca tmojantjá ora, Jesús tojanéyana: —Chë Taitá entseboše tšëngaftanga chabe ichmonábeñe chašmotsošbuáchema ca.

³⁰ Chora chënga tmojaníyana: —¿Ndaye tšabe soye cochjama acbe obenana bënga jinÿanÿiyama ca? Chë soye chaftsjinÿëse, ácebeñe fchantsošbuáchiye. ¿Bëngbiama taicochjama ca? ³¹ Bëngbe tempsca bëts taitanga entšanga ndoyenoca maná ca uabaina saná tmojanse. Bëngbe Bëtsabe uabemana palabrénguiñe mëntšá endayana: “Cha celoca tandëse tonjanatšatá chamosama ca” —chënga tmojánayana.

³² Chora Jesús tojanéyana: —Ndegombre cbëyana, Moisés chënga ndoñe chë celoca tandëse tonjanatšatá; Bëngbe Bëtsá Bëngbe Taitá chëngbioye tojanatšatá chë maná ca uabaina tandëse; y cha endmëna nda celocana chë ndocna te ndmopochócaye tandëse ndegombre cmondatsatná. ³³ Er Bëngbe Bëtsábiocana tandëse entsemna chë celocana tojastjanguá; y cha quem luare entšangbiama entsama chë nÿetsca tescama yomna tšabe vida chamotsebomnama ca —cha tojanéyana.

³⁴ Chora chënga tmojanimpadá: —Taita, chë tandëse sempre šcochtsatšatnaye ca.

³⁵ Y Jesús tojanéjua: —Atše sëndmëna entšanga chë nÿetsca tescama yomna tšabe vida jtsebomnama tandëse. Nda atše chašojtséstona, sempre oyejuayá echanjëftsemna y Bëngbe Bëtsabe soyënga nÿets tempo echanjesóbomñe, mo nda nÿets tempo saná totsobomñcá, y ndocna te tbontsishëntsancá. ³⁶ Pero ntšamo ya tcbonjauyancá, tšëngaftanga atše šmonjinÿe y

cabá ndoñe átsbeñe quešmatošbuaché. ³⁷ Nda atšbe Taitá atšbiamá tbojabocacá, cha atše šochantsěstona; y nda átsbioye šojtsěstona, átsbentsana quichtětábocna. ³⁸ Er atšna celocana sěnjabo chě šojichmó cha ntšamo yojtsebošcá jamama, y ndoñe n̄ye ntšamo atše stsebošcá. ³⁹ Y chě šojichmó cha entseboše, ni mo can̄ya chě atšbiamá tojabacacá chentšana, atše chailesenciá pochocaná chaotsemnama; y quem luare jopochócama tena, n̄yetscanga atšbiamá tojábacacangbiamá chámuatayenama atše chaimama. ⁴⁰ Er atšbe Taitá entseboše, nda chabe Uaquiñábioye tbojin̄ye y chábeñe tojtsošbuaché, chě n̄yetsca tescama yomna tšabe vida chaotsebomna, y quem luare jopochócama tena, cha cháuatayenama atše chaimama ca —Jesús tojaněyana.

⁴¹ “Atše sěntsemna chě celocana tojóshjango tanděse ca” Jesús tojaněyana causa, chě judiěnga tmojanontsé chabiamá podesca ichámuana.

⁴² Chěnga mēntšá imojtsichamo: —¿Mua ndoñe Jesús yondmēna, chě Josebe uaquiñá? Chabe bētsětsata bēnga tmotsábuatmñe. ¿Ntšamo cha mora yochjátichamo celocana tojástjango ca?

⁴³ As Jesús tojaněyana: —Atšbiamá ndoñe podesca matichámuana. ⁴⁴ Ndocná quenátobena atše juastana, chě Taitá, chě šojichmó cha, ainaniñe chca chaotsebošama ndoñe tbonjuajabuáchese; y atše chanjama cha cháuatayenama quem luare jopochócama te.

⁴⁵ Chě tempsquěnga Běngbe Bětsabe juabna oyebuambnayěnga mēntšá tmojanábema: “Cach Běngbe Bětsá n̄yetscanga echanjabuatambá ca.”

Chcasna, nda atšbe Taitábioye tbojoyeuná, y ntšamo chë Taitá tbojabuatëmbacá tojuatsjinÿe, cha atše ſochanjuasto.

⁴⁶ “Ndocná atšbe Taitá tbonjinÿe. Nÿe chë Bëngbe Bëtsábiocana tojabá aíñe. ⁴⁷ Ndegombre ſcuayana: Nda átšbeñe tojtsošbuaché, chë nÿetsca tescama yomna tšabe vida echántsebomna.

⁴⁸ Atše sëndmëna entšanga chë nÿetsca tescama yomna tšabe vida chamotsebomnama tandëše.

⁴⁹ Masque tšëngaftangbe bëts taitanga, entšanga ndoyenoca chë maná ca uabaina saná tmojanse, pronto tmojanóbana. ⁵⁰ Pero atše sëntsoyebuambná ndayá chë celocana tojóshjango tandëšama. Nda chë tandëše tojase, ndoñe queochatóbana.

⁵¹ Atše sëntsemna entšanga chë nÿetsca tescama yomna tšabe vida jtsebomnama tandëše, chë celocana tojóshjanguëše. Nda quem tandëše tojase, nÿetsca tescama nÿe ainá echanjesomñe. Chë chanjátšataye tandëšna, cach atšbe cuerpo entsemna. Chca chanjama quem luare entšanga chë nÿetsca tescama yomna tšabe vida chamotsebomnama ca” —Jesús tojánayana.

⁵² Chora chë judiënga tmojanontsé enatsëtsnayana: —¿Ntšamo cha yochjobenaye cachabe cuerpo jatšatayana bënga jasama ca?

⁵³ As Jesús tojanëyana: —Ndegombre ſcuayana: Tšëngaftanga Bëngbe Bëtsá Entšá tbojanbemabe cuerpo ndoñe ſmonjase y chabe buiñe ndoñe ſmonjofšese, ndegombre tšabe vida ndoñe quešmochátsbomna. ⁵⁴ Nda atšbe cuerpo tojase y atšbe buiñe tojofšé, chë nÿetsca tescama yomna tšabe vida echántsebomna, y quem luare

jopochócama te atše chanjama cha cháuatayenama. ⁵⁵ Atšbe cuerpo ndegombre saná endmëna, y atšbe buiñe ndegombre ofšëšnayiye. ⁵⁶ Nda atšbe cuerpo tojase y atšbe buiñe tojofsé, átšeftaca cánÿiñe mo canÿacá echántsemna, y átšnaca cháftaca. ⁵⁷ Atšbe Taitá, chë šojichmó cha, vida endbomna, y atše chábeyeca vida sëndbomna; cachcá, nda atšbe cuerpo tojase, chana átšbeyeca vida jtsebomnana. ⁵⁸ Chë ndaye soyama atše sëntsoyebuambná, atšbe cuerpo y atšbe buiñe, entsemna chë celocana tojóshjango tandëse. Masque tšëngaftangbe bëts taitanga chë maná ca uabaina tandëse tmojanse, pronto tmojanóbana; pero quem tandëse ndoñe cachcá quenátsmëna. Nda quem tandëse tojase, ñye ñyets tempo vida echanjesóbomñe ca —Jesús tojánayana.

⁵⁹ Chë soyëngna Jesús tonjanabuatambá Capernaum pueblentše, chë judiëngbe enefjuana yebnentše.

Chë ñyetsca tescama yomna tšabe vida jtsebomnana palabrénga

⁶⁰ Chca tmojanuena ora, banga Jesusbe ústonënga imojtsichamo: —Ntšamo cha entsichamcá yapa totcá entsemna mo ndegombre cuaftsemncá joyeunayama. ¿Nda buanjóyeunaye ca?

⁶¹ Jesús yojtsetátšëmbo chënga ndoñe tšabá imontsichámuama; as, chënga tojanatjá: —¿Ntšamo cbontsëtsëtsnacá ndoñe tšabá cmontsëuenana ca? ⁶² Y chcasna, Bëngbe Bëtsá Entšá tbojanbemá, chë cha tempo inamna luaroye tojëtstsjuama šmojinÿëse, ¿ntšamo šmattsejuabnaye? ⁶³ Bëngbe Bëtsabe Espíritu entsama entsanga chë tšabe

vida chamotsebomnama. Chë cuerpo ndoñe uámana soye quenátsmëna; chë tcbonjáuyana soyënguiñe entsemna chë Uámana Espíritbe uajabuáchenana y chë tsabe vida. ⁶⁴ Pero masque chca entsemna, tsëngaftangbentsana banga átsbeñe ndoñe quešmatošbuaché ca –Jesús tojánayana.

Er Bëngbe Bëtsabe soyëngama entsanga jábuayenama Jesús tojanbojatsé orscana, cha inatátsëmbo ndëmuanyënga chábeñe ndoñe mochanjanošbuáchiye, y nda chë uayayëngbe cucuatšíñe yochjéftsayentšbashejuanana. ⁶⁵ Y Jesús yojtétóntša oyebuambnayana: –Chíyeca, atše tsëngaftanga tcbonjáuyana: “nda atše juastama ainaniñe chaotsebošama atšbe Taitá ndoñe tbonjuájabuache, cha ndoñe quešochatasto ca”.

⁶⁶ Chë causa, chentsana, ba chabe ústonënga cachcá tmojesanonjá, y cháftaca ya ndoñe imontsajna. ⁶⁷ Chora Jesús, chë bnëtsana uta uatsjëndayënga tojanéyana: –¿Y tsëngaftángnaca, jtsoñama y atše jéseboshjonama šmojtseboše ca?

⁶⁸ Chora Simón Pedro tbojanjuá: –Bëngbe Utabná Jesús, ¿chcasna ndábioye fchjanga ca? Nye aca šcontsëtsëtsná chë nyetsca tescama yomna tsabe vida jtsebomnama palabrenga. ⁶⁹ Acbeñe fsëntsošbuaché, y mora fsëntsetatšëmbo aca chë Bëngbe Bëtsabe Uamaná comnama ca.

⁷⁰ Chora Jesús tojanéyana: –Atše tcbonjabacacá, chë bnëtsana útata; pero canya tsëngaftanguentšana, mo Satanasbe canye trabajyacá entsemna ca.

⁷¹ Judas Iscariote, chë Simonbe uaquiñabiama chca Jesús tojánayana. Er chana masque

canÿa chabe bnétsana uta uatsjendayënguentšá inamna, Jesús uayayëngbe cucuatšíñe yochjáftsayentšbashejuana.

7

Jesusbe catsátanga chábeñe ndoñe montsanošbuaché

¹ Chë soyënguentšana, Jesús Galilea luarëjana yojánana. Chë tempo, judiënga imojtsanjuabnaye ntšamo jamëse cha jóbama. Chíyeca, Jesús ndoñe yontseboše Judeoye jama. ² Chora, judiëngbe canÿe bëts fiesta semana yojtsobeco. Quem fiestënguëntscuana, chë judiënga imojanamana tambënguiñe jtsiyenana. ³ As chora Jesusbe catsátanga tmojaniana: — Muentše ndoñe catjoquéda; Judeoye motsa, choca condbomna ústonënga, ntšamo contsamcá chócnaca chaminÿama. ⁴ Er nda tojtseboše chamotsábuatmama, chabe soyënga ndoñe iytcëcana ntsamana. Aca bëts soyënga Bëngbe Bëtsabe obenánaca contsamësna, motsa y nyëtscangbe delante chca cochjama ca —chënga tmojaniana.

⁵ Er ni mo cach Jesusbe catsátanga chábeñe ndoñe montsanošbuaché. Chíyeca chënga chca tmojaniana.

⁶ Chora Jesús tojanëjua: —Atšbe ora cabá ndoñe quentóshjango, pero tšëngaftangbiana mocna órnaca tšabá endëtsomñe. ⁷ Chë nyë quem luarama enójuabnaye entšanga ndoñe quemátobena tšëngaftanga jtsëbuayënjana, pero átšbioyna aíñe, er atše puerte tšabá sëntsinÿanÿná ntšamo chënga imojtsamcá ndoñe tšabá yontsemnama.

⁸ Tšëngaftanga chë fiestama šmochjá. Atšbe ora cabá ndoñe quentóshjango. Chýeca atše choye ndoñe quicháta ca —cha tojánayana.

⁹ Jesús chë soyënga tojanëyana y cach Galileoca tojtsanoquedañe.

Chë tambënguiñe jtsiyenama fiesta

¹⁰ Chabe catšátanga chë fiestoye tmojána chentšana, Jesúsna ca tojána, masque ndoñe entšángbeñe, sinó mo iytëcana cuenta. ¹¹ Chë fiestocna, judiënga Jesús imojtsenguaye y imojtsichamo: —¿Ndayentše chë boyabása yojtsemna ca?

¹² Entšángbeñe ba soyënga chabiamá iytëcana imojtsichamo. Inyënga chabiamá imojtsichamo: “Cha tšabia endmëna ca”; pero ínnyënga: “Cha entšanga entsáingña ca”.

¹³ Pero ndocná Jesusbiamá becá añémoca yontsoyebuambná, chë judiëngbe amëndayëngbiamá imojtsauatja causa.

¹⁴ Chë fiesta semana tsëntsañe yojtsó ora, Jesús Bëngbe Bëtsabe bëts yebnentše tojánamashëngo, y tojanontsé jabuátambana. ¹⁵ Chentše chë judiënga, ntšamo Jesús tojanabuatambacá tmojanuena ora, ojnánënga imojtsichamo: —Bëtscá ntjuatsjinýcá, ¿ntšamo nyetsá nantsetátšëmbo ca?

¹⁶ As Jesús tojanëjua: —Atšbe buatëmbayana ndoñe nyë átšbentšana quenatóbocana, ndayá chë šonjichmó chábentšana. ¹⁷ Nda tojtseboše jamama ntšamo chë šojichmó cha yojtsebošcá, cha echántsetatšëmbo atšbe buatëmbayana Bëngbe Bëtsábocana yóbocanama o nyë átšbentšana.

¹⁸ Nda nyë cachabe juábnaca tojtsoyebuambná,

jtsebošana entsanga más bĕtsá chamobemama; pero nda bĕtsá tojtsama, chĕ tbojichmóbioye entsanga más bĕtsá chamobemama, cha cocayé ntšamo ndegombre yomncá jtsóyebuambnayana, y ndocnábioye ntseíngñayana.

¹⁹ “Ndegombre, Moisés tšĕngaftangbiamalej tojĕftsanaboshjona. Pero masque chca, tšĕngaftanguentšá ndocná quenátama ntšamo cha tojĕftsanmandacá. Y ĩndáyeca šmojtseboše atše jóbama ca?” —Jesús tojanatjá.

²⁰ Chora entsanga tmojanjuá: —ĭNdegombre aca bacna bayĕjbe juabna contsambá! ĩNda yojtseboše aca jóbama ca?

²¹ Chora Jesús tojanĕyana: —Nĕyetsca tšĕngaftanga ojnánĕnga atše šmontsonĕá, atše canĕe ochnayté canĕe entsá tijashnama. ²² Pero, Moisés tcmónjanamĕndá básetema base bobachtema chĕ más delicadentše jatĕtsana, chaotsinĕyana (ndoñe nĕe Moisésbeyeca chca, sinó Moisesbiamamá tempasca bĕts taitanga chca jamama imojanamánayeca); y tšĕngaftanga canĕe básetema base bobachtema chĕ más delicadentše jatĕtsana, masque chĕ te canĕe ochnayté totsomñĕe. ²³ Y mora, ntšamo Moisés tcmojĕftsanamĕndacá ndoñe cachcá ntjonĕyayama, canĕe básetema chca jatĕtsana masque ochnayté; as, ĩndáyeca atše šmojtsayaná, atše ochnayté canĕe entsabe nĕyets cuerpo tijashnama? ²⁴ Nĕe batšá jinĕese, ínĕyngbiamana ndoñe matichámĕngana tšabá o ndoñe tšabá tmonjama ca. Ntšamo chĕ soyĕnga ndegombre bĕtsemnama natsana lempe tšabá jshĕtsetatsĕmbĕse, šmochjayana tšabá o ndoñe

tšabá tmonjama ca —Jesús tojánayana.

Jesús tojánayana ndēmocana cha tojánabama

²⁵ Chora báseftanga Jerusalenoca oyenënga tmojanontšé ichámuana: —¿Mua ndoñe yontsemna chë jóbama montsenguá cha ca? ²⁶ Masque ba entšangbe delante entsoyebuambná, ndocná chábioye ndocá ntjauyanana. ¿Nderado mo chë bëngbe amëndayënga imojtsejuabná cha chë Cristo, chë Uámana Uabuayaná yojtsemna ca? ²⁷ Pero bënga mondétatšëmbo ndēmocá quem boyabása yomnana; y chë cuenta, chë Cristo chaojabo ora, ndocná queochátstatšëmbo ndēmocana cha yochjabama ca —chënga imojtsichamo.

²⁸ Chca tojanuena ora, Bëngbe Bëtsabe bëts yebnentše Jesús yojtsabuátambayëntscuana, cha jabuache tojánayana: —¡Tšëngaftanga šmojtsejuabná atše ndegombre šmabuatma, y ndēmocana tijabama šmojtsetátšëmbo ca! Pero nýe atšbe cuenta, ndoñe chiyátabo, ndayá canýa šojichmóyeca, nda ntšamo ndegombre yomncá nýetsca soyëngama endbëtsoyebuambnaye; y tšëngaftanga cha ndoñe quešmatábuatma. ²⁹ Atšna aíñe cha sënduábuatma, er atše chábentšana sënjabo y cha quem luaroye šonjichmó ca —Jesús tojánayana.

³⁰ Jesús chca tojánayana ora, chënga tmojánbošena cha jishachama, pero ndocná tbonjánishache, er cha chca japásama cabá ndoñe ora tonjanóshjango. ³¹ Banga chentše Jesúsbeñe imojtsanošbuaché y tmojánayana: “Chë Uámana

Uabuayaná chaojabo ora, ¿quem boyabásabiamá más tsábe soyënga yochjama ca?”

Chë fariseunga tmojánbošena Jesús jishachama

³² Chë fariseunga tmojántatsëmbona ntšamo entsanga Jesusbiamá iytëcana imojtsencuéntaye. As, chënga y chë bachnangbe amëndayënga tmojanichamó báseftanga Bëngbe Bëtsabe bëts yebnocá josticiënga, Jesús chamuishachama.

³³ Chora Jesús tojánayana: “Muentšana nyë baseftayté tsëngaftangaftaca chanjëftsemna; chentsána, chë šojichmó chábioye chanjëtspadésa.

³⁴ Chora tsëngaftanga atše šmochántseguaye, pero ndoñe quešmochátinyëna; y ndayentše chántsemnocá ndoñe quešmochatobenaye jashjanguama ca.”

³⁵ Chora chë judiënga tmojanontsé entjanayana: “¿Ndëmoye quem boyabása yochjá, y bënga ndoñe mochanjobenaye jinýenama ca? ¿Inýe fshantsëngoye, judiënga tmojuashanëngbioye yochjá, y choca chë ndoñe judiënga yochjabuatambá? ³⁶ ¿Ntšamo yojtsentšáyana cha šonjauyancá, chë tsëngaftanga atše šmochántseguaye, pero ndoñe quešmochátinyëna; y ndayentše chántsemnocá ndoñe quešmochatobenaye jashjanguama ca?” —chënga imojtsichamo.

Béjayënga vida bomniye

³⁷ Chë fiesta jopochócama te yojamna chë más uámana te. Chë te, Jesús entsángbentše tojantsá y jabuache tojánayana: “¡Nda tbojtsajuendá, átšbioye chauabo y chaofsé! ³⁸ Ntšamo Bëngbe

Bëtsabe uabemana palabrënguifne endayanca: ‘Nda átšbeñe tojtsošbuaché, cha echántsemna mo ndabe ainanentsana vida bomna béjayënga tojtsobocancá.’ Chca echántsemna átšbeñe ošbuáchiyëngbiana ca” —cha tojánayana.

³⁹ Chë sóyeca, Jesús yojtseboše jayanana, chábeñe ošbuáchiyënga chë Uámana Espíritu mochjanóyëngacñe ca; er chë Uámana Espíritu cabá ndoñe tonjánabo, Jesús corente bëtsá yojamnama cabá ndoñe tmonjaninÿinÿé causa.

Nÿetsca entsanga ndoñe cachcá Jesusbiana imontsejuabnaye

⁴⁰ Chca tmojanuena ora, ínÿenga imojtsichamo: —Quem boyabása ndegombre chë Bëngbe Bëtsabe juabna oyebuambnayá entsemna, chë Cristbe nat-sana jabamá ca.

⁴¹ Inÿenga imojtsichamo: —Ndegombre cha chë Cristo, chë Uámana Uabuayaná entsemna ca.

Pero ínÿengna: —Ndoñe, er chë Cristo Galileocana ndoñe queochátabo. ⁴² Ndegombre, Bëngbe Bëtsabe uabemana palabrënguifne endayana, chë Cristna rey Davídbentsana entsá canmëna, y Belenocana caochjabo ca, cach puebllocana ndayentsá David inamna ca —chënga imojtsichamo.

⁴³ Y chca, ínÿengna Jesusbe pavor imojtsemna, y ínÿengna chabe contra. ⁴⁴ Inÿenga imojtseboše Jesús jishachama, pero ndocná tbonjánishache.

Chë amëndayënga Jesúsbeñe ndoñe montsanošbuaché

⁴⁵ Chë fariseunga y bachnangbe amëndayënga imojtsemnoye chë Bëngbe Bëtsabe bëts yebnoca

josticiënga tmojtanashjajna ora, tmojanatjá: — ¿Ndáyeca ndoñe Jesús šmonjuánatse ca?

⁴⁶ Chora chë josticiënga tmojanëjua: —Ndocná quenatoyebuambná ntšamo chë boyabása tonjoyebuambacá ca.

⁴⁷ Chora chë fariseunga tmojanëyana: —¿Tšëngaftángnaca šmojalesenciá cha chacmaingñema ca? ⁴⁸ ¿Nderado bëngbe amëndayënguentsá o bënga fariseunguentšá nÿe mo canÿa chábeñe tayojtsošbuaché? ⁴⁹ Pero quem entšanga, ntšamo leyiñe iuayancá nduabuátmënga, bacna soyëngaca sempre mochanjëftsemna ca —chënga imojtsichamo.

⁵⁰ Chora Nicodemo, canÿa fariseunguentšá, chë Jesúseftaca jencuéntama ibeta tojána cha, tojánayana: ⁵¹ —Ntšamo bëngbe leyiñe endayancá, bënga ndoñe quemuátobena jayanana canÿe entšá castiganá jtsemnama ibojtsemna ca, cha cabá ntjoyeunaycá, ndayá cha tojamama jtsetatšëmbuama ca.

⁵² Chora chënga Nicodemo tmojanjúá: — ¿Acnaca chábeñe cojtsošbuaché y mo canÿe Galileoca entšacá cojtsejuabná ca? Bëngbe Bëtsabe uabemana palabrënguñe cochjuatsjinÿe, y cochanjinÿe ni canÿa Bëngbe Bëtsabe juabna oyebuambnayá Galileocana yochjabo ca.

Chë shema boyábioye ínÿaftaca ingñayá

⁵³ Fariseunga y bachnangbe amëndayënga chë josticiëngbioye tmojanëcácanentšana, cada ona cachabe yebnoye imojtsatóñënga.

8

¹ Pero Jesusna canye tjoye, Olivos ca uabáinoye tojtsanoñe. ² Y chë yëfsana cachëse, Jesús cachiñe Bëngbe Bëtsabe bëts yebnoye tojesaná. Nÿetsca entšanga tmojanobeconá jouenama, y Jesús tojanótbema y tojanontšë jabuátambama.

³ Chorna, báseftanga ley abuátambayënga y fariseunga tmonjánashjajna, y canye shembása tmojanëshjango. Chana tmojáninÿena chabe boyábioye ínÿaftaca ibnetsoíngñañëntscuana; nÿetscangbe tsëntsaca tmojanatsá, ⁴ y Jesús tmojaniana: —Buatëmbayá, quemuá fsenjínÿena chabe boyábioye ínÿaftaca bondëtsoíngñañëntscuana. ⁵ Leyiñe Moisés šonjanamëndá mëntšá uamana shembásengna ndëtšbéngaca jtsëbáyama. ¿Aca ntšamo catjayana ca?

⁶ Jesús chca tmojaniana ana jisháchichiyama, chca chënga jtsebomnama ndáyeca chabe contra jayanana. Pero Jesús nÿe fshantsoye yojotsejbéna y yojóntša ntšabuáfjaca fshantsiñe juabemama. ⁷ Chënga nÿe imojtsetjanaye causa, Jesús tojantsbaná y tojanëyana: —Nda tšëngaftanguentšá tondaye bacna soyënga tondbomná, chaobojaťšë ndëtšbeca jatëchënjama ca.

⁸ Chentšana Jesús cachiñe fshantsoye yojtotsejbéna, y yojtëtóntša fshantsiñe jtëtabemama. ⁹ Chca tmojanuena ora, entšanga tmojanontšë canÿánÿa chentšana jésebocanana; natsana chë más bëtsanánënga y chë ínÿengna ústonoye. Canÿa Jesús tonjanoquedá y chë shembásanaca. ¹⁰ As, Jesús tojtantsá y tbojantjá: —¿Shembása, ndayentšë chë acbe contra ichámënga

imojtsemna? ¿Ndocná acbiama tonjayana castiganá chacotsemna ca?

¹¹ Ndoñe, Taita, ndocná ca –chë shembása tbojanjuá.

Chora Jesús tbojaniyana: –Atše cach ndoñe acbiama quichátayana castiganá chacotsemna ca. Morna, motsatoñe, pero ndoñe más bacna soye cattsama ca.

Jesús yomna quem luarentša entsangbe juabna binñayá

¹² Jesús cachiñe Bëngbe Bëtsabe bëts yebnentše yojtسابuátambaye, y entsanga mëntšá tojanëyana: –Atše sëndbínñna quem luare entsangbe juabnënga. Nda atše chašojtsëstona, cha echantsiyena atše chë binñayáftaca; y ndoñe mo ibetiñcá queochátaye, y chca, tšabe vida echántsebomna ca.

¹³ Chora chë fariseunga Jesús tmojaniyana: –Aca nñe cach acbiama chca contsoyebuambná; chcana, chë ntšamo contsichamcá tondaye quenatámana ca.

¹⁴ As chora Jesús tojanëjua: –Ntšamo cach atšbiama sentsichamcá añne entsámamana, masque nñe atše stsichamo ntšamo atšbiama ndegombre yomncá. Er atše sëndétatšëmbo ndémocana tijabo y ndémoye ttsá. Pero tšëngaftanga ndoñe chca quešmátstatšëmbo. ¹⁵ Tšëngaftanga šmondbétsichamo ínñengbiamama tšabá o ndoñe tšabá tmontsamama, chca, nñe ntšamo entsanga mondbetsejuabnaycá. Pero atšna ndocnabiamama chca quetsátichamo. ¹⁶ Atše ndoñe nñe canña quetsátsmëna ínñabiamama jayanama tšabá o ndoñe tšabá tontsamama; ndayá atšbe Taitá, chë

šonjichmó cha, átšeftaca chca jayanana. Chíyeca, atše ínŷabíama tšabá o ndoñe tšabá tonjama ca stsichamo ora, ntšamo stsichamcá ndegombre jtsemnana. ¹⁷ Tšëngaftangbe leyiñe enduábemana, uta entšata ndayámnaca cachcá tbojayanëse, ntšamo chata tbojayanca puerte jtsámanana ca. ¹⁸ Y morna, atše séntsichamo chë ntšamo cach atšbíama ndegombre yomncá, y atšbe Taitá, chë šonjichmó chánaca entsichamo ntšamo atšbíama ndegombre yomncá ca —Jesús tojánayana.

¹⁹ Chora chënga tmojantjá: —¿Ndayentše acbe Taitá yojtsemna ca?

Y Jesús tojanējua: —Tšëngaftanga ndoñe quešmatábuatma ni atše ni atšbe Taitá. Atše šmojtsábuatmësna, atšbe Taitánaca šmattsábuatma ca.

²⁰ Bëngbe Bëtsabe bëts yebnoca, chë crocénana jacjayama luarentše yojtsabuátambaye ora, Jesús chca tojánayana. Pero masque cha chentše yojtsemna, ndocná tbonjánishache, er chca japásama cabá ndoñe ora tonjanóshjango.

“Chë chanjá luaroye, tšëngaftanga ndoñe quešmatobena jama”

²¹ Chora Jesús yojtétóntša oyebuambnayana: —Atše chantá, y chora tšëngaftanga atše šmochántsenguaye. Masque chca, šmochanjóbana tšëngaftangbe bacna soyëngama ndëperdonánënga. Chë chanjá luaroye, tšëngaftanga ndoñe quešmatobena jama ca —Jesús tojánayana.

²² Chora chë judiënga tmojanontsé enatsëtsnayana: —¿Mo nderado yojtsejuabná jtsenóitanama, y chíyeca yojtsichamo chë cha

yochjá luaroye bēnga ndoñe montsobena jama ca?

²³ Chora Jesús tojanéyana: —Tšēngaftanga quem luaroquēnga šmondmēna; atšna tsbananocá, celocá sēndmēna. Tšēngaftanga nŷe quem luarama enójuabnayēnga šmondmēna, pero atše ndoñe. ²⁴ Chíyeca atše chca tcbonjáuyana, chē “tšēngaftangbe bacna soyēngama ndēperdonánēnga šmochanjóbana ca”. Er, nda atše ndegombre bétsemnama ndoñe chašmontsošbuachese, tšēngaftangbe bacna soyēngama ndēperdonánēnga šmochanjóbana ca.

²⁵ Chora chēnga tmojantjá: —¿As aca ndase cmēna ca?

Y Jesús tojanéyana: —Entšanga jabuátambama sēnjanbojatsé orscana chama tcbonjáuyana. ²⁶ Atše ba soyēnga sēntsebmoma tšēngaftangbiamajayanama, tšēngaftangbe contra jayanama; pero chē šonjichmó cha nŷetsca soyēngama ndegombre endbésichamo, y atšna ntšamo chábentsana tijouencá, cachcá quem luare oyenēnga sēntsētsētsná ca —cha tojanéyana.

²⁷ Pero chēnga ndoñe tonjanēsertá Jesús cachabe Taitabiamama chca tojanéyanama. ²⁸ As Jesús tojanéyana: —Bēngbe Bētsá Entšá tbojanbemá chašmojatsbaná ora, šmochántsetatšēmbo nda sēndmēná atše bétsemnama. Cachcá, tšēngaftanga šmochántsetatšēmbo, nŷe cach atšbe juábnaca atše tondaye jamama sēndobenama. Nŷe ndayá atšbe Taitá šojabuatēmbacá atše sēndoyebuambná. ²⁹ Y chē šonjichmó cha ndoñe nŷe canŷa quešnátšboshjuana. Chca endmēna, er atše sempre

sëndbétsama ntšamo cha oyejuayá jabemama tojtsemncá ca —Jesús tojánayana.

³⁰ Jesús chca tojánayana ora, banga chábeñe imojtsanošbuaché.

Bëngbe Bëtsabe básenga y chë nÿe bacna soye jt-samama vida bomnënga

³¹ Chora Jesús, chë chábeñe imojtsošbuaché judiënga tojanéyana: —Ntšamo cbontsëtsëtsnacá tšëngaftanga sempre šmojtsamëse, ndegombre atšbe uatsjëndayënga šmochántsemna. ³² Ntšamo ndegombre yomncá šmochántsetatsëmbo; y ntšamo ndegombre yomncá jtsetatsëmbëse, atsebácanënga šmochántsemna ca.

³³ Chora chënga tmojanjuá: —Bëngna Abrahábentšana entsanga fsëndmëna, y ndocná ndocna te chešnáisishëche nÿe chabiana nÿets tempo jtsoservënama. As, ¿ndáyeca šcojtsëtsëtsná bënga atsebácanënga fchtsemna ca?

³⁴ Chora Jesús tojanéyana: —Ndegombre šcuayana: Nda bacna soyënga tojtsama, cha nÿe bacna soyënga jamama juabnëngaca mandaná jëftsemnana. ³⁵ Canÿe oservená ndoñe nÿets tempo chë pamillentšá ntjëftsemnana, ntšamo canÿe uaquiñá sempre chë pamillentšá jesomñancá. ³⁶ Y chca, Bëngbe Bëtsabe Uaquiñá chacmojátsebacase, tšëngaftanga ndegombre atsebácanënga šmochántsemna bacna soyënga juabnënguentsana. ³⁷ Atšë sëndëtatšëmbo tšëngaftangna Abrahábentšana entsanga šmomnama; pero tšëngaftanga šmontseboše atšë jóbama, ntšamo atšë cbontsëtsëtsnacá ainaniñe jóyëngacñama ndoñe quešmátsboše causa.

³⁸ Ntšamo atšbe Taitábioca tijinýcá, cach soyëngama atše sëntsoyebuambná. Tšëngaftángnaca, cachcá ntšamo tšëngaftangbe taitábentšana šmojouencá šmotsama ca –tojanéyana.

³⁹ Chora chënga tmojanjuá: –Bëngbe uámana bëts taitá, Abraham endmëna ca.

As Jesús tojanéyana: –Tšëngaftanga Abrahambe básenga ca jtsabáinama merecido šmojtsebuajónëse, chë ntšamo Abraham tojëftsema y cachcá tšëngaftanga šmattsama.

⁴⁰ Atšna ntšamo ndegombre yomncá sëndoyebuambná, ntšamo Bëngbe Bëtsábentšana tsouenancá. Pero mora tšëngaftanga šmontseboše atše jóbama; Abraham ndocna te chca chenausobuachjanguá. ⁴¹ Tšëngaftangna, ntšamo tšëngaftangbe taitá tojëftsemcá y cachcá jtsamana ca –Jesús tojánayana.

Chora chënga tmojanianyana: –Bënga nýe enaquécana básenga ndoñe queftsátsmëna. Chë nýe canýe taitá fsëndbomná, Bëngbe Bëtsá endmëna ca.

⁴² Chora Jesús tojanéyana: –Bëngbe Bëtsá ndegombre tšëngaftangbe taitá tojtsemnëse, tšëngaftangna atše šmattsebobonshana. Er atšna, Bëngbe Bëtsábiocana sënjabo y muentše sëntsemna. Nýe atšbe ponto ndoñe chiyátabo; Bëngbe Bëtsá šonjichmó. ⁴³ ¿Ndáyeca tšëngaftanga ndoñe šmotsobena atšbe palabrënga josértana? Co, ntšamo cbontsëtsësnacá joyeunayama ndoñe quešmátsboše causa chca. ⁴⁴ Tšëngaftangbe taitá Satanás endmëna. Tšëngaftangna chabe entšanga šmondmëna; chíyeca, tšëngaftanga šmontseboše jamama cachcá ntšamo cha tojtsebošcá. Quem

luare jobojátšama orscana, Satanás entšá obanayá endmëna. Satanasbe juabnoca, ndocna tšabe soyënga ni ndegombre soyënga ntsebínÿnana. Chíyeca, ndocna te cha ntšamo ndegombre yomncá ntsamana. Cha canÿe bostero endmëna, y chábentšana nÿetsca bostero soyënga jtsóbocanana. Chíyeca, cha tojtsebostero ora, nÿe ntšamo cachá yomnama jtsichámuana. ⁴⁵ Atšna sempre ntšamo ndegombre yomncá cbondutsëtsná; chíyeca, chë séntsichamo soyiñe tšëngaftanga ndoñe quešmatošbuaché. ⁴⁶ ¿Nda tšëngaftanguentšá nanjobenaye jinÿanÿiyana atše ndaye bacna soye tijamama? Y atše, nÿe ntšamo ndegombre yomncá stsichámëse, ¿ndáyeca chë tijayaniñe ndoñe šmontsošbuaché? ⁴⁷ Nda Bëngbe Bëtsabe entšá tomna, ntšamo Bëngbe Bëtsá tojtsichamcá jtsuenanana. Pero tšëngaftangna ndoñe Bëngbe Bëtsabe entšanga quešmátsmëna. Chíyeca, ntšamo Bëngbe Bëtsá entsichamcá ndoñe quešmátsboše jouenama ca —Jesús tojanéyana.

Cristo Abrahambiana más natsana ya yojtsemna

⁴⁸ Chora chë judiënga tmojanianana: —Ajá, bënga co ndegombre fstsichamo, aca nÿe samaritano y bacna bayëjbe juabna uambayá comna ca fst-sichamo ora ca.

⁴⁹ Y Jesús tojanéjua: —Atše ni mo canÿe bayëjbe juabna quetsatambá. Ntšamo atše séntsamcá, endmëna jinÿanÿiyama atšbe Taitá Bëngbe Bëtsá uamaná yomnama; pero tšëngaftangna, atše chca tsmënana ndoñe quešmatinÿinÿná. ⁵⁰ Atše ndoñe quetsátsboše ínÿenga atše más uamaná chašmobemama. Pero inÿa endmëna; cha aíñe

endboše atše bĕtsá bĕtsemnama chaminĵanĵema. Y chánaca endmĕna chĕ ínĵengbiana tšabá o ndoñe tšabá tmonsamama endbetsichamuá. ⁵¹ Ndegombre šcuayana, nda ntšamo atše sĕntsichamcá tojouena y chca tojama, ndocna te queochatóbana ca —Jesús tojánayana.

⁵² Chora chĕ judiĕnga tmojaniana: — Mora cocayé fsĕntsetatšĕmbo aca ndegombre bacna bayĕjbe juabna uambayá comnama. Abraham tojanóbana, y cachcá, nĵetscanga Bĕngbe Bĕtsabe juabna oyebuambnayĕngnaca. ¿Y mora aca cochjátichamo, “Nda ntšamo atše sĕntsichamcá tojouena y chca tojama, cha ndocna te queochatóbana ca”? ⁵³ ¿O aca, bĕngbe bĕts taitá Abrahambiana más bĕtsá comna? Cha tojanóbana, y Bĕngbe Bĕtsabe juabna oyebuambnayĕngnaca. ¿Ndase cojátsmĕna ca aca cojatsjuabná ca? —chĕnga imojtsichamo.

⁵⁴ Chora Jesús tojanĕjua: —Atše nĵe cach atše más bĕtsá stsenobiamnasna, chĕ soye tondaye nantsámána. Pero chĕ más bĕtsá šojtsebianná cha, atšbe Taitá endmĕna, cach ndabiana tšĕngaftanga šmondbĕtsichamo tšĕngaftangbe Bĕtsá canmĕna ca.

⁵⁵ Pero tšĕngaftanga cha ndoñe quešmatábuatma; atše aíñe. Y atše, “cha ndoñe quetsatabuatma ca” stsichámĕse, átšnaca cach tšĕngaftangcá canĵe bostero stsemna. Pero ndegombre atše cha sĕnduábuatma, y ntšamo cha tojtsichamcá, atše sĕndouenana y cachcá sĕndbĕtsama. ⁵⁶ Tšĕngaftangbe uámána bĕts taitá Abraham, chĕ atše jabama te jinĵama yojtsejuabnaye ora, puerte oyejuayá yojtsemna. Y pronto tojĕftsaninĵe, y puerte tojanoyejuá ca —Jesús tojánayana.

⁵⁷ Chora chë judiënga tmojaninyana: —Aca cabá ndoñe shachna bnëtsana uata quecátsbomna; y as, ¿ntšamo cochjátichamo, Abraham tcojëftsinye ca?

⁵⁸ Chora Jesús tojanējua: —Ndegombre cbëyana, Abraham cabá ndoñe ainá quenjatsmëna ora, atše ya sënjetsemna ca.

⁵⁹ Jesús chca tojanējua ora, chënga ndëtšbenga tmojanájaca cha jtsatëchënganama. Pero Jesusna oitanánana, Bëngbe Bëtsabe bëts yebnentsana tojésanbocna.

9

Jesús tojanma, canye boyabása jtaná onýnaná chabuabínýnama

¹ Canye luarëjana yojsachnëjuana ora, Jesús canye boyabásabioye tbojáninye. Chë boyabásana jtaná inónýna. ² Chë uatsjéndayënga Jesús tmojan-tjá: —Buatëmbayá, ¿ndáyeca quem boyabása jtaná inónýna? ¿Camuá bacna soyënga tojamama, o chabe bëtsëtsangbe bacna soyënga causa ca?

³ Chora Jesús tojanējua: —Ni cachabe bacna soyëngama, y ni chabe bëtsëtsangbe bacna soyënga causa. Chca endmëna ndayá entsanga jinýanýiyama ntšamo Bëngbe Bëtsá yobencá.

⁴ Cabá yojsësháchena ora, šontsamna jamana ntšamo chë šonjichmó cha yojtsebošcá. Ndoñe usháchena tempo echanjóshjango; chora ndocná tondaye jamama queochatobenaye. ⁵ Quem luariñe chjëftsemnëntscuana, atše quem luare entsangbe juabnënga binýnayá chanjëftsemna ca—tojanëyana.

⁶ Chca tojánayanentshana, Jesús fshantsiñe tojanbuashëtjo, y chë yebuáyeca batsá ngüiche tojábema, y chë jtaná chë ngüicheca tbojanbucharëtjo. ⁷ Chora chë jtaná tbojaniyana: —Motsa y metsobúchjabebiyé, chë binche uafjajónaye entsangbe pormániñe, Siloé ca uabáiniyoca ca. (Siloé, judiëngbe biyañe endayana “Ichmoná ca”.)

Y chë jtaná tojana; choca yojetsobúchjabebiyé, y yebnoye tojtaná ora, ya ibojtsabinýna. ⁸ Chë juachañe oyenënga y chë jtaná tempo lemošna otjanañana tmojáninýënga, imojtsentjanaye: —¿Mua ndoñe yondmëna chë enjanamana jótbemana lemošna jótjañama ca?

⁹ Inýënga imojtsichamo: —Cha entsemna ca.

Y ínýënga: —Cha ndoñe quenátsmëna, pero chacá entsábona ca.

Y cach shnaná yojtsichamo: —Atše cha sëndmëna ca.

¹⁰ As chë entsanga tmojantjá: —¿Ntsamo chca mora cmojtsabinýna ca?

¹¹ Y cha tojanējua: —Chë boyabása, Jesús ca uabainá, ngüiche yebuáyeca tonjábema, šonjabucharëtjo y šonjauyana: “Motsa y Siloé uafjajónayiñe metsobúchjabebiyé ca”. Chcasna, atše sënjá, sënjetsobúchjabebiyé y cachora šontsabinýna ca.

¹² Chora chënga tmojantjá: —¿Ndayentše cha yojtsemna ca?

Y chana: —Atše ndoñe quetsátstatšëmbo ca — tojanējua.

Chë jtana shnanábioye fariseunga imojtsetjanaye

13 Chora chë entsanga, chë jtaná inamná fariseúngbioye tmojanánatse. 14 Chë Jesús batsá yebuáyeca ngüiche tojánbema, y chë jtaná tojanma te, canýe ochnayté inamna. 15 As chë fariseunga chë boyabása tmojantjá: —¿Ntšámoyeca mora cmojtsabinýna ca?

Chora cha tojanějua: —Cha ngüiche yebuáyeca tonjábema y šonjabuchanětjo. Sënjetsobúchjabebiyé, y cachora šonjuabinýna ca.

16 As chora básefta fariseunga imojtsichamo: — Chë jtaná chabotsabinýnama tojamá ndoñe tonjochná, y ochnayté tojatrabajá. Chíyeca cha Bëngbe Bëtsabe entsá ndoñe quenátsmëna ca.

Inýenga imojtsichamo: —Cha canýe bacna soyënga amá tojtsemnëse, ¿ntšamo nantsobena canýe bëts soye Bëngbe Bëtsabe obenánaca jamama ca?

Y chca, ínýenga Jesusbe pavor imojtsemna, y ínýengna chabe contra. 17 Chama chënga cachiñe chë jtaná inamná tmojtëtantjá: —Er aca mora chacmotsabinýnama cha tojamëse, ¿chabiamá ntšamo catjayana ca?

Chora cha tojanějua: —Chana canýa Bëngbe Bëtsabe juabna oyebuambnayá entsemna ca.

18 Pero chë judiënga ndoñe montsanošbuaché, cha chë jtaná inamnama y chora ibojtsabinýnama. As chënga, ínýenga tmojanichamó chë boyabásabe bëtsëtsata jobiatsama. 19 Chë bëtsëtsata tbojánashjango ora, chë judiënga tmojanatjá: — ¿Quem boyabása tsëndatbe uaquiñá yomna ca? ¿Ndegombre tašojtsichamo cha jtaná inonýnama? Chcase, ¿ntšamo mora cha ibojtsabinýna ca?

20 Chora chë bëtsëtsata tmojanëjua: — Aíñe fsëndëtatsëmbo cha bëndatbe uaquiñá endmënama y jtaná tonjanonýnama. ²¹ Pero ndoñe queftsátstatsëmbo ntšámoyeca mora chca ibojtsabinýnama, ni bëndatbe uaquiñá chabotsabinýnama nda tojamama cach ndoñe. Cachá motjanga. Ya bëtsá entsemna, y cachá entsobena tšëngaftanga razón jatšatayama ca — chata tbojánayana.

22 Tempo, chë judiënga imojenóyeunaye, chëngbe enefjuana yebnënguentsana jtëbuacanana chë Jesús ndegombre chë Uámana Uabuayaná, chë Cristo yojamna ca tmojayanënga. Chë bëtsëtsatna chama ibojtsauatja; ²³ chíyeca tmojanëyana: “Cha ya bëtsá entsemna. Cachá motjanga ca”.

24 As cachiñe chë judiënga chë jtaná inamná tmojanchembo y tmojaniyana: —Bëngbe Bëtsabe delante cach acbiamana ndegombre mobuambá. Bënga fsëndëtatsëmbo chë boyabása canye bacna soyënga amá yomnama ca.

25 Chora cha tojanëjua: —Cha canye bacna soyënga amá o ndoñe tondmënama, atše ndoñe quetsátstatsëmbo. Atše nýe mëntšá sëntsetatsëmbo: Atše jtaná sënjanmëna, pero mora šontsabinýna ca.

26 Chora chënga cachiñe tmojatantjá: — ¿Ntšamo tcmënjama? ¿Ntšamo cha tënjama chacmotsabinýnama ca?

27 Y cha tojanëjua: —Ya tcbonjáuyana y ndoñe chešmatoyeuná. ¿Ndáyeca cachiñe šmojtseboše jatuenama? ¿Tšëngaftángnaca šmojtseboše chabe ústonënga jtsemnama ca?

28 Chora chënga cha tmojtsanóyenguango y tmojaniyana: —Acna canye chabe ustoná cojtsemna, pero bënga ndoñe; bëngna Moisesbe ústonënga fsëndmëna. 29 Bënga fsëndétatšëmbo, Bëngbe Bëtsá Moisésbioye tbojanatsëtsama, pero chë boyabásabiama ndoñe queftsátstatšëmbo ni mo ndëmocana cha tojabama ca —chënga imojtsichamo.

30 Chora chë boyabása tojanëjua: —¡Ntšamo chca nántsemna! Tšëngaftanga ndoñe šmontsetátšëmbo ndëmocana cha tojabama; pero chašuabinýnama cha tonjama. 31 Bënga tšabá mondétatšëmbo, bacna soyënga amënga Bëngbe Bëtsá ndoñe queondbátayaunanama. Chana, nýe chábioye adorayá y ntšamo cha tojtsebošcá amábioye joyeunayana. 32 Quem luare jobojátšama orscana ndocna te quenaisótatšëmbo canye jtaná onýnanabiama ndánaca cha chabotsabinýnama tojëftsemama. 33 Quem boyabása, Bëngbe Bëtsabe ichmoná chabe soyënga jamama ndoñe tontsemnëse, tondaye nantsobena jamama ca —chë entšá tojánayana.

34 As chë fariseunga tmojaniyana: —¡Ndayá! Aca tcojanonýná orscana, corente bacna soyënga amá tcomnëse, ¿ntšamo mora bënga šcochjátabatambaye ca?

Y chora chë judiëngbe enefjuana yebnentsana cha tmojtanábocna.

Chë Bëngbe Bëtsabe soyëngama mo jtanëngcá imomnënga

35 Chë jtaná tmojtanábocnama Jesús tojanuena ora, tojána cha janguanguama. Tbojáninýena

ora tbojanियana: —¿Aca Bëngbe Bëtsá Entśá tbojanbemábeñe quecojtsošbuaché ca?

³⁶ Y cha tbojanjuá: —¿Taita, nda cha yojtsemna, as atše chábeñe jtsošbuáchiyama ca?

³⁷ As Jesús tbojanियana: —Aca ya tconjinýe; chë ácaftaca entsoyebuambná cha entsemna ca.

³⁸ Chora, chë boyabása Jesús bentše tojanoshamentśé jëtschuayama y tbojanियana: —Atšbe Utabná, aíñe sëntsošbuaché ca.

³⁹ Chora Jesús chë entšanga tojanéyana: —Atše quem luaroye tijabo ndayá entšanga jinýanýiyama ntšamo cachënga Bëngbe Bëtsabe soyëngama imojuabnama. Chë Bëngbe Bëtsabe soyëngama ndosertánënga, chë soyënga atše chanjínýanýiye ora, mo jtanëna shnanëngcá mochántsemna; y chë Bëngbe Bëtsabe soyëngama corente imotátšëmbo ca juabnayënga chanjínýanýiye, nýe batsá Bëngbe Bëtsabe soyëngama imotatšëmbuama. Y chca, chënga, masna mo jtanëngcá mochántsemna y ndoñe mo chë jinýama obenëngcá.

⁴⁰ Básefta fariseunga Jesúseftaca imojtsemnënga chca tmojanuena ora, cha tmojanियana: —Ndegombre bënga ndoñe mo jtanëngcá queftsátsmëna ca.

⁴¹ Chora Jesús tojanéjua: —Tšëngaftanga Bëngbe Bëtsabe soyëngama ndëtatsëmbënga šmojtsemna ca, y ndegombre chë soyëngama ndoñe cmontsësertana ca šmojobuambase, ndayá šmojtsamcá Bëngbe Bëtsá mo bacna soyënga cuenta ndoñe queochátönýaye. Pero tšëngaftanga corente Bëngbe Bëtsabe soyëngama cmojtsësertana ca šmojtsichámësna, Bëngbe Bëtsá

ndoñe queochatobenaye tšëngaftangbe bacna soyëngama jáperdonana ca —Jesús tojanëyana.

10

Chë oveshënga abujënyä y chabe oveshënga

¹ As Jesús tojanëyana: “Ndegombre šcuayana: Nda chë oveshëngbe luaroye bësášajana ndoñe tonjámashëngo, pero aínë inÿajana tojtsamáshëngo, chana canÿe atbëbaná y abacayá jtsemnana. ² Pero chë bësášajana tojamashënguana, chë oveshënga anÿená jtsemnana. ³ Chë bësáša ebtafjuaná, chë bësáša jebëtafjuana, y chë oveshënga abujënyä ntšamo cada ona tmabaincá chë oveshënga jáchembuana. Y chë oveshënga jtsetatsëmbuana chëngbe abujënyä yojtsachembuanama; y chë luarentšana cha jubuacnana. ⁴ Nÿetsca oveshënga tmojábocana ora, chë abujënyä chënga jtsebënatsanana, y chë oveshënga jtséstonana, er chabe oyebuambnayana chënga joyátëmbana. ⁵ Pero chë tmonduabuatmábioyna chë oveshënga ndoñe ntjuastana; nÿe chábentšana jtsachetëngana, chë oveshënga chabe oyebuambnayana ndoñe ntjoyátëmbana causa ca” —Jesús tojánayana.

⁶ Jesús entšanga chca tonjanacuntá, pero chënga ndoñe ntjosértana ntšamo yojtsentšayancá.

Jesús, chë oveshënga tsabe abujënyä

⁷ As Jesús cachiñe tojanëyana: “Ndegombre cbëyana: Atše sëndmëna chë bësáša oveshënga mondbétsamashjuanëjana. ⁸ Nÿetscanga chë atšbe natsana tmojánabënga, atbëbanënga y abacayënga imnamna, pero chë oveshënga ndoñe chëngbioye ntjóyaunayana. ⁹ Atše chë bësáša sëndmëna. Nda

quem bësháshajana tojamashënguá, atsbocaná echántsemna. Canye oveshá jamashënguana y jabocnana, y shácuana jónyēnana. Cachcá, chē quemējana tojamashënguá, lempe echanjónyēna.

¹⁰ “Chē atbēbaná jabana nye jatbēbama, jóbama y lempe jtsepochoćama; pero atšna, entšanga vida chamotsebomnama y átšeftaca bētscá tšabe vida chamotsebomnama tijabo.

¹¹ “Atše sēndmēna chē oveshēnga tšabe abuaijēnyā. Chē oveshēnga tšabe abuaijēnyā sempre jtseprontánana chēngbiama jóbanama, chabe oveshēnga ababuányēshanayeca. ¹² Pero nda nye crocenánama totrabája y chē oveshēnga ndoñe chábenga tmontsemna, cha nderado tojinye canye tjañe queše chē oveshēngbioye tojtsobécocnama, cachora nye cachcá jesēnyāyana y jtsachana. Chē tjañe queše oveshēnga jtsacamiyana, y chē oveshēngna nye cátoye jtsachetana. ¹³ Cha jtsemnana nye crocenánama trabajayá; chabiama nye chē uacanáana más uámana soye jtsemnana, y chē oveshēngbiama tondayana ntsentšamnana; chíyeca cha jtsachana.

¹⁴ “Atše sēndmēna chē oveshēnga tšabe abuaijēnyā. Atše chēnga sēndēubuatma, y chēngnaca atše šmonduábuatma. ¹⁵ Cachcá, chē Taitá Bēngbe Bētsá atše šonduábuatma y atše chábioye. Atše sempre sēndétseprontana jóbanama, atšbe oveshēnga sēndababuanyēshánayeca. ¹⁶ Atše inye oveshēnga sēndábamna, pero chēnga ndoñe quem luariñe oveshēnga quemátsmēna. Atše šontsemna chēngnaca moye junatsana. Chēngnaca atšbe oyebuambnayana

mochanjouena, y muentša oveshëngaftaca cányiñe mochántsemna, y atšna nyetsca chë oveshëngbiana chë abuañjënña chántsemna.

¹⁷“Atše sempre sëndétseprontana jóbanama, chora jtayenama. Chíyeca chë Taitá šondbobonshana.

¹⁸ Ndocná atšbe vida quešochatsbojuána, pero chënga sëndababuanÿeshánayeca sempre sëndétseprontana jóbanama, cach atše chca sëndbošeyeca. Derecho sëndétsóbomñe chëngbiana jóbanama, y chora jtayenama. Chca endmëna ntšamo atšbe Taitá šonjamandacá ca” —Jesús tojánayana.

¹⁹ Chë soyënga chë judiënga tmojanuena ora, cachiñe banga Jesusbe contra y ínÿengna Jesusbe pavor imojtsemna. ²⁰ Banga imojtsichamo: — Chana bacna bayëjbe juabna uambayá y corente juicio ndbomná entsemna. Y as ¿ndáyeca cha mochjátsyeunana ca?

²¹ Pero ínÿengna imojtsanichamo: —Ndocna bacna bayëjbe juabna uambayá ntso benana chca jóyebuambayama. ¿Canÿe bayëja nantsobena jamama canÿe jtaná chabotsabinÿnama ca?

Chë judiënga ndoñe imontsošbuáchiye Jesús Bëngbe Bëtsabe Uaquiñá bëtsemnama

²² Canÿe uaftena tempo inamna, y Jerusalenentše canÿe fiesta imojtsebomna. Chë fiesta inamna cada uata, Bëngbe Bëtsabe bët yebna tempo cachiñe tmojtanjebuama entšanga jtenójuaboyama. ²³ Jesús Bëngbe Bëtsabe bët yebnoca yojétsana, canÿe amashjuana otsbojebniñe, Salomonbe Amashjuana ca uabáinentše. ²⁴ Chora, chë judiënga tmojanóbobuashcona, y tmojantjá:

—¿Buetaytentscuana bēnga fchjēftsemna acbiama ndegombre soye ntsetatsēmbcá? Aca chē Cristo cojtsemnēse, chama lempe tšabá šmanyanýé ca.

²⁵ As Jesús tojanējua: —Ya tcbonjáuyana y tšēngaftanga átšbeñe ndoñe ntsošbuáchiyana. Chē atše sēndama soyēnga, atšbe Taitá Bēngbe Bētsabe obenánaca, cmontsinyanýná nda atše bétsemnana. ²⁶ Pero tšēngaftanga átšbeñe ndoñe quešmatošbuaché, er tšēngaftanga atše ndoñe quešmatēstona, ntšamo chē oveshēnga chē tšabe abujējya mondbetsēstoncá. ²⁷ Chē atše šmondústonēnga, atše šmondbóyeunaye y šmondbēuasto. Atše chēnga sēndēubuatma. ²⁸ Atše chanjama, quem entsānga chē nyetsca tescama yomna tšabe vida chamotsebomnama; chēnga ndocna te pochocánēnga quemochátsmēna, y ndocná quenátobena átšbentsana chēnga jefcana. ²⁹ Atšbe Taitá Bēngbe Bētsá, chē entsānga atše chašmuastama tojamá, nyetscangbiana más bētsá endmēna, chíyeca ndocná quenátobena chábentsana chēnga jefcana. ³⁰ Chē Taitá y atše canya fsēndmēna ca —Jesús tojánayana.

³¹ Chora, chē judiēnga cachiñe ndētsbenga tmojanájaca Jesús jtsatēchēnganjama. ³² Pero Jesús tojanējyana: —Atše tšēngaftangbeñe, ba bēts soyēnga sēnjama atšbe Taitá Bēngbe Bētsabe obenánaca. ¿Ndēmua chentša soyama atše šmochtsatēchēnganja ca?

³³ Chora chē judiēnga tmojanjuá: —Ni canye quem bēts soyēngama bēnga queftsátsboše aca jtsatēchēnganjama. Aca Bēngbe Bētsabiana ndoñe tšabá quecátichamo; mo chábioye

cuafjoyenguangcá entsemna. Aca nýe canýe entśá condmēna, pero acna contsichamo cach aca Bēngbe Bētsá comna ca; chíyeca bēnga fsēntseboše ndētsbēngaca aca jtsatēchénganjama ca —chénga tmojaníyana.

³⁴ Chora Jesús tojanéyana: —Bēngbe Bētsabe uabemana palabrénguiñe mēntśá endayana: “Atše sēnjayana tšēngaftanga diosēnga šmomna ca.” ³⁵ Bēngbe Bētsá chca tojánayana chē chabe palábraca y cha chamotseservénama tojánamandangbiamá; ndocná quenátobena jinýanýiyana ni mo canýe soye Bēngbe Bētsabe uabemana palabrénguiñe, ndoñe ndegombre soye yomnama. ³⁶ Y atśbiamá, Bēngbe Bētsabiacá uabuayaná y quem luare ichmoná, ¿ntśamo tšēngaftanga šmojtsoyobena jayanama, “aca Bēngbe Bētsabiamá ndoñe tśabá quecátichamo ca”, chē Bēngbe Bētsabe Uaquiñá sēndmēna ca atše tijayanama? ³⁷ Ntśamo atśbe Taitá endamcá atše ndoñe sēntsamēse, tšēngaftanga átśbeñe ndoñe šmattsošbuáchiye. ³⁸ Pero, ntśamo atśbe Taitá endamcá atše aíñe stsamēse, masque ndoñe átśbeñe šmontsošbuaché, nýe chē Taitabe obenánaca soyēnga tijamama šmochtsošbuáchiye. As, canýe ora chašmotsetátśēmo y chacmēsertá, chē Taitá átśbeñe yomnama y atše chábeñe tsmēnama ca —Jesús tojanéyana.

³⁹ Chora chēnga cachiñe tmojánbošena Jesús jishachama, pero cha chēngbentśana tojanots-bocá.

⁴⁰ Chentśana, Jesús Jordán bėjaye chenguana tojesaná y choca tojtsanoquedañe. Chentše Juan tempo entśanga yojanēbáyana. ⁴¹ Ba

entsanga tmojána Jesús jinýama, y mēntšá imojtsichamo: “Ndegombre, masque Juan ni mo canýe bēts soye Bēngbe Bētsabe obenánaca tonjéftsema, lempe ntšamo quem boyabásabiama tonjanoyebuambacá, ndegombre yojamna ca.”⁴² Y chentše, ba entsanga Jesúsbeñe imojtsanošbuaché.

11

Lázaro tojanóbana

¹ Inamna canýe boyabása šocá, Lázaro ca uabainá. Cha inoyena canýe pueblo Betania ca uabáinentše, Marta y Mariáftaca, chabe uabénata.

² Quem María inamna nda Bēngbe Utabná Jesúsbe shecuatšíñe botamana uanguētsiye tbojanáshecbuešcja, y chabe stjēnashaca tbojtanshecbojó cha. ³ Chē uta uabénatna ínýenga tmojanichamó Jesús jauenayama: —Bēngbe Utabná, chē aca condbobonshaná šocá entsemna ca.

⁴ Jesús chca tojanuena ora, tojánayana: —Quem šocana ndoñe quenátsmēna Lázaro chaóbanama. Pero aíñe entsemna Bēngbe Bētsabe obenana entsanga jinýanýiyama, y Bēngbe Bētsabe Uaquiñá chamuatschuama ca.

⁵ Jesús corente yojánababuanýeshana Marta, María y chatbe uaftše Lázaro. ⁶ Masque chcasna, Lázaro šocá yojtsemna ca Jesús tmojaníyana ora, cabá uta te más cha yojétsemna luarentše tojtsanoquedañe. ⁷ Chentšana, chabe uatsjéndayēnga tojanéyana: —Judeoye cachiñe cuajna ca.

8 As chë uatsjéndayënga tmojanianyana: — Buatëmbayá, baseftayté entsemna chë luaroca judiënga cmonjanbuachetá ndëtsbéngaca jtsóbama; y mora, ¿cabá choye jtésama cojtseboše ca?

9-10 Chora Jesús tojanëyana: —Bnëtsana uta hora bnëtë endmëna. Nda bnëtë tojtsana, ndoñe ntjojéstjiana, binÿniñe bëtsemnayeca. Cachcá átseftaca endmëna, tondaye quenátopodena átseftaca jopásana, atše jóbanama cabá ndoñe tonjobuache ora. Pero ibeta tojtsanëse, cha jtsojéstjiana, ndoñe binÿniñe causa. Cachcá, bënga šontsamna yojtsësháchenëntscuana jatrabájana. Atšbe jóbanama tempo chaojóshjango ora, ya ndoñe queochátëshachena jatrabájama ca —tojánayana.

11 Chentšana tojanëyana: —Bëngbe amigo Lázaro tojtsomaná, pero atše choye chanjá jetsefšenama ca.

12 Chora chë uatsjéndayënga tmojanjuá: —Bëngbe Utabná, tojtsomanase yojtsayana chana tšabá yochtsatsmëna ca.

13 Pero Jesús yojtsanëtsëtsná ndayá Lázaro tojtsanóbana ca, y chabe uatsjéndayëngna imojtsejuabnaye Lázaro ndegombre yojtsomáñama.

14 As Jesús tšabá tojanëyana: —Lázaro tontsóbana.

15 Atše sëntsoyejuá choca atše ndoñe tsmënama, tšëngaftangbe tšabiamama chaotsemnana; chca, tšëngaftanga más átšbeñe chašmotsošbuáchema. Pero cuajna cha jinÿyama ca.

16 Chora Tomás, chë Gemelo ca uabobainá, chë inÿe uatsjéndayënga tojanëyana: “Bëngnaca cuajna, cháftaca mochjóbana ca.”

Jesús iuama entsanga chámuatayenama y chë nyetsca tescama yomna tsabe vida chamotsebomnama

¹⁷ Jesús chë béconana tojánashjango ora, tojántatšëmbona Lázaro ya canta te uatbontsána yojtsemnama. ¹⁸ Betania pueblo yojamna Jerusalén béconana, mo unga kilómetroca. ¹⁹ Ba judiënga tmojána Marta y María jautsëtsayama y jatjëmbambayama ndoñe tša ngménaca chabondëtsemnama, chatbe uaftše tojanóbana causa. ²⁰ Jesús yojtsashjajuanama Marta tojántatšëmbona ora, tojánbocna cha jajébenguama, pero María cach yebnentše tojanoquedá.

²¹ Chora Marta Jesúsbioye tbojaniyana: —Bëngbe Utabná, aca muentše macménëse, atšbe uaftše ndoñe matënjóbana. ²² Pero atše séntsetatšëmbo, masque ndayánaca mora Bëngbe Bëtsá chacojotjañe, y cha lempe chca cmochjätšetaye ca.

²³ Y Jesús tbojanjuá: —Acbe uaftše echántayena ca.

²⁴ Chora Marta tbojaniyana: —Aíñe, atše sëndëtatšëmbo cha yochtayenama, pero quem luare jopochócama te, nyetsca obanënga mochtayena ora ca.

²⁵ As Jesús tbojaniyana: —Atše sëndmëna chë entsanga chámuatayenama y chë nyetsca tescama yomna tsabe vida chamotsebomnama endamá. Nda átšbeñe tojtsošbuaché, masque chaóbana, echántayena. ²⁶ Y nda cabá ainá totsomñe y átšbeñe tojtsošbuaché, ndocna te queochatóbana. ¿Chë cbontsatsá soyiñe quecojtsošbuaché ca? —Jesús tbojantjá.

²⁷ Chora Marta tbojaniyana: —Aíñe, Bëngbe Utabná, atše áceñe sëntsošbuaché, aca chë Cristo, chë Bëngbe Bëtsabe Uaquiñá y chë quem luaroye jabamá comnama ca.

Jesús, Lázaro yojtsátbontsana cuevēshentše yojenóbošachna

²⁸ Chca tojánayanentšana, Marta tojtaná chabe quenata María jachembuama, y iytęcana tbojaniyana: “Buatëmbayá tonjášhango y entseboše aca jinýama ca.”

²⁹ María chca tojanuena y cachora tojëftsanbocna y tojána Jesús jinýama. ³⁰ Jesús cabá ndoñe chë puebloye tonjánamashëngo; yojëtsemna Marta tbojanjébingo luarentše. ³¹ Chë yebnentše imojtsemna judiënga, María tša ngménaca ndoñe chaondëtsemnama tjëmbambnayënga, tmojánbocana María juastama; er chë tojëftsantsbaná y tojëftsanbocna ora, chë judiënga imojtsejuabnaye, Lázaro yojtsátbontsana luaroye María yojtsaye, choca jošachnama ca.

³² Jesús yojtsemnentše María tojánashjango ora, chá bentše tojanoshamentšé y tbojaniyana: —Bëngbe Utabná, aca muentše macmënëse, atšbe uaftše ndoñe matënjóbana ca.

³³ María y cháftaca tmojánashhajna judiënga, nýetscanga imojetsenóbošachiye; y Jesús chca tojáninýe ora, corente tbojancochtsetšena ypuerte ngménaca yojtsemna. ³⁴ Chora Jesús tojanatjá: —¿Ndayentše cha šmojuatbontsá ca?

Y chënga tmojanjuá: —Bëngbe Utabná, mabo y cochjinýe ca.

³⁵ Chora Jesús tojánenobošachna. ³⁶ As chë judiënga tmojánayana: —¡Minyënga, tša ibnabobonshana ca!

³⁷ Pero inyë judiënga imojtsichamo: —Chë jtaná chabuabínynama tojamá, ¿tondaye tonjobená jamama, Lázaro ndoñe chaondóbanama ca?

Lázaro tojtanyena

³⁸ Jesús, cachiñe puerte cochtsetšenaná, chë uatbontsánoye tojanobeconá. Chë luarna cuevëshe inamna, y amashjuanentse canyë bëts ndëtsbeca yojtsatámena. ³⁹ Chora Jesús tojanëyana: —Chë ndëtsbé mojuánanga ca.

Chora Marta, chë obanabe uabena tbojaniyana: —Bëngbe Utabná, mora ya bacá yojtsonguëtsé, er ya canta te entsemna cha tontsóbana ca.

⁴⁰ Y Jesús tbojanjuá: —Ndegombre, ya tcbonjauyana, aíñe átsbeñe tcojtsošbuáchese, cochjinyë Bëngbe Bëtsá puerte obená y bëtsá bëtsemnama ca.

⁴¹ Chora chë ndëtsbé tmojanjuaná; Jesús celoye yojontješiyë y Bëngbe Bëtsábioyë tbojaniyana: “Taita, cbatschuá atšbe opresido tcojouenama. ⁴² Atšë sëndétatšëmbo aca sempre šcondbétseyeunanama; atšë chca tcbonjauyana, muentšë montsemna entšangbe tšabiamá, chca, aca atšë šcojichmoma, chënga chamotsošbuáchema ca.”

⁴³ Chca tojánayanentšana, jabuache tojánayana: “¡Lázaro, chentšana matsbocna ca!”

⁴⁴ Y cachora chë obaná tojtanbocna, cucuatšënga y shecuatšënga entšëjuaca batsëcná, y chabe jubiá base entšëjuaca uamochëcyaná. As

Jesús tojanéyana: “Motsejafjoná y jama chaot-sobena ca.”

Chë judiëngbe amëndayënga tmojanenoyeuná Jesúsbiöye jóbama

(Mt 26.1-5; Mc 14.1-2; Lc 22.1-2)

⁴⁵ Chë soyëngama, banga chë judiënguentshana, María jatjëmbabayama tmojánanga, y ntšamo Jesús tojanmcá tmojáninÿënga, Jesúsbeñe imojtsošbuaché. ⁴⁶ Pero inÿe judiënga fariseúngbiöye tmojána, ntšamo Jesús tojanmama chënga jacúntama. ⁴⁷ As, chë fariseunga y chë bachnangbe amëndayënga tmojánenefjna inÿe judiëngbe amëndayëngaftaca, y tmojánayana: —¿Ndayá mochjobenaye cháftaca jamama? Quem boyabása bëts soyënga entsama. ⁴⁸ Nÿe cachcá chamojonÿase, nÿetsca entsanga chábeñe mochantsošbuáchiye; chë romanëngbe amëndayënga mochanjabo y lempe mochantsePOCHÓca, Bëngbe Bëtsabe bëts yebna y bëngbe luare Israel ca —chënga imojtsichamo.

⁴⁹ Pero canÿa chënguentsá, Caifás ca uabainá, chë uata chë bachnangbe más uámana amëndayá inamná, tojanéyana: —Tšëngaftanga tondaye quešmátstatsëmbo. ⁵⁰ Y ndoñe quešmatsjuabná, tšëngaftangbiamá más tšabá yojtsemna nÿe canÿe boyabása Israeloca entsangbiamá chaóbana, y ndoñe nÿets bëngbe luare chamotsePOCHÓca ca —cha tojanéyana.

⁵¹ Pero Caifás chë soye nÿe cachabe juábnaca ndoñe chca tonjánayana. Cha, chë uata chë bachnangbe más uámana amëndayá inámnayeca, Bëngbe Bëtsabe Espíritbe obenánaca tojánayana Jesús

ibojamna Israeloca entsangbiana jóbana ca.
⁵² Y ndoñe nye Israeloca entsangbiana, sinó chë inye luarënguiñe Bëngbe Bëtsabe básenga tmojanáshanënga chamuatábama, as chca, nyetscanga nye canye luarentša entsanga chamotsemnana.
⁵³ Chcasna, cach tescana judiëngbe amëndayënga tmojanenoyeuná Jesús jóbama.

⁵⁴ Chýeca Jesús entsángbeñe, Judea luariñe ya ndoñe yontsana. Chë luarentšana tojéftsanbocna y canye luaroye tojtsanoñe, entsanga ndoyeniñe béconana, canye pueblo Efraín ca uabáinoe. Y chentše chabe uatsjëndayëngaftaca tojtsanoquedañe.

⁵⁵ Judiëngbe Bashco fiestama batśá yojtsájamna, y ba entsanga pueblënguentšana Jerusalenoye imojtsajna, soyënga choca jamama ntšamo tempo inamncá, chca, Bëngbe Bëtsabe bominyama tśábenga jtsemnana, chë Bashco fiesta cabá ndobuache ora. ⁵⁶ Chocna, judiënga Jesús imojtsenguaye, y Bëngbe Bëtsabe bëts yebnentše imojtsentjanaye: “¿Ntšamo šmojtsejuabná, cha tayochjabo o ndoñe quem fiestama ca?”

⁵⁷ Chë fariseunga y chë bachnangbe amëndayënga tmojanmandá, nderado nda Jesús ndayentše tojtsemnana tojtsetatšëmbësna, chaobuambá ca, as Jesús jishachama.

12

*María, botamana uanguëtsiye Jesúsbeñe
 tbojanáshecbuešcja
 (Mt 26.6-13; Mc 14.3-9)*

1 Chnënguana te chë Bashco fiestama yojtsájamna ora, Jesús Betania puebloye tojtaná. Lázaro, chë Jesús tbojtanayená cha, choca inoyena. 2 Chentsna bëts saná Jesusbiana tmojanábua. Marta tojanëjuatšé, y Lázaro yojtsemna chë Jesúseftaca juasama mesëshañe imojtsetbiámanënguentše. 3 As María canÿe jarrëtema tojanaca; chiñe yojanaftsuamna canÿe botamana uanguëtšiyé, bëtscá uámaniye, ena nárdoca pormániye. Chë uanguëtšiyé, María, Jesusbe shecuatšënguiñe tbojanášhecbuešcja, y cachabe stjënashaca tbojtanshecbójó. Chora, chë yebnentše ena nardiyana yojtsonguëtšiyé.

4 Chora, canÿa Jesusbe uatsjendayënguentšá, Judas Iscariote, chë Jesús uayayëngbe cucuatšíñe yochjanayentšbashejuaná, tojánayana: 5 —Quem botamana uanguëtšiyé unga patse denario crocénana enduámana. ¿Ndáyeca ndoñe šmonjuiye y ndbomnjémënga chë crocénana mašmëntsatsátá ca?

6 Pero Judas chca tojánayana, chë ndbomnjémëngbeñe ntsejuabnaycá, sinó cha atbëbaná inamna causa. Judas chëngbe crocénana shecnëšiñe yojánatbëna, y ba soye, chë shecnëšoye imojanatsuáma crocénantšana cha yojánatbëbana.

7 As Jesús tbojanjuá: —Cachcá monÿá. María mëntscoñe chë botamana uanguëtšiyé iuabofjájona, cha jobenayama átšbeñe jabuéšcjama, er ndoñe bën y atše šmochanjaitëme. 8 Chë ndbomnjémëngna tšëngaftangbeñe sempre mochanjesomñe, pero atše ndoñe ca —tojánayana.

Judiënga tmojanenoyeuná Lázaro jóbama

⁹ Ba judiënga tmojántatsëmbona Jesús Betanioca yojtsemnana, y choye tmojána, ndoñe nÿe Jesús jinÿama, sinó Lázarnaca, chë Jesús tbojtanayená cha. ¹⁰ As chë bachnangbe amëndayënga tmojanenoyeuná Lázarnaca jóbama. ¹¹ Chabe causa, ba judiënga chëngbioye cachcá tmojesanënÿa y Jesúsbeñe imojtsošbuaché.

Jesús Jerusalenoye tojánashjango

(Mt 21.1-11; Mc 11.1-11; Lc 19.28-40)

¹² Chë yëfsana, mallajta entsanga, Jerusalenoca fiestama tmojánashjajnënga, tmojántatsëmbona Jesús choye yochjánashjanguama. ¹³ As chëngna palma betiye buacuafjënga tmojanatëtsetse, y Jesús jajébenguama tmojánbocana, y mëntsá imojtsáyebuache: “¡Bëngbe Bëtsá matschuanga! ¡Corente bendición bomná chë Bëngbe Utabnabe obenánaca tojabá! ¡Corente bendición bomná chë Israeloquëngbe Rey ca!”

¹⁴ Jesús canÿe burrotema tbojáninÿena y chábeñe tojanenoyayé. Ntsamo Bëngbe Bëtsabe uabemana palabrënguiñe iuayancá, cachcá tojanopasá. Chiñe mëntsá endayana Jerusalenoca entsangbiama:

¹⁵ Sión bëts puebloca oyenënga, ndoñe matauatjëngana.

Minÿënga, tsëngaftangbe Rey burrotémiñe enjaquená entsabó ca.

¹⁶ Chca orna, Jesusbe uatsjëndayënga chë soyëngama ndoñe tonjanësertá; pero chentsana, Jesús corente bëtsá yomnana Bëngbe Bëtsá tojaninÿanyé ora, chë uatsjëndayënga chama

tmojanenojuabó, lempe ntšamo Běngbe Bětsabe uabemana palabrenguiñe iuayancá y cachcá Jesúseftaca tojanopasama.

¹⁷ Chě Jesúseftaca imojtsemna entšanga, Lázarbioye uatbontsánoye tbojanchembo ora y chentšana tbojtanayená ora, ntšamo tmojáninŷama chora imojtsecuéntaye. ¹⁸ Chíyeca, ba entšanga tmojánbocana Jesús jajébenguama, chě běts soye Běngbe Bětsabe obenánaca cha tojanmama tmojanuénayeca. ¹⁹ Pero chě fariseunga imojtsenatsětsnaye: “Tšěngaftanga šmontsonŷá běnga tondaye jamama quemuátobenama y más, inŷetscanga cha montsěstona ca!”

Básefta Grecia luaroca entšanga Jesús tmojánanguango

²⁰ Bashco fiestama, chě Běngbe Bětsá jadórama Jerusalenoye tmojánangbeñe, básefta griego entšángnaca imojtsemna. ²¹ Chěngna, Felipe chě Galilea luarocá, chě Betsaida pueblócábioye, tmojanobeconá y tmojanimpadá: “Señor, běnga fsěntseboše Jesús jinŷama ca.”

²² Chora Felipe tojána Andrés jauyanama, y chě úatna Jesúsbioye tbojána, chě grieguěngbiamama jauenayama. ²³ Jesús chata tojanéyana: “Chě Běngbe Bětsá Entšá tbojanbemá corente bětsá yomnama jinŷanŷiyama te ya tocjobuache. ²⁴ Ndegombre šcuayana: Canŷe trigo jénaye ndoñe fshantsiñe tmonjuatbontsá y ndoñe tonjóbaněse, nŷe cach canŷe trigo jénaye jesomñana. Pero tmojuatbontsá y tojóbanase, bětscá jashájonana. ²⁵ Cachcá, nda nŷe cachá tojtsenóbobonshana, cha chabe vida echanjěftsobuetše. Pero

nda nÿe cachá ndoñe tontsenóbobonshana y ntšamo atše stsemandacá, quem luariñe vida tojtsebomnëntscuana cha tojtsamëse, chë nÿetsca tescama yomna tšabe vida echántsebomna. ²⁶ Nda ntšamo stsemandacá jamama tojtseboše, atše chašotsěstona. Chca, ndayentše atše chaitsemna, chánaca, chë atše oservená, chentše chaotsemna. Atše šojtseservénabiamá, atšbe Taitá Bëngbe Bětsá echanjínÿanÿiye bětsá yomnama ca” —Jesús tojánayana.

Jesús tojánayana cha yochjanóbanama

²⁷ Y más Jesús tojánayana: “¡Mora tša cochtsetšenaná sěntsemna! ¿Atše chjayana: ‘Taita, chë átšeftaca echanjopása soyënga šmotsebojuaná ca?’ Ndoñe; er más chama atše quem luaroye tijabo. ²⁸ Taita, šminÿanjé aca puerte bětsá y obená comnama ca.”

Y cachora, celocana canÿe oyebuambnayana tojanóbocna mēntšá: “Ya tčbonjinÿanjé atše puerte bětsá y obená tsmēnama, y mora cachiñe cachcá chanjama ca.”

²⁹ Entšanga chca tmojanuena ora, ínÿenga imojtsichamo nÿe tojanjuésase ca; pero ínÿengna imojtsichamo: —Canÿe ángel chábioye tbonjuatsětsá ca.

³⁰ Chora Jesús tojaněyana: —Ntšamo šmonjouencá, atšbiamá ndoñe quenátsmēna, sinó tšëngaftangbiamá. ³¹ Mora chë tempo entsemna, chë quem luare entšanga tmojëftsema bacna soyënga jinÿanÿiyama y chëngbe castiguama jayanama. Y mora, chë nÿetsca bacna soyënga mandayá, quem luarentšana mochantábocna.

³² Pero atše fshantsocana atšbananá chaitsemna

ora, n̄yetsca entšanga átšbioye chanjúbuaja ca —Jesús tojánayana.

³³ Chca cha yojtsichamo, ana jin̄yan̄iyama ntšamo jóbanama ibojamna. ³⁴ Chora ch̄e entšanga tmojanjuá: —Bēngbe Bētsabe uabemana palabrenguiñe endayana, y chíyeca bēnga fsēndētatsēmbo ch̄e Cristo n̄yetsca tescama vida yochtsebomna ca. As, ¿ndáyeca cojtsichamo, Bēngbe Bētsá Entšá tbojanbemá chamuatsbanama yojtsemna ca? ¿Nda yojtsemna Bēngbe Bētsá Entšá tbojanbemá ca? —chēnga imojtsichamo.

³⁵ Y Jesús tojanēyana: —N̄ye baseftatescama ch̄e entšangbe juabnēnga bin̄ynayá tšēngaftangbeñe entsemna. Ch̄e bin̄ynayá cabá tšēngaftangbeñe yojtsemnēntscuana, cháftaca šmochtsajna. Chca, mo ibetiñcá ndoñe quešmochátajna. Nda ndoñe bin̄yniñe tojtsana, cha ndoñe ntsetatsēmbuana ndēmuajana yojtsana. ³⁶ Ch̄e bin̄ynayá cabá tšēngaftangaftaca endētsemnēntscuana, chábeñe šmochtsošbuáchiye; as, tšēngaftangbe juabnēnga bin̄yniñe echántsemna ca —Jesús tojánayana.

Ch̄e soyēnga tojánayanentšana, Jesús tojtsanoñe y entšangbiama yojetsóitana.

Ndáyeca ch̄e judiēnga Jesúsbeñe ndoñe montsanošbuaché

³⁷ Masque Jesús, judiēngbe delante ba bēts soyēnga Bēngbe Bētsabe obenánaca tojēftsema, chēnga ndoñe chábeñe ntsošbuáchiyana, ³⁸ ntšamo Bēngbe Bētsabe juabna oyebuambnayá Isaías tojanabemcá, cachcá chaotsemnama. Isaías mēntšá tojánayana:

Bëngbe Utabná, ¿nda bëngbe buayenana soyiñe yojtsošbuaché?

Y ¿nda tbojosertá, acbe obenana tcojinÿinÿé ora ca?

³⁹ Chíyeca chënga ndoñe montsobena Jesúsbeñe jtsošbuáchiyama, er Isaías mëntšánaca tojëftsanabema:

⁴⁰ Bëngbe Bëtsá tojama chënga chabe soyëngama ndoñe botamana chamondëtsejuabnama y chabe soyënga ainaniñe ndoñe chamondóyëngacñama, as ndoñe chaondëtsësertánama ca.

Y Bëngbe Bëtsá entsichamo: “Chca entsemna, chënga atšbe benache ndoñe chamondishachama, y atše ndoñe ntjätsebacama; y chca, chënga mochántsemna mo ndëshnana entšangá ca.”

⁴¹ Isaías chca tojánayana, er tojáninÿe Jesús puerte bëtsá y obená yojannama, y chca chë uabemaniñe Jesusbiana yojanoyebuambná.

⁴² Pero masque chca iuábemanëse, ba judiënga imojtsanošbuaché, y banga judiëngbe amëndayëgnaca Jesúsbeñe imojtsanošbuaché. Pero chëngna, Jesúsbeñe imojtsošbuáchema entšangbeñe ndoñe montsichamo. Chca imojánama chë fariseungbiana auatja causa, chë judiëngbe enefjuana yebnënguentšana ndoñe chamondëtëbuacnama. ⁴³ Chëngbiana más yojanámana, entšanga chëngbiana chamotsichamo tša uámanënga imojamna ca, y ndoñe, Bëngbe Bëtsá chca chaotsamama.

Jesube palabrëngaca yochtsótatsëmbo entsanga tšabá o ndoñe tšabá tmonjamama

⁴⁴ Chora Jesús mëntšá jabuache tojánayana: “Nda átsbeñe tojtsošbuaché, ndoñe nÿe átsbeñe ntsošbuáchiyana; chë nda šojichmó chábeñnaca cha jtsošbuáchiyana. ⁴⁵ Cachca, nda atše šojtsonÿá, chë šojichmó chábioynaca cha jtsonÿayana. ⁴⁶ Atše quem luaroye tijabo entsangbe juabnënga jabobínÿnama, chca, nda átsbeñe tojtsošbuaché, mo ibetiñcá ndoñe chaondëtsemnama. ⁴⁷ Pero nda atšbe soyëngama tojouena, pero ntšamo sentsichamcá ndoñe tontsama, atše chabiamana ndocá quichátayana tšabá o ndoñe tšabá tonjamaca. Atše ndoñe chiyátabo, ntšamo quem luarentša entsanga tmojamama tšabá o ndoñe tšabá yontsemna ca jatichámuama; quem luaroye sënjabo ndayá chënga jabátsebacama. ⁴⁸ Nda atše šojtsaboté y atšbe palabrëngama ndoñe šonjoyeuná, ya entsebomna nda chabiamana yochjayana bëts castigo jtsebomnama ibojtsemnaca. Atše tijanoyebuambá palabrëngaca, quem luare jopochócama te chabiamana chca echántsayana. ⁴⁹ Er atše ndoñe nÿe atšbe juábnaca quetsatoyebuambná. Chë Taitá, chë šonjichmó cha, šonjamandá ntšamo jayanana y ndayá jabuátambana. ⁵⁰ Atše sëndétatsëmbo, atšbe Taitá tojamandá orna, cha jamándana entsanga chë nÿetsca tescama yomna tšabe vida chamotsebomnama. Chíyeca, ndayá sentsichamcá, endmëna ntšamo atšbe Taitá Bëngbe Bëtsá šojamandacá ca” —Jesús tojánayana.

13

Jesús chabe uatsjéndayënga tojanashecjabebé

¹ Bashco fiesta cabá ndobuache ora, Jesús yojtsetátšëmbo chabe tempo tojanóshjanguama, quem luarentšana jëftseboचना y chabe Taitábioye jtama. Ntšamo Jesús chábenga yojanababuanjeshancá, chë quem luare imojamnënga, chórna yojtseboše chë bëts bonshánana puerte más jinyanjyana.

² Pero Satanás, Júdasbe ainaniñe bacna juabnënga tojanjajó, uayayëngbe cucuatšine Jesús jayentšbáshejuanama. Judas Iscariote, Simonbe uaquiná. ³ Jesús yojtsetátšëmbo chabe Taitá Bëngbe Bëtsá nyets obenana tbojánatšetama. Cachcá, Jesús yojtsetátšëmbo, Bëngbe Bëtsábíocana cha tojánabama y cachábioye jtama ibojtsemnama. ⁴ Chcasna, chë ibeta jasama tmojanpochocá ora, mesëshentšana tojantsbaná, chabe juatsboye uichëtjoníya tojanenátsejca y canye tuallëjua tojanenasná. ⁵ Chentšana, canye bachešine búyeshe tojanbuešcja y tojanontšé chabe uatsjéndayënga jushecjabebiyana y jtëshecbojuana cha yojtsasnana tuallëjuaca.

⁶ Pero, Simón Pedro tbojanobuache ora, Jesúsbioye tbojaniyana: —Atšbe Utabná, ¿aca šcochjuashecjabiá ca?

⁷ Chora Jesús tbojanjuá: —Atše sentsama soye mora ndoñe quecmátësertana; pero más chcoye aïne cmochanjósérta ca.

⁸ As Pedro tbojaniyana: —¡Ndocna te šcatjuashecjabiá ca!

Pero Jesús tbojaniyana: —Ndoñe chacbonjuáshecjabese, atšbia ndoñe quecochátsmëna ca.

⁹ Y Simón Pedro tbojaniyana: —¡Atšbe Utabná, as nÿe atšbe shecuatsënga ndoñe, ndayá atšbe cucuatšënga y bestšásnaca ca!

¹⁰ Pero Jesús tbojanjuá: —Nda bebená tojtsemna, nÿe shecuatše jtsashecjabiama jtsajabótana, ndoñe nÿetšá cachiñe. Nda tojtsobebé, ndoñe tsengá ntsemnana. Cachcá, mo bebënënga cuenta tšëngaftanga šmontsemna; pero canÿa muentše entsemna, y cha mo bebenacá ndoñe quenátsmëna.

¹¹ Jesús yojtsetátšëmbo nda chë uayayëngbe cucuatšïñe boshjuaná yochtsanmënama, chíyeca tojánayana: “Tšëngaftanguentšá canÿa entsemna, cha mo bebenacá ndoñe quenátsmëna ca”.

¹² Jushecjabebiyama tojanpochocá ora, chabe juatsboye uichëtjoníya tojtaníchëtjo, y mesëshentše tojtanótbema. Chora tojanëyana: —¿Chë tcbonjábïama soyama quecmojsësertana ca?

¹³ Tšëngaftanga atše šmondbauyana Buatëmbayá y Bëngbe Utabná ca; tšabá chca šmontsichamo, er atše ndegombre chca sëndmëna.

¹⁴ Atše, tšëngaftangbe Buatëmbayá y Utabná, tcbonjushecjabebé; chcasna, tšëngaftángnaca cmontsamna jenáshecjabebiyana.

¹⁵ Ntšamo quem sóyeca tcbonjanÿanÿecá, tšëngaftanga cachcá šmochtsama.

¹⁶ Ndegombre šcuayana, chë oservená chabe nduiñbiama ndoñe más uamaná ntsemnana. Cachcá, chë ichmoná chë tbojichmobïama ndoñe más uamaná quenátsmëna. ¹⁷ Quem soyënga chašmojuatsjinÿe

y chca chašmojamëse, tšëngaftanga puerte oyejuayënga vida šmochanjëftsebmna.

¹⁸ “Atše sëndëtatšëmbo chë tijábacacangiama, chíyeca atše nyetscangiama ndoñe chca quetsatoyebuambná. Y ntšamo Bëngbe Bëtsabe uabemana palabrenguiñe endayancá cachcá chaotsemnama, chë ‘canya átseftaca tandëse tonjasá, atšbe contra echántsemna ca’, cachcá echanjopása. ¹⁹ Mora, cabá ndoñe chca tonjopasá ora, lempe chë soyënga sentsichamo. As, chca chaojopasá ora, átšbeñe šmochantsošbuáchiye, y as šmochántsetatšëmbo atše tsmëna chë nda sëndmëná. ²⁰ Ndegombre šcuayana: Nda atše tijichmóbioye tbojofja, cha atše šochanjofja; y nda atše šojofja, cha chë nda šojichmóbioye bochanjofja ca” —Jesús tojánayana.

Jesús tojánayana uayayëngbe cucuatšine Judas bochjáboshjonama

(Mt 26.20-25; Mc 14.17-21; Lc 22.21-23)

²¹ Chë soyënga tojánayanentšana, Jesús corente cochtsetšenaná yojtsemna, y tojánayana: — Ndegombre šcuayana, canya tšëngaftanguentšá uayayëngbe cucuatšine šochanjáboshjona ca.

²² Chora, chabe uatsjëndayënga tmojanontšë enonjinyñayana, y ndoñe montsetátšëmbo ndabiama Jesús chca tojánayanama. ²³ Canye uatsjëndayá, chë Jesús puerte ibnabobonshaná, Jesusbe juachaca inatbemana. ²⁴ As, Simón Pedro chábioye tbojánëfjatsëmbo, ndabiama Jesús chca tojánayanama Jesúsbioye chabotjama. ²⁵ Chë puerte bonshana uatsjëndayá, Jesúsbioye batšatema más

tojanosjoná y tbojantjá: –Bëngbe Utabná, ¿nda cha yojtsemna ca?

²⁶ Chora Jesús tbojanjuá: –Atše canye base tandëtema chanjafchécuacuaye y ndábioye chajoyé, cha entsemna ca.

As Jesús canye base tandëtema tojanfchecuacuá, y Judas, Simón Iscariotbe uaquiñábioye, tbojanoyé. ²⁷ Tandëse tojanóyëngacñe y cach ora, Satanás Júdasbe ainaniñe bacna juabnënga tbojáncochëngo. As Jesús tbojaniana: “Chë cochanjama soye, cam ora moma ca.”

²⁸ Pero ni canya chë jasama imojtsetbia-manënguentsá tbojanësertá, ndayama Júdasbioye chca tbojanianama. ²⁹ Judas inamna chëngbe crocénana shecnësiñe uambayá; chíyeca ínÿenga tmojanjuabó Jesús chca ibojtsatsaye, ana ndayá yojtseita soye chë fiestama chauabuámiyama, o ndbomnjëmënga ndayánaca chauatšatama ca.

³⁰ Júdasna chë base tandëtema tojanóyëngacñe, y cachora chentšana tojëftsanbocna. Chora ya ibeta yojtsemna.

Chë tsëm mando

³¹ Judas tojëftsanbocnentšana, Jesús tojánayana: –Ora tocjobuache, Bëngbe Bëtsá Entšá tbojanbemá corente bëtsá y obená yomnama jinÿanÿiyama; y mua echanjinÿanÿiye Bëngbe Bëtsá corente bëtsá y obená yomnama. ³² Cha echanjinÿanÿiye Bëngbe Bëtsá chca yomnama, chíyeca Bëngbe Bëtsánaca echanjinÿanÿiye corente bëtsá y obená yomnama, y mora entsemna chë ndaye ora Bëngbe Bëtsá chca chabiana yochjinÿanÿiye. ³³ Atšbe básenga,

baseftatescama tšëngaftangaftaca sëntsemna. Chora šmochántenguaye, pero ntšamo judiënga sënjauyancá, mora cachcá tšëngaftanga cbëyana: Chë chanjá luaroye, tšëngaftanga ndoñe quešmátobena jama ca. ³⁴ Canye tsëm soye cbetsamëndá: Njetscanga šmochtsenbobonshana. Ntšamo atše tšëngaftanga cbondábabuanyeshana, cachcá tšëngaftanga šmochtsenbobonshana. ³⁵ Tšëngaftanga šmojtsenbobonshánëse, njetsca entsanga mochántsetatšëmbo, tšëngaftanga atšbe uatsjëndayënga šmomnana ca —Jesús tojanëyana.

Jesús tojánayana, chábioye ndoñe bonjanabuátma ca Pedro yochjánayanama

(Mt 26.31-35; Mc 14.27-31; Lc 22.31-34)

³⁶ Chora Simón Pedro tbonjantjá: —Bëngbe Utabná, ¿ndëmoye cochjá ca?

As Jesús tbojanjuá: —Atše sëntsá luaroye, mora aca ndoñe quecátobena atše juastana, pero más chcoye aíñe šcochanjuasto ca.

³⁷ As Pedro tbojanayana: —Atšbe Utabná, ¿ndáyeca ndoñe sëntsobena mora aca juastama? ¡Atše sëntseprontana acbiana jóbanama ca!

³⁸ Chora Jesús tbojanayana: —¿Ndegombre cojtseprontana atšbiana jóbanama? Ndegombre cbëyana, cabá ngallo ndëcánta ora, aca unga soye atšbiana cochanjayana: “Cha ndoñe quetsatabu-atma ca”.

14

Jesús beyeca entsanga jobenayana Bëngbe Bëtsábioye jama

1 Měntsánaca Jesús tojánayana: —Ndoñe ainana tsetšanēnga matsmēnana. Tšēngaftanga Bēngbe Bětsábeñe šmondošbuaché; átšbeñnaca šmochtsošbuáchiye. 2 Atšbe Taitá Bēngbe Bětsá endmēnoca, ba luarēnga joyéanama endmēna. Ndoñe chca tontsemnēse, atše chca matchbēnjáuyana. Morna, cha endmēnoye atše chanjá tšēngaftangbiana canye luare joyéanama jabuáprontama. 3 Atše chaijá y chē luare chacbojabuaprontá ora, cachiñe moye chanjésabo, tšēngaftanga átšeftaca junatsama. As, atše chaitsemnoye, tšēngaftángnaca chašmotsá joyéanama. 4 Atše chanjá choye ntšamo jama y jashjanguama ya šmontsetátšēmo ca —Jesús tojánayana.

5 Chora Tomás Jesúsbioye tbojaniana: — Bēngbe Utabná, ndēmoye cochjama ndoñe queftsátstatšēmo. As, ¿ntšamo bēnga fchtsetátšēmo ntšamo choye jama ca?

6 Chca tbojaniana ora, Jesús tbojanjuá: — Atše sēndmēna benachcá; chējana tcojtsase, pronto jashjanguana. Atše sēndmēna ntšamo ndegombre yomncá sempre oyebuambnayá, y entšanga chē nyetsca tescama yomna tšabe vida chamotsebomnama endamá. Nye átšbeyeca endopodena ndayējana jama, y atšbe Taitá Bēngbe Bětsábioca jashjanguama. 7 Tšēngaftanga atše šmojtsábuatmēse, atšbe Taitánaca šmattsábuatma. Morscana ya cha šmontsábuatma y cha šmontsonyá ca —tbojaniana.

8 Pero Felipe tbojaniana: —Atšbe Utabná, nye chē Taitá šmanyanyé, ndayama más ca.

9 Chora Jesús tbojaniyana: –Chëfta te tšëngaftangaftaca sëntsemna, y ¿cabá ndoñe atše šcontsábuatma, Felipe? Nda atše šojinye, chë Taitá Bëngbe Bëtsábioynaca jinÿana. As, ¿ntšamo atše scojtsatsá, chë Taitá šmanÿanÿé ca? ¹⁰ ¿Ndoñe condošbuaché, atšbe Taitá átšbeñe y átšnaca chábeñe nÿe canÿacá ftsmënama? Chë cbontsëtsëtsná soyënga, ndoñe nÿe atšbe juábnaca chca quetsatoyebuambná. Atšbe Taitá, chë átšbeñe vida endbomná jtsamana lempe ntšamo stsamcá. ¹¹ Muiñe šmochtsošbuáchiye: Atšbe Taitá átšbeñe endmëna, y átšnaca chábeñe mo nÿe canÿacá sëndmëna. Chama ndoñe šmontsošbuachese, as nÿe chë tijama soyëngámnaca átšbeñe šmochtsošbuáchiye. ¹² Ndegombre šcuayana, nda átšbeñe tojtsošbuaché, ntšamo atše tijamcá y cachcá cha echántsama. Atšbe Taitá entsemnoye atše chanjá, chíyeca, chë átšbeñe ošbuachiyá, chama más bëts soyënga echanjama. ¹³ Tšëngaftanga ndaye sóynaca Bëngbe Bëtsábioye šmojtjañe, y chca šmojama atše jótšëmbonëse, átšbeñe šmošbuachéyeca, lempe šmochanjóyëngacñe; chca, chë Uaquiñá echanjínÿanÿiye chë Taitá corente bëtsá y obená yomnama. ¹⁴ Tšëngaftanga ndaye sóynaca atše šmojtjañe, y chca šmojama atše jótšëmbonëse, átšbeñe šmošbuachéyeca, atše chë soye chanjama ca –Jesús tojánayana.

Jesús tojanašebuachená chë Uámana Espíritu jíchmuama

¹⁵ Mëntsánaca Jesús tojánayana: “Tšëngaftanga atše šmojtsebobonshánëse, ntšamo

cbontsamëndacá cachcá šmochanjama. ¹⁶ Chca chašmojamëse, atšbe Taitá Bëngbe Bëtsá tšëngaftangbiamá chanjaimpáda, tšëngaftanga jabújabuachama y jabáñemuayama inya cha chabuichmoma, chë Uajabuachaná nÿetsca tescama tšëngaftangaftaca chauétsemnama. ¹⁷ Cha, chë Uámana Espíritu endmëna chë nÿetsca soyënguiñe ntšamo ndegombre yomncá oyebuambnayá. Chë nÿe quem luarama enójuabnaye entšanga, chë átšbeñe ndošbuáchiyënga ndoñe quematonjá, ni quematábuatma. Chíyeca chënga ndoñe quemátobena cha jóyëngacñana. Pero tšëngaftanga aíñe cha šmontsábuatma. Cha tšëngaftangaftaca entsemna, y tšëngaftangbe ainaniñe sempre echanjëftsiyena.

¹⁸ “Atše ndoñe quebocháisabashejuana, mo uajchonga cuenta chašmotsemnama. Tšëngaftangbioye chanjésabo. ¹⁹ Muentšana baseftaytese, chë nÿe quem luarama enójuabnaye entšanga ndoñe más quešmochátonjaye; pero tšëngaftangna aíñe, atše cachiñe šmochántinÿe. Atše ainá chántsemna, chíyeca tšëngaftanga átšeftaca tšabe vida šmochántsebonna. ²⁰ Chë Uámana Espíritu tšëngaftangbe ainaniñe chašmojóyëngacñe ora, tšëngaftanga šmochántsetatsëmbo, atše atšbe Taitábeñe nÿe canyáca tsmënama; cachcá, tšëngaftanga šmochántsetatsëmbo, tšëngaftanga átšeftaca cachcá nÿe canyáca šmomnama y átšnaca tšëngaftangaftaca. ²¹ Nda totátšëmbo ntšamo atše tijamandacá y sempre chca

tojtsama, cha ndegombre šojtsebobonshana. Nda átšbioye šojtsebobonshana, chábioye atšbe Taitánaca bochántsebobonshana. Atšnaca cha chántsebobonshana, y nda atše tsmënama cha chanjinÿinÿiye ca” —Jesús tojánayana.

²² Chora, inÿe Judas, ndoñe Judas chë Iscariote, Jesúsbioye tbojaniyana: —Bëngbe Utabná, ¿ntšamo chca yojtsemna, nÿe bënga šcochjínÿanÿiye ntšamo cach aca comnama, y nÿetsca quem luarentšëngbioye ndoñe ca?

²³ Chora Jesús tbojanjuá: —Nda atše šojtsebobonshana, ntšamo atše sëntsoyebuambnacá echanjama. Atšbe Taitánaca chábioye bochántsebobonshana, y bëndata chábioye fchanjabo y chábeñe vida fchantsebmna. ²⁴ Nda ndoñe šontsebobonshana, ndoñe queochátama ntšamo sëntsoyebuambnacá. Ntšamo sëntsoyebuambnacá ndoñe nÿe atšbe juábnaca quenátsmëna, sinó chë Taitá, chë šonjichmó chabe juábnaca.

²⁵ “Atše cabá tšëngaftangaftaca sëntsemnëntscuana, lempe quem soyëngama sëntsoyebuambná. ²⁶ Chë Uajabuachaná, chë Uámana Espíritu, atšbe impadanánaca atšbe Taitá bochanjíchmua. Cha lempe cmochántsabuatambaye, y echanjama nÿetsca chë tcbonjáuyana soyëngama chašmuatenójuaboma.

²⁷ “Chë atšbe ainaniñe puerte tšabe ebionana tšëngaftangbiamá šcuétseboshjona, cbetsatšatá. Chë nÿe quem luarama enójuabnaye entšanga cmondbétsatšatnaye soyëngcá ndoñe quenátsmëna, chë atše cbontsatšatná ainaniñe puerte tšabe ebionana. Ainana tsetšanënga ndoñe matsmënana, ni matauatjëngana. ²⁸ Ya

šmonjouena ntšamo tcbonjauyancá: ‘chanjá y tšëngaftangbioye chanjésabo’. Tšëngaftanga atše šmojtsebobonshánëse, šmattsóyejuaye atše chë Taitábioye jama šojtsemnana, er chë Taitá atšbiana más bëtsá endmëna. ²⁹ Quem soyënga tcbonjáuyana, cabá ndoñe chca tonjopasá ora; as, chca chaojopasá ora, chiñe jenójuaboyëse átšbeñe chašmotsošbuáchema.

³⁰ “Chë quem luarentša bacna soyënga mandayá endabó; chíyeca atše ya ndoñe bëtsá tšëngaftangaftaca quichaisóyebuambaye. Pero cha tondaye quenátobena atše jabórlana. ³¹ Masque cha chca endmëna, chca entsemna, atše chë Taitábioye tsbobonshánama quem luarentša entšanga chamotsetatšëmbuama. Ntšamo atšbe Taitá šojamandacá, atše cachcá tsámama chamotsetatšëmbuama.

“Motsbananga. Muentšana cuajna ca” —Jesús tojanéyana.

15

Jesús yomna mo chë tšabe uvas betiy cá

¹ Mëntsánaca Jesús tojánayana: “Atše sëndmëna mo chë tšabe uvas betiy cá, y atšbe Taitá Bëngbe Bëtsá chë tšabe uvas betiye inyënacá.

² Chë inyëná, chë uvas betiyentša buacuafjënga ndëshajuanëfjënga jtsebuácuetëtsetšana; pero chë uvas betiyentša buacuafjënga shajuanëfjënga jtsobolímpiana, bëtsá chaotseshájuanama. Nda ndoñe tontsama ntšamo Bëngbe Bëtsá tojtsebošcá, jtsemnana mo chë ndëshajuana buacuafjëngcá; y chë causa, chë Taitá chábioye corente bochantsecastíga. ³ Tšëngaftanga šmonjouena

ntsamo tijayancá; bëtscá chca šmontsama. Chíyeca mora tšëngaftanga šmontsemna mo chë limpiana y shajuana buacuafjëngcá. ⁴ Atšeftaca cányiñe mo canyáca šmochtsemna y atše tšëngaftangaftácnaca. Chë buacuafja uvas betiyentšana juanánëfja ndoñe ntsoobenana nye cachabe ponto jashájonana. Cachcá, tšëngaftanga átšeftaca ndoñe cányiñe mo canyáca šmontsemnëse, ndoñe šmattsobena Bëngbe Bëtsabiana bëtscá soyënga jamama.

⁵ “Atše chë tšabe uvas betiyá sëndmëna y tšëngaftanga chë buacuafjëngcá. Nda átšeftaca cányiñe mo canyáca tojtsemna y atše cháftacnaca, cha Bëngbe Bëtsabiana bëtscá soyënga echanjama, mo canye buacuafja becá tojtseshajuancá. Er, tšëngaftanga atšbe uajabuáchenana ndoñe šmontsebomnëse, átšeftaca cányiñe mo canyáca ndoñe šmontsemna causa, tondaye šmattsobena jamama. ⁶ Canya átšeftaca cányiñe mo canyáca ndoñe tontsemnëse, cha jtsemnana mo canye buacuetëtšena buacuafja, utšenëfja y buashánëfjá. Chca buacuafjënga, entšanga jtsatbanana, íñeshoye jtsëtšenana y chentše jtsejuinýiyana. Cachcá, nda ndoñe átšeftaca cányiñe mo canyáca tontsemna, ndoservená jtsemnana y luaroca cha mochantsesegóra.

⁷ “Tšëngaftanga átšeftaca cányiñe mo canyáca šmojtsemna y ntšamo atše tijayancá šmojtsamëse, lempe ntšamo šmojtsebošcá šmochjotjañe, y lempe šmochanjóyëngacñe. ⁸ Chë shajuana buacuafjëngcá tšëngaftanga chašmojtsemna ora, šmochanjínyanýiye atšbe Taitá corente bëtscá y obená yomnama. Y chca, tšëngaftanga atšbe

ndegombre uatsjéndayënga šmochántsemna.
⁹ Ntšamo chë Taitá šondbobonshancá, átšnaca cachcá tšëngaftanga cbondábabuanÿeshana. Chíyeca, šmochtsiyena atšbe bonshánama jtsejuabnayëse.
¹⁰ Atše sëndama ntšamo atšbe Taitá šondëmandacá. Chíyeca atše sëndoyena chabe bonshánama jtsejuabnayëse. Cachcá tšëngaftángnaca, ntšamo atše cbontsamëndacá šmojtsamëse, atšbe bonshánama jtsejuabnayëse šmochantsiyena.

¹¹ “Atše chca cbontsëtsësná, chë atše sëntsebmna oyejuayana tšëngaftángnaca chašmotsebmnama, y tšëngaftanga puerte chašmotsóyejuama. ¹² Mëntšá cbetsamëndá: Ntšamo atše cbondababuanÿeshancá, cachcá šmochtsenbobonshana. ¹³ Chë chabe amiguëngbiama tojóbanabiama, ndocna quenátobena chabiama más bonshánana jtsebmna. ¹⁴ Ntšamo atše tijamandacá tšëngaftanga šmojtsamëse, atšbe amiguënga šmochántsemna. ¹⁵ Chë oservená ndoñe ntsetatšëmbuana ndayá chabe nduiño tojtsamama. Chíyeca atše tšëngaftanga oservénënga ca ndoñe quechatëtsësná. Morscana mëntšá cbontsëtsësná: ‘Tšëngaftangna atšbe amiguënga šmontsemna ca’, er lempe ntšamo atšbe Taitábentšana tijuatsjinÿcá, tšëngaftanga tcbonjinÿanÿé. ¹⁶ Tšëngaftanga ndoñe atše chešmatábuayana, pero atše aiñe tšëngaftanga tcbonjabacacá y tcbonjubuáyana, Bëngbe Bëtsabe trabajo jamama; y chca, mo canÿe betiye sempre tojtseshajuana y chë shajuana ndocna te tontsopochocacá, tšëngaftanga chašmotsemnama. Chca, lempe ntšamo

atšbe Taitá šmojtjañcá, y chca šmojama atše jótšëmbonëse, átšbeñe šmošbuachéyeca, cha lempe cmochanjátšataye. ¹⁷ Mëntšá atše cbetsamëndá: Smochtsenbobonshana ca” —Jesús tojanëyana.

Jesús y chabe entsanga, chë nÿe quem luarama enójuabnayëngbiama uaboyëñjanënga

¹⁸ Mëntšánaca Jesús tojánayana: “Pero chë nÿe quem luarama enójuabnaye entsanga tcmojtsëbuayënjëse, šmochjenójuaboye, natsana chënga atše šmonjanáboyëñjama. ¹⁹ Tšëngaftanga, chë nÿe quem luarama enójuabnaye entsanguentsana šmojtsemnëse, chënga cmattsababuánÿeshana cachëngbengbioycá. Pero tšëngaftanga ndoñe chë nÿe quem luarama enójuabnaye entsanguentsana quešmátsmëna, y atšna, chë quem luare oyenënguentsana tšëngaftanga tcbonjabacacá. Chíyeca chë nÿe quem luarama enójuabnaye entsanga tšëngaftanga cmontsëbuayënja. ²⁰ Smochjenójuaboye ntšamo tcbonjáuyanama: ‘Chë oservená chabe nduiñbiama ndoñe más uamaná quenátsmëna ca’. Chënga monjánama atše chaisufrima; tšëngaftángnaca chašmotsesufrínama mochántsama. Entšanga ntšamo atše tijayanentsana ntsachetšá tmojtsamcá, cachcá chënga mochántsama ntšamo tšëngaftanga chašmojtsëtsëtsná chentsana. ²¹ Chë chacmojtsëbuayëñjënga, chë šojichmó cha ndoñe quematábuatma. Chíyeca chënga lempe chca cmochanjáborlaye, atšbe causa.

²² “Atše ndoñe matijabo y chënga ndoñe matijáuyanëse, ndegombre ndoñe bacna soye mattsebonna. Pero mora, chëngbe bacna

soyëngama chënga ndoñe quemátobena jayanana, ‘¡Chca fsënjama ntsetatsëmbcá ca!’ ²³ Nda atše šojtsáboyënja, atšbe Taitábioynaca jtsáboyënjana. ²⁴ Atše chë bëts soyënga Bëngbe Bëtsabe obenánaca chëngbeñe ndoñe matijamëse, ndegombre chënga ndoñe bacna soyënga mattsebomna. Pero mora, masque ntšamo sënjamcá tmonjinÿese, chënga atše šmontsáboyënja y atšbe Taitábioynaca. ²⁵ Chca chënga montsama, ntšamo chëngbe leyënguiñe enduabemancá cachcá chaopasama. Chiñe mëntšá endayana: ‘Nÿe tondayama chënga šmonjanáboyënja ca.’

²⁶ “Atše, atšbe Taitábentšana chë Uajabuachaná y añemuayá tšëngaftangbioye chanjíchmuá. Cha chë Uámana Espíritu endmëna, chë nÿetsca soyënguiñe ntšamo ndegombre yomncá oyebuambnayá. Cha endmëna chë Taitábentšana ichmoná; y cha lempe atšbe tšabe soyënga cmochantsëtsëtsnaye. ²⁷ Chorscana, tšëngaftángnaca atšbiama entšanga šmochantsëtsëtsnaye, er tšëngaftanga átšeftaca šmondétsemna, entšanga jábuayenama atše sënjanbojatsé orscana ca” —Jesús tojánayana.

16

¹ Mëntšánaca Jesús tojánayana: “Atše quem soyënga cbontsëtsëtsná, tšëngaftanga átšbeñe ošbuáchiyana ndoñe chašmondájbanama, atšbe causa chašmojtsesufrina ora. ² Chëngna, chë judiëngbe enefjuana yebnënguentšana cmochantëbuacana. Chca tempo chaojobuache ora, chë tšëngaftanga chacmojtsëbáyënga mëntšá mochántsejuabnaye: ‘Bënga tšabá tmonjama ca. Ntšamo Bëngbe Bëtsá yojtsebošcá, cachcá

bënga tmonjama ca.’ ³ Chënga, chë Taitá Bëngbe Bëtsá ndoñe quematábuatma, y átšbioye cach ndoñe. Chíyeca, chca cmochanjáborlaye. ⁴ Atše chca tšëngaftanga cbontsëtsëtsná, ntšamo tcbonjáuyanama chašmuenójuaboma, chca tempo chaojobuache ora ca” —Jesús tojánayana.

Ndayá chë Uámana Espíritu inétsama

Mëntšánaca tojánayana: “Entšanga jábuayenama sënjanbojatšé orscana, chë echanjopása soyëngama ndoñe quecbënjatanëtsëtsná, er atše tšëngaftangaftaca sënjëtsemna. ⁵ Pero morna, chë šojichmó cha yomnoye chantá; y tšëngaftanguentšá ndocná šochanjatjaye, ‘¿ndëmoye cojtsá ca?’ ⁶ Mora, tšëngaftangbe ainana ngménaca entsemna, atše chca tcbonjáuyana causa. ⁷ Pero ndegombre šcuayana: Atše chanjá y chca tšëngaftangbe tšabíama echántsemna. Atše ndoñe quetsjase, chë Uajabuachaná y añemuayá ndoñe tšëngaftangbioye queochátabo. Pero aíñe chanjá, y chora cha tšëngaftangbioye chanjíchmua. ⁸ Cha chaojáshjango ora, echanjama quem luarentša entšanga corente chamotsetátšëmbo ndayá ndegombre yomna bacna soyënga jtsamana, ndayá ndegombre yomna chë Bëngbe Bëtsabe bominyíñe tšabia jtsemnana, y ndayá yomna chë Bëngbe Bëtsá entšangbíama jayanana tšabá o ndoñe tšabá tmonjamama. ⁹ Entšanga átšbeñe ndoñe quematošbuaché. Chíyeca chë Uajabuachaná echanjama chënga corente chamotsetátšëmbo ndayá ndegombre yomna chë bacna soyënga jtsamana. ¹⁰ Chë Taitábíoye chanjá y atše ndoñe más quešmochátinÿe. Chíyeca chë Uajabuachaná

echanjama chënga corente chamotsetátšëmbo ndayá ndegombre yomna Bëngbe Bëtsabe bominiñe tšabia jtsemnana. ¹¹ Quem luarentša bacna soyënga mándayabiamá Bëngbe Bëtsá ya tonjayana, ntšamo cha tojamama ndoñe tšabá yontsemna ca y nyetsca tescama castiganá chaotsemna ca. Chíyeca chë Uajabuachaná echanjama entšanga corente chamotsetátšëmbo, ndayá ndegombre yomna chë Bëngbe Bëtsá entšangbiamá jayanana tšabá o ndoñe tšabá tmonjamama.

¹² “Atše cabá ba soyënga sëntsebomna tšëngaftanga jáuyanama. Masque chcasna, mora tšëngaftanga ndoñe quešmátobena chë soyëngama josértana. ¹³ Pero chë Uámana Espíritu, chë nyetsca soyënguñe ntšamo ndegombre yomncá oyebuambnayá, chaojáshjango ora, lempe ntšamo ndegombre yomncá cmochanjabu-atambá. Cha ndoñe nye cachabe juábnaca queochátoyebuambnaye. Ntšamo chë Taitá chábioye tbojauyancá, tšëngaftanga cachcá cmochanjáuyana, y cha cmochanjábuayenaye ntšamo yochjopásama. ¹⁴ Atšbe soyënguentsana cha echanjójyëngacñe, y cach soyëngama cmochanjabu-atambá. Chcase cha cmochanjínñanñiye atše bëtsá y obená bétsemnana. ¹⁵ Lempe ntšamo chë Taitá endbomncá, atšbe soyëgnaca endmëna. Chíyeca atše tcbonjáuyana, chë Uámana Espíritu atšbe soyënguentsana yochjójyëngacñe y cach soyëngama cmochjabu-atambá ca.”

¹⁶ “Baseftayté y atše ndoñe más quešmochátinñe. Inye baseftayté y cachiñe šmochantétinñe ca” —

Jesús tojaněyana.

“Tšëngaftangbe ngménana, oyejuayana echanjóbema”

¹⁷ Chora Jesusbe básefta uatsjéndayënga imojtsentjanaye: —¿Ntšamo yojsentsšáyana, chë “baseftayté y atše ndoñe más quešmochátinje, y inje baseftayté y cachiñe atše šmochantétinje, er atše chë Taitábioye chanjá ca”? ¹⁸ ¿Ntšamo yojsentsšáyana, chë “baseftayté ca”? Ndoñe quemuátstatšëmbo ntšamo yojsentsšáyanama ca —chënga imojtsichamo.

¹⁹ Jesús yojtsetátšëmbo chënga chca jatjayama imojtsebošama, y tojaněyana: — Atše tcbonjáuyana: “Baseftayté y atše ya ndoñe más quešmochátinje, y inje baseftayté y cachiñe atše šmochantétinje ca.” ¿Chë soyëngama šmojsentjaná ntšamo stsentsšáyanama?

²⁰ Ndegombre šcuayana: Tšëngaftanga šmochanjenóbošachna y puerte ngménënga šmochántsemna, pero chë nje quem luarama enójuabnaye entšanga corente oyejuayënga mochántsemna. Masque tša ngménënga šmochántsemna, chentšana tšëngaftangbe ngménana, oyejuayana echanjóbema. ²¹ Canje shembása tbojontšabuache šešona jónynama ora, tša ngménaca cha jésemnana, puerte tbojtsetsetše causa. Chë šešona ya tojonyná ora, cha ndoñe ntsenójuabnayana chë tša ibuántsetšama. Canje šešona quem luaroye cháuashjanguama chë shembása tojámayeca, chora cha tšabá y oyejuayá jtsemnana. ²² Ndegombre, tšëngaftángnaca cachcá, chora tša ngménaca šmochántsemna.

Pero atše tšëngaftangbioye chaijésabo ora, atše šmochantétinÿe y corente oyejuayënga šmochántsmëna. Y ndocná queochatobenaye chë oyejuayana jabuajuánana.

²³ “Chë te chaojóshjango ora, tšëngaftanga ndocá atše quešmochatstjaye. Ndegombre šcuayana, lempe ntšamo atšbe Taitá šmojtjañcá, y chca šmojama atše jótšëmbonëse, átsbeñe šmošbuachéyeca, cha lempe cmochanjátšataye.

²⁴ Mëntscoñama, atšbe Taitá tondaye chešmatotjañe atše jótšëmbonëse. Cha motjañënga y šmochanjóyëngacñe, y chca, bëtscá oyejuayana šmochántsebomna ca” —Jesús tojanëyana.

Jesucristo, quem luarentse mandayábioye yëñjanayá

²⁵ Mëntšánaca Jesús tojánayana: “Chë soyëngama lempe cuentëngaca tšëngaftanga tcbonjáuyana; pero tempo echanjobuache, chora atše ya ndoñe más cuentëngaca quebochátëtsësnaye; chë cuentna, puerte botamana lempe atšbe Taitabiana cbochanjáuyana. ²⁶ Chë tena, atše jótšëmbonëse, átsbeñe šmošbuachéyeca, atšbe Taitábioye šmochanjotjañe. Y atše cbëyana; chca, chë te ndoñe quešochatájaboto tšëngaftangbiamia atšbe Taitá jatsimpadánana. ²⁷ Atše ndoñe quichatsimpadana, er cach Taitá tšëngaftanga cmondábabuanÿeshana.

Tšëngaftanga atše šmondbobonshánama, y Bëngbe Bëtsábocana atše tijabama šmojtsošbuáchema, chë Taitá cmondábabuanÿeshana. ²⁸ Atše chë Taitábocana sënjábocna y quem luaroye sënjabo. Pero mora

quem luare chanjëftsebošhona atšbe Taitábioye jtama ca” —Jesús tojánayana.

²⁹ Chora chabe uatsjëndayënga tmojanijana: — Mora ya ndoñe cuentëngaca quecatoyebuambná, chíyeca lempe paselo josértama bëngbiana entsemna. ³⁰ Mora fsëntsetatšëmbo aca nyetsca soyëngama cotatšëmbuama, y ndoñe quenátsiyta ndocná aca chacmátstjanama, er aca chëngbe juabnënga jtsabuatmana, chënga cabá aca ndëtjaye ora. Chíyeca bënga fsëntsošbuaché aca Bëngbe Bëtsábíocana tcojabama ca —chënga tmojanijana.

³¹ As Jesús tojanéyana: —¿Mora chiñe šmojtsošbuaché ca? ³² Ya tempo tocjobuache y cam ora entsemna, tšëngaftanga nyetsquénache šmochanjuáshana y atše nyë canya šmochanjésebošhona. Pero atše ndoñe nyë canya quichátsmëna, chë Taitá átšeftaca entsëmnayeca. ³³ Atše lempe quem soyënga cbontsëtsëtná, tšëngaftangbe ainaniñe tšabe ebionana chašmotsebomnama, átšeftaca cányiñe mo canyáca jtsemnëse. Quem luarentše šmochanjasufrina; pero añemo šmochtsebomna, atše ya chë quem luarentša mandayá sënjayëjnaná ca —Jesús tojánayana.

17

Jesús chabe uatsjëndayëngbiana Bëngbe Bëtsábíoye tbojanimpadá

¹ Jesús chë soyënga tojánayanentšana, celoye tojanontješé y Bëngbe Bëtsábíoye tbojanijana: “Taita, atšbe te ya tocjobuache. Minyanyé, atše acbe Uaquiñá, corente bëtsá y obená bëtsemnama.

As, atše acbe Uaquiñá, aca corente bĕtsá y obená comnama chainyanyĕma. ² Mora aca nĕyets obenana šconjatšetá nĕyetsca entšángbeñe, nĕyetscanga chĕ atšbiana tcojábacacanga chĕ nĕyetsca tescama yomna tšabe vida chamotsebomnama atše chaimama. ³ Chĕ nĕyetsca tescama yomna tšabe vida jtsebomnana endmĕna aca, chĕ nĕye canĕye y ndegombre Bĕngbe Bĕtsá jtsabuatmana, y atše Jesucristo, acbe ichmoná.

⁴ “Lempe ntšamo šconjamandacá atše sĕnjapochocá, y chca quem luariñe sĕnjama aca corente bĕtsá y obená comnama jinyanĕiyama. ⁵ Taita, quem luare cabá ndoñe quenjatsemĕna ora, aca tconjaninĕanyĕ atše corente bĕtsá y obená ácaftaca bĕtsemnama. Mora moma atše cachcá ácaftaca chaitsemnama.

⁶ “Aca quem luarentša entšanguentšana quem boyabásenga tconjabacacá y atšbiana šconjinĕinĕyĕ. Atše chĕnga sĕnjanĕanyĕ ntšamo ndegombre aca comnama. Chĕnga acbe entšanga mondmĕna; y acna, chĕ atšbiana chĕnga šconjinĕinĕiyá. Chĕnga acbe palabra tmonjouena y tšabá tmonjoyeuná. ⁷ Chíyeca chĕnga mondĕtatšĕmbo, lempe ntšamo atše tsbomncá ácbentšana tijóyĕngacñama. ⁸ Atše chĕnga sĕnjáuyana ntšamo aca šcojauyancá, y chĕnga montsošbuaché chĕ atše sĕnjauyaniñe. Chíyeca, chĕnga ndegombre mondĕtatšĕmbo atše acbiocana tijabama, y montsošbuaché aca chĕ atše šcojichmó cha comnama.

⁹ “Atše chĕngbiana cbontseimpadana. Chĕ nĕye quem luarama enójuabnaye entšangbiana ndoñe quecbátsimpadana, pero aíñe chĕ atšbiana

šcojinjinyiyengbiana, er chënga acbe entšanga mondmëna. ¹⁰ Lempe ntšamo atše tsbomncá, acbiámnaca endmëna; y cachcá, lempe ntšamo cobomncá, atšbiámnaca endmëna. Acbengbe vidëngaca aca tcojinjanýé atše corente bëtsá y obená bëtsemnama.

¹¹ “Atše ndoñe quem luarentše quešocháisetotona, pero chënga aíñe cabá camuentše mochanjéftsemna. Atše chantá ácaftaca jtsatsmënana. Uámana Taitá, chë atšbiana šconjinyinyënga acbe obenánaca cochtsanýena. Chca ntšamo bëndata mo canýacá bondmëna, chëngnaca cachcá chamotsemnama.

¹² Atše chëngaftaca sëntsemnëntscuana, chënga sëntsanýena, aca šconjatšetá obenánaca. Atše chënga sëndánýena, y ni canýa queochátsmëna infiernoca pochocaná, nýe chë infiernoca pochocaná jtsemnama ibomná chana aíñe, ntšamo acbe uabemana palabrënguiñe endayancá, cachcá chaotsemnama.

¹³ “Morna chë aca condmënoye chantá; pero atše cabá quem luariñe sëntsemnëntscuana chca chënga sëntsëtsëtsná, chca, chë atše sëntsebomna puerte bëtscá oyejuayana chëngnaca chamotsebomnama. ¹⁴ Atše chënga sënjáuyana ntšamo aca šconjauyancá. Ntšamo atše ndoñe quetsátsmëna chë nýe quem luarama enójuabnaye entšanguentsá, cachcá, chënga cach ndoñe quemátsmëna. Chíyeca, chë nýe quem luarama enójuabnaye entšanga chënga montsëbuayënja. ¹⁵ Atše ndoñe quecbátsimpadana, chënga quem luarentšana chacúbuacanama; pero aíñe, nýetsca bacna soyënguentšana

chacuatsebacama. ¹⁶ Ntšamo atše ndoñe quetsátsmëna chë nÿe quem luarama enójuabnaye entsanguentsá, cachcá, chënga cach ndoñe quemátsmëna. ¹⁷ Cochjama chënga acbe entsanga chamuétsemnama, y chca, nÿe acbiamama vida chamotsebmoma. Chca cochjama, ntšamo ndegombre yomncá chënga imoyenama. Ntšamo aca condbetsichamcá, ndegombre endmëna. ¹⁸ Ntšamo aca quem luaroye šconjanichmocá, cachcá átsnaca chënga séntsachamná, quem luare entsanga jábuayenama. ¹⁹ Chëngbiamama atše cachiñe mëntšá cbëyana: Atše nÿe acbiamama sëndmëna. Y chca, chëngnaca, ntšamo acbiamama ndegombre yomncá jtsóyebuambnayëse acbe entsanga chamotsemnama, y chca, nÿe acbiamama vida chamuétsebmoma, ntšamo ndegombre yomncá chënga imoyenama.

²⁰ “Pero nÿe chëngbiamama ndoñe quecbátsimpadana, sinó chë átsbeñe mochtsošbuáchiyëngbiamnaca, chë atšbiamama šconjínÿinÿiyënga, chëngbioyema atšbiamama ínÿenga chamojtsabuayiná ora; ²¹ as chënga nÿetscanga cánÿiñe mo canÿacá chamotsemnama. Ntšamo aca, Taita, átsëftaca cánÿiñe mo canÿacá bondmëna y átsnaca ácaftaca, cachcá chëngnaca cánÿiñe mo canÿacá bëndátaftaca chamotsemnama cbontseimpadana. Y chca, quem luarentša nÿetsca entsanga, atše šcojichmoma chamotsošbuáchemama. ²² Ntšamo chë obenana y uámanana šconjatšetacá, cachcá átsnaca chënga sënjatšatá. As, ntšamo bëndata cánÿiñe mo canÿacá bondmëna, chëngnaca cachcá cánÿiñe mo canÿacá chamotsemnama. ²³ Atše chëngbe ainaniñe

sěntsemna, y aca átšeftaca cányiñe mo canyáca bondmēna; as, chěgnaca nyetsca soyēnguiñe cányiñe mo canyáca chamotsemnama. Y chca, quem luarentša entšanga chamotsetátšēmo aca šcojichmoma, y chamotsetátšēmo ntšamo atše šcondbobonshancá, chěgnaca cachcá condábabuanyēshanama.

²⁴ “Taita, atšbiamā chēnga šconjínjinyiye. Atše mēntšá sěntseboše: chē atše chántsemnoca, chěgnaca chamotsemna, y chentše, chē šconjatšetá obenana y uámanana chēnga chámuinje. Quem luare cabá ndoñe quenjatsmēna orscana, šconjánbobonshana; chíyeca, cachora tconjaninjanjé atše corente bētsá y obená bétsemnama.

²⁵ Taita, nyetsca soyēnguiñe tšabá amá, masque chē nye quem luarama enójuabnaye entšanga ndoñe quecmatábuatma, atše aíñe cbonduábuatma, y quem boyabásenga montsetátšēmo, aca comna chē šcojichmó cha.

²⁶ Atše chēnga sēnjinjānjé ntšamo ndegombre aca comnama, y más chanjínjanjyie; chca, ntšamo šcondbobonshancá, chěgnaca cachcá chamotsenbobonshánama y atše chēngbe ainaniñe chaitsemnama ca” —Jesús tojánayana.

18

Uayayēnga Jesús tmojánishache

(Mt 26.47-56; Mc 14.43-50; Lc 22.47-53)

¹ Chē soyēnga Jesús tojěftsanayanentšana, chabe uatsjéndayēngaftaca tojěftsanbocna, chē binche bėjaye Cedrón ca uabániye chenguana jama. Chentše inamna canje tjashetema; y Jesús

chabe uatsjéndayëngaftaca choye tojánamengo. ² Y Judas, chë Jesús uayayëngbe cucuatšinë boshjuaná, tšabá chë luare yojanábuatma, er Jesús y chabe uatsjéndayënga ba soye chentše imojánenefjuana. ³ Chora Judas tojánashjango, y cháftaca ba soldadënga y básefta Bëngbe Bëtsabe bëts yebnocá josticiënga; chënga imojamna chë bachnangbe amëndayënga y fariseungbe ichmónënga; nÿetscanga uajuinÿanëshangaca, lamparëshangaca y espadëjangaca uajátënga.

⁴ Jesusna yojtsetátšëmbo lempe ntšamo cha yochjanpásama; chíyeca, natsanoye tojánbocna y chë entšanga tojanëyana: —¿Nda šmojtsenguá ca?

⁵ Y chënga tmojanjuá: —Jesús, chë Nazaretocá fsëntsenguá ca.

As Jesús tojanëjua: —Atše cha sëndmëna ca.

Y Judas, chë boshjuaná, chánaca chë entšángaftaca yojtsemna. ⁶ Jesús tojanëyana: “Atše cha sëndmëna ca”, y cachora chë entšanga tmojtanostëtšánanga y fshantsoye tmojánshajaye.

⁷ Chora Jesús cachiñe tojanatjá: —¿Nda šmojtsenguá ca?

Y chënga tmojanjuá: —Jesús, chë Nazaretocá ca.

⁸ As Jesús tojanëyana: —Ya tcbonjáuyana: “Atše cha sëndmëna ca.” Atše šmojtsenguasna, mënga cachcá šmochjónÿaye chamotsóñëngama ca.

⁹ Chca tojanopasá, ana ntšamo Jesús tojanayancá cachcá chaotsemnama, chë “Atšbe Taitá Bëngbe Bëtsá, chë šconjínÿinÿiye entšanguentšana ni canÿa pochocaná queochátsmëna ca”.

10 Simón Pedro canÿe espadëja inasëngbuájonÿana; asna, tojanenosëngbotëntšena y chë bachnangbe más uámana amëndayabe canÿe oservenábioye catšbioica matscuaše tbojtsanëštjango. Chë oservená Malco ca inauabaina. ¹¹ As Jesús, Pédrëbioye tbojaniyana: “Ache espadëja matosëngbuajonÿá. Ntšamo atšbe Taitá Bëngbe Bëtsá tojanmandacá, chë atše puerte ngménana jtsebomnama, ¿ndoñe chca chaondëtsemna ca?”

Jesús, Anasbe yebnoca

(Mt 26.57-58; Mc 14.53-54; Lc 22.54)

¹² Chentšana chë soldadënga, chëngbe amëndayá y Bëngbe Bëtsabe bëts yebnoca josticiënga Jesús tmojánishache y tmojanëcuébatsëca. ¹³ Natsanëna, Anás, Caifasbe uambén taitábioye Jesús tmojanánatse. Caifás chë uata inamna chë bachnangbe más uámana amëndayá. ¹⁴ Caifás yojamna nda judiënga tojanëyana: “Tšëngaftangbiamá más tšabá entsemna canÿe boyabása Israeloca entšangbiamá chaóbana ca.”

Pedro tojánayana Jesúsbioye ndoñe bon-janabuátma ca

(Mt 26.69-70; Mc 14.66-68; Lc 22.55-57)

¹⁵ Simón Pedro y inÿe uatsjendayá Anasbe yebnoye Jesús imojtsëstona. Chë inÿe uatsjendayábioyna, chë bachnangbe más uámana amëndayá ibnauábuatma; chíyeca, cha tojanobená Jesúseftaca chabe chashjóntscoñe jashjanguana. ¹⁶ Pero Pédrëna nÿe shjoca, amashjuanentše tojanoquedá. Chcasna, chë inÿe uatsjendayá tojánbocna y chë bësáša ebtafjuana shembásaftaca

tojanoyebuambá. Chora Pedro tbojanēmashengo.
 17 As chë shembása Pédrëbioye tbojanianyana:
 —¿Acnaca ndoñe chë boyabásabe uatsjendayá
 condmëna ca?

Y Pedro tbojanjuá: —Ndoñe; atše cha ndoñe
 quetsatabuatma ca.

18 Tša yojtšesësna causna, chë oservénenga y
 chë josticiënga shjoca tmojanniñé y chentše
 imojtósboniye. Y Pédrënaca chëngaftaca
 yojtšešbonena.

*Ntšamo chë bachnangbe más uámana pasado
 amëndayá, Jesúsbioye tbojantjá*

(Mt 26.59-66; Mc 14.55-64; Lc 22.66-71)

19 Chora, chë bachnangbe más uámana pasado
 amëndayá tojanontsé Jesús jatjayama chabe
 uatsjëndayëngbiana y ndayá cha entsanga
 yojánabuatambamnaca. 20 Y Jesús tbojanjuá: —
 Atše nÿetsca entsangbe delante sënjoyebuambá.
 Sempre chë entsangbe enefjuana yebnënguenache
 sëndabuatambá, y Bëngbe Bëtsabe bëts yebnócnaca,
 nÿetsca judiënga mondbétsenefjuanentše; y chca,
 iytëmencá tondaye chiyatoyebuambá. 21 ¿Ndáyeca
 chca šcojtsetjaná? Atšbe palabra tmojouenënga
 májtaye, as chënga chacmëyana ntšamo atše
 tijáuyanama. Chënga mondëtatšëmbo ntšamo atše
 tijayanca ca —Jesús tbojanjuá.

22 Jesús chë soyënga tojánayana ora, canÿe jos-
 ticio chentše yojtsemná, Jesúsbioye tbojanjueb-
 jantšetá y tbojanianyana: —¿Chca chë bachnangbe
 más uámana amëndayá cuanjojuá ca?

23 Y Jesús tbojanjuá: —Ndoñe tšabá tijayanësna,
 šmëyana ndayentše chë podesca palabra

yoytsemna; y tšabá tijóyebuambasna, ¿ndáyeca šcojajuebjantšetá ca?

²⁴ Chentšana, Anás tojanmandá, chë bachnangbe más uámana amëndayá Caifasbe yebnoye, Jesús batsëcná chamuánatsama.

Pedro cachiñe tojánayana Jesúsbioye ndoñe bonjanabuátma ca

(Mt 26.71-75; Mc 14.69-72; Lc 22.58-62)

²⁵ Chëntscuana, Pedro yoytsešbonena, tsanana chë ñe juachaca. Chora chë entšanga tmojantjá: — ¿Aca ndoñe chabe uatsjendayënguentsá condmëna ca?

Y Pedro ndoñe ca tojánayana: —Atse ndoñe quetsátmëna ca —cha tojánayana.

²⁶ Chora, chë bachnangbe más uámana amëndayabe canye oservená Pédrëbioye tbojanayana: —¿Atse ndoñe cháftaca chë tjashetémoa tcbonjinye ca?

Chë oservená inamna chë Pedro tbojtsanmatstëtšabe pamillo.

²⁷ Y Pédrëna cachiñe ndoñe ca tojánayana, y ca-chora canye ngallo yojacánta.

Jesús Pilatbe delante

(Mt 27.1-2, 11-14; Mc 15.1-5; Lc 23.1-5)

²⁸ Chentšana, Caifasbe yebnentšana Jesús tmojanánatse chë romano mandadbe yebnoye. Ya yoytsebínýana, y chë bëts yebnoye chë judiënga ndoñe tmonjánamashjna, er chënga imoytseboše chë Bashco saná jasama. Judiënga ndoñe imonjobena Bashco saná jasana, chca tempo canye ndoñe judiëbe yebnoye nda tojámashënguse.

²⁹ Chíyeca Pilato tojánbocna y chënga tojanëyana:

—¿Ndayá quem boyabásabe contra šmochjayana ca?

³⁰ Chora chë entšanga tmojanjuá: —Bacá uamaná ndoñe tontsemnëse, ndoñe matifjuánatse ca.

³¹ As Pilato tojanéyana: —Tšëngaftanga matánatse, y ntšamo cach tšëngaftangbe leyiñe iuayancá muabiyama šmochjayana tšabá o ndoñe tšabá tonjamama ca.

Y chë judiënga tmojanjuá: —Bënga derecho queftsátsbomna ndocná jóbama ca.

³² Chca tojanopasá, ana ntšamo Jesús cachá jóbana tojanayancá cachcá chaotsemnama.

³³ As Pilato cach yebnoye tojtanamáshëngo, Jesús tbojanchembo y tbojantjá: —¿Aca chë judiëngbe Rey cojtsemna ca?

³⁴ Y Jesús tbojanjuá: —¿Ntšamo šconjatjacá, cach aca chca cojtsejuabnýeca chca yojtsemna o ínÿenga atšbiama tcmojacuentáyeca ca?

³⁵ Chora Pilato tbojaniyana: —¿Mo atše judío quetsmëna? Cach ábioca entšanga y chë bachnangbe amëndayënga muentše tcmönjúshjango. ¿Ndayá tcojama cá?

³⁶ Chora Jesús tbojanjuá: —Atšbe jamándama luare ndoñe quem luarentše quenátsmëna. Aíñe tojtsemnësna, atšbe ústonënga muantsatsejaye atše chë judiëngbe cucuatšiñe ndoñe chašmondoboshjonama. Pero atšbe jamándama luare ndoñe quem luarentše quenátsmëna ca —Jesús tbojanjuá.

³⁷ As Pilato tbojaniyana: —¿As aca rey cojtsemna ca?

Y Jesús tbojanjuá: —Tšabá tcjayana; atše rey sëndmëna. Chama atše tijonÿná y quem luaroye

tijabo; y atše sēnjabo ndegombre soyēngama jabóyebuambayama. Y chca soyēnga jtsamēse tmoyenēnga, atše jtseyeunanana ca.

³⁸ Chora Pilato tbojanianyana: —¿Y ndayase chē ndegombre soye yomna ca?

*Jesusbiana tmojánayana chaóbana ca
(Mt 27.15-31; Mc 15.6-20; Lc 23.13-25)*

Chca tbojantjá chentšana, Pilato cachiñe tojánbocna judiēngaftaca jóyebuambayama, y tojanēyana: —Atše ni mo canye soye chiyátinyēna, quem boyabása castiganá chaotsemna ca jayanama. ³⁹ Pero tsēngaftanga šmondétatsēmbo, Bashco fiestama atše canye utamená cachcá jētsboshjonama. ¿Šmojtseboše chē judiēngbe Rey chjētsboshjona ca?

⁴⁰ Chorna nýetsca entsanga cachiñe tmojanáyebuachena: —¡Ndoñe, cha ndoñe! ¡Barrabás matsboshjona ca!

Barrabasna canye bacá uamana entšá inamna.

19

¹ Chora Pilato, Jesús tbojanánatse y tojanmandá chamotsetjanjama. ² Y canye coronēsha uchmašēfjangaca chē soldadēnga tmojanapormá y Jesús tmojanabestšajó; y canye shbuenda uafjat-senga entšayá mo reycá tmojanichētjo. ³ Chorna chēnga imojtsóbobecocnaye y jtsafchayama imojtsatsētsnaye: “¡Bayté judiēngbe Rey cochtsemna ca!” Y imojtsejuebantšetaye.

⁴ Pilato cachiñe tojánbocna y entsanga tojanēyana: —Šmochjouena; cha chanjuábocna, chē boyabása castiganá chaotsemna ca jayanama

atše ni mo canye soye ndoñe sēnjínŷenama chašmotsetatsēm̄buama ca.

⁵ As Jesús tojánbocna chē uchmašēfjangaca coronēsha uabestšajoná y chē shbuenda uafjatsenga entšayá mo reycá uichētjoná. Y Pilato tojanēyana: —¡Muentše chē boyabása entsemna ca!

⁶ Chē bachnangbe amēndayēnga y chēngbe josticiēnga cha tmojáninŷe ora, tmojanontšé uayebuáchana: —¡Motsecrucificá! ¡Motsecrucificá ca!

Chora Pilato tojanēyana: —Cach tšēngaftanga mánatse y šmochjacrucifíca; atše ni mo canye soye chiyátinŷena quem boyabása castiganá chaotsemna ca jayanama ca.

⁷ Chora chē judiēnga tmojanjuá: —Bēngna canye ley fséndbomna, ntšamo chiñe endayancana, quem boyabása jóbanama bontsemna, Bēngbe Bētsabe Uaquiñá entsenobiamná causa ca.

⁸ Pilato chca tojanuena ora, más yojtsauatja. ⁹ Cachiñe chabe yebnoye tojtanamáshēngo y Jesús tbojantjá: —¿Ndēmocá aca cmēna ca?

Pero Jesús ndocá tbonjanjuá. ¹⁰ Chora Pilato tbojaniana: —¿Ndoñe šcochanjojuá ca? ¿Ndoñe condétatsēm̄bo, aca jacrucifícama o jētsboshjonama atše tsobenama ca?

¹¹ As Jesús tbojanjuá: —Acbe obenana Bēngbe Bētsá ndoñe macmēnjánatsetase, tondaye cattsobena átšeftaca jamama; chíyeca, acbe cucuatšīñe šonjaboshjoná, acbiama más bēts bacna soye tonjama ca.

¹² Cach orscana Pilato yojtsenguaye ntšamo jama, jobenayama Jesús jētsboshjonama; pero chē

judiënga imotsáyebuache: —¡Chacojëtsboshjonësna, Césarbe amigo ndoñe condmëna! ¡Nda rey tojtsenobiamná chana, Césarbe uayayá jtsemnana ca!

¹³ Pilato chë soyënga tojanuena ora, chashjoye Jesús tbojanábocna. Pilato tojanótbema chabe puestentše tribunaloca. Chë tribunaloca chashjaña hebreo biyañe Gabata ca inauabaina, y endayana “ndëtsbéngaca pormániñe ca”. ¹⁴ Bashco fiestama canye te yojtsájamna, y mo nyetsto ora yojtsemna. Chora Pilato chë judiënga tojanéyana: —¡Muentše tsëngaftangbe rey entsemna ca!

¹⁵ Pero chënga tmojanáyebuachena: —¡Chaóbanal! ¡Chaóbanal! ¡Motsecrucificá ca!

As Pilato tojanatjá: —¿Tsëngaftangbe rey atše chjacrucificá ca?

Y chë bachnangbe amëndayënga tmojanjuá: —Bëngbe rey nye César endmëna, ndocná más ca.

¹⁶ Chentsana Pilato, chëngbe cucuatšiñe Jesús tbojánboshjona chamocrucificama y chë judiënga cha tmojanánatse.

Jesús tmojanrucificá

(Mt 27.32-44; Mc 15.21-32; Lc 23.26-43)

¹⁷ Jesús tojánbocna chabe cruz tantšajónana y tmojanánatse canye luaroye, “Obanabe Bestsashe ca” uabáinoye (hebreo biyañe Gólgota ca inauabaina). ¹⁸ Chentše cha tmojanrucificá y inye útatnaca cátatoica tmojanrucificá; Jesusna tsëntsaca. ¹⁹ Pilato tojanmandá canye uabemana soye chë cruciñe chamuanjuama. Chiñe yojetsábemana: JESÚS NAZARETOCÁ, JUDIËNGBE REY ca. ²⁰ Y ba judiënga chë uabemana soye tmojanalía, er chë Jesús tmojanrucificá

luare Jerusalenó béconana inamna, hebreo, latín y griego biyañe yojetsábemana. ²¹ Chca juabemama tojanmandáyeca, chë bachnangbe amëndayënga Pilato tmojanianyana: —Ndoñe matabiamnana “Judiëngbe Rey” sinó ntšamo cachá tojayancá, “Judiëngbe Rey atše sëndmëna ca”.

²² Pero Pilato tojanējua: —Ntšamo tijuábema cachá chaotsábemana ca.

²³ Chë soldadënga Jesús tmojancrucificá chentšana, chabe entšayangá tmojanájaca y cántañe tmojanajatá, nÿetsca canta soldadëngbiana. Chabe cmešējua tmojanaca; chējua yojanamna nduajonanējua, nÿetsējua uabianánējua. ²⁴ As chë soldadënga tmojáneniyana: “Ndoñe matjuátanëca; más tšabana tsbanánoye mochjútšena, ndabiana yochjuáquedama chaotsotatšëmbuama ca.”

Chca tojanopasá ana ntšamo Bëngbe Bëtsabe uabemana palabrenguiñe endayancá cachá chaotsemnama, chë “Atšbe entšayangá tmojatenájataye; atšbe cmešėjuaamna tsbanánoye tmonjanétšena, ndabiana jauquédama jtsotatšëmbuama ca.” Y lempe chca chë soldadënga tmojanma.

²⁵ Jesusbe cruz juachaca imojtsemna chabe mamá; chë mamabe quenata María, Cleofasbe shema; y María Magdalena. ²⁶ Jesús chabe mamábioye tbojáninÿe, y chabe juachacna chë Jesusbe bonshana uatsjendayá yojtsemna. Chora chabe mamá tbojanianyana: “Mama, chentše acbe uaquiñá entsemna ca.”

²⁷ Y chë bonshana uatsjendayá tbojanianyana: “Chentše acbe mamá entsemna ca.”

Cach orscana, chë uatsjendayá chabe yebnentše Jesusbe mamábioye tbojanofja.

Jesús tojanóbana

(Mt 27.45-56; Mc 15.33-41; Lc 23.44-49)

²⁸ Jesús yojtsetátšëmbo ya lempe tojanchnënguama, chíyeca chentšana y ntšamo Bëngbe Bëtsabe uabemana palabrenguifne endayancá cachcá chaotsemnama, tojánayana: “Sontsajuendá ca.”

²⁹ Chentše inamna canye matbaja buajútjena untja vínoyeca. As, chë soldadënga canye esponjëshe chë vínoyeca tmojanfchecuacuá, canye hisopo niñëfjiñe tmojananguësëtjo y játsbanase, Jesusbe uayášoye tmojanbeconá. ³⁰ Chë untja vínoye Jesús tojanofšé ora, tojánayana: “Ya lempe tocjochnëngo ca.”

Tojanotsejbé y tojanóbana.

Canye soldado chabe lanzësaca costillaca Jesúsbioye tbojanashacuá

³¹ Bashco fiestama canye te yojtsájamna, y chë judiënga ndoñe imontseboše chë crucificánënga cachentše chë ochnayté chamotsemnama, chë te puerte uámana te bétsemnayeca. As Pilato tmojanimpadá chë crucificánënga shecuatšënga jetsatcacayama y chë cuerpënga chentšana jtsejuánama chaomandama. ³² As chë soldadënga tmojána y shecuatšënga imojtsatcacaye, natsana canya y chentšana chë inya, Jesúseftaca yojtsecrucificaná. ³³ Pero Jesúsbioye tmojanobeconá ora, ya obaná tmojáninye; chíyeca chabe shecuatšënga ndoñe tmonjanatcacá. ³⁴ Masque chca, canye

soldado Jesúsbioye costillaca canye lanzëshaca tbojanashacuá. Y cachora buiñe y búyeshe chentšana tonjanóbocna. ³⁵ Chë mëntsá cuentayá chentše enjamna y tonjáninýe, y ndegombre entsichamo; cha endétatsëmbo ndegombre yojtsichámuama, chca, tšëngaftágnaca chiñe chašmotsošbuáchema. ³⁶ Chë soyënga chca tojanopasá, ntšamo Bëngbe Bëtsabe uabemana palabrënguiñe endayancá cachcá chaotsemnama. Chiñe endayana: “Ni mo canye betaše cha quemochatsëntšátca ca.” ³⁷ Y ínÿoca, Bëngbe Bëtsabe uabemana palabrënguiñe endayana: “Chë tmojenachentsá bominýe mochanjabuájua ca.”

Jesús tmojanatbontsá

(Mt 27.57-61; Mc 15.42-47; Lc 23.50-56)

³⁸ Chë soyënga tojanopasá chentšana, José Arimateocá, Pilátbioye tbojanimpadá Jesusbe cuerpo jesocñama chabolesenciama. José inamna Jesusbe canye ustoná, masque nýe iytëcana, chë judiëngbiama auatja causa. Pilato aíñe tbojanlesenciá; as José tojána y Jesusbe cuerpo yojtsámbañe. ³⁹ Nicodemo, chë ibeta Jesúsbioye tbojanbuachá, chánaca tojánashjango y tojanëyamba unga bnëtsana kilo mirra y áloe enájua bnana. ⁴⁰ As José y Nicodemo Jesusbe cuerpo tbojanca y tmojanandmaná chë botamana uanguëtše soyëngaca unétjona entsëjuangaca. Judiënga chca inmnanuamana, obaná juatbontsama ora. ⁴¹ Jesús tmojanancrucificá luarentše canye base jajañe inamna, y chiñe canye tsëm cuevëshe, entsangbe pormánëshe, obanëngbiama; chëshiñe cabá ndocna obaná mondëjajo. ⁴² Asna, nýe chentše Jesusbe

cuerpo tmojansegorá, chë Bashco fiestama canÿe te yojtsájamna causa, y chë cuevëshe chë béconana inámnayeca.

20

Jesús tojtanayena

(Mt 28.1-10; Mc 16.1-8; Lc 24.1-12)

¹ Chë inÿe semana bojatšenté, cabá cachëse, cabá ndëbinÿna ora, María Magdalena chë cuevëshoye tojána y tojáninÿe inÿoca yojtsemna chë cuevëshoye amashjuanentša ndëtšbé.

² Asna, tojëftsánótjajo y tojána chë Simón Pedro y chë inÿe uatsjendayá, ndábioye Jesús tša ibnabobonshana ibojtsemnoye. Chora tojanéyana: “Bëngbe Utabnabe cuerpo chë cuevëshentsana tmojtsámabañe y ndayentše tmotsejájoma ndoñe queftsátstatšëmbo ca.”

³ Chora Pedro y chë inÿe uatsjendayá chentšana tbojëftsanbocna y chë cuevëshoye tbojánata.

⁴ Nÿets útata ibojtsëchamana, pero chë inÿe uatsjendayá Pédrëbiamama más betesco tojanótjajo y natsana chë cuevëshoye tojánashjango.

⁵ Tojanotsejbé y chë chentše tmojanacjá entšëjuangá tojáninÿe, pero choye ndoñe tonjánamashëngo.

⁶ Chentšana, Simón Pedro chabe ústonoye tojánashjango y chë cuevëshoye tojánamashëngo, y tojáninÿe chë chentše tmojanacjá entšëjuangá.

⁷ Y chë Jesús juabestšëntsacjuama tojanaservé entšëjuana ndoñe chë inÿájuangaca yontsamna, sinó inÿoca botamana uandmanánëjua.

⁸ Chora chë inÿe uatsjendayá, chë cuevëshoye natsana

tojanashjanguá, choye tojánamashengo. Tojáninÿe y Jesús tojtanayenama yojtsanošbuaché. ⁹ Chéntscoñe chë útata cabá ndoñe yontsósertana ntšamo Bëngbe Bëtsabe uabemana palabrënguifne endayancá, chë Jesús obanënguentshana jtayenama ibojamnama. ¹⁰ Chentshana chë uatsjëndayata chatbe oyenoye tbojtaná.

*Jesús, María Magdalénbioye tbojánebëbocna
(Mc 16.9-11)*

¹¹ Pero María chentše tojanoquedá, chë cuevëshe juachaca šachénaca; yojtsošachentscuana tojanotsejbé cuevëshoye jarrepárama. ¹² Y tojáninÿe uta angelotémata uafjantséjua uichëtjonata, Jesusbe cuerpo yojëftsejajóntše ibojtsetbemana. Canÿa tsëntsénëshoica y chë ínÿana matsëscioica. ¹³ Chora chata tmojanianyana: —Shembása, ¿ndayama cošaché ca?

As cha tojanjuá: —Atšbe Utabná tmojtsámabañe, y ndayentše tmojtsejájoma ndoñe quetsátstatšëmbo ca.

¹⁴ Chca tojánayana ora, tojanostëtsantjesé y tojáninÿe chentše Jesús yojtsemna, pero María ndoñe yontsetátšëmbo cha Jesús bëtsemnama. ¹⁵ Chora Jesús tbojanianyana: —Shembása ¿ndayama cošaché? ¿Nda congua ca?

María yojtsejuabnaye chë boyabásana yojtsemna chentša base jajañe uaishanÿa ca; chíyeca tbojantjá: —Bacó, aca tcojuambësna, šmëyana ndayentše cojtsejajó, as atše cha jesocñama ca.

¹⁶ As Jesús tbojanianyana: —¡María ca!

Chora María chábioye tojanontjesé y tbojaniyana: —¡Rabuni ca! (hebreo biyañe chca endayana “Buatëmbayá ca”.)

¹⁷ Chora Jesús tbojaniyana: —Ndoñe šcatábojajo, er atše cabá ndoñe atšbe Taitábioye quetstétstsju. Pero motsa atšbe catsátangbioye y cochjáuyana, atše stsetsjuá atše y tšëngaftangbe Bëtsábioye, atše y tšëngaftangbe Taitábioye ca.

¹⁸ As María Magdalena tojána y Jesusbe uatsjëndayënga tojanéyana cha chë Utabnábioye tbojáninÿe ca y cha chë palabrenga tojánayana ca.

*Jesús chabe uatsjëndayënga tojánëbëbuacna
(Mt 28.16-20; Mc 16.14-18; Lc 24.36-49)*

¹⁹ Tojanibétata ora, cach semana bojatsenté, chë uatsjëndayënga tmojánenefjna canÿe luarentše, pero lempe tmojtanatame, chë judiëngbiamama autja causa. Chora Jesús tojánamashëngo, chëngbe tsëntsaca tojantsá y mëntsá tojanacheuá: “Chë atšbe ainaniñe tsabe ebionana tšëngaftangaftaca chaotsema ca.”

²⁰ Y chca tojanéyana ora, chabe cucuatšënga y costillaca tojaninÿanÿé. Chora chë uatsjëndayënga oyejuayënga imojtsemna, chëngbe Utabná tmojáninÿama. ²¹ As Jesús cachiñe tojanéyana: “Chë atšbe ainaniñe tsabe ebionana tšëngaftangaftaca chaotsemna. Ntšamo atšbe Taitá Bëngbe Bëtsá šojichmocá, átšnaca cachcá tšëngaftanga cbontšachamná ca.”

²² Chca tojánayana ora, chëngbioye tojangouo y tojanéyana: “Chë Uámana Espiritu šmochjójyëngacñe. ²³ Ndëmuanÿënga chëngbe bacna soyëngama chašmojáperdonanga, perdonánënga

mochántsatsmëna; y ndoñe chašmonjáperdonasna, ndëperdonánënga mochántsemna ca.”

Tomás, Bëngbe Utabnábioye ainá tbojáninÿe

²⁴ Pero Tomás, chë Gemelo ca uabobainá, canÿa chë bnëtsana uta uatsjendayënguentsá, chë uatsjëndayëngaftaca ndoñe yontsemna, Jesús tojánashjango ora.

²⁵ Chíyeca, “bënga chë Utabná fsëjinÿe ca”, chë inÿe uatsjëndayënga tmojanियana ora, Tomás tojanéjua: “Atše chabe cucuatšiñe chë uajabonjana uinÿniñe ndoñe sënjinÿe, y chiñe atšbe ntšabuafja ndoñe sënjajué y atšbe cucuatše chabe costillaca ndoñe, ndoñe quichátošbuachiye ca.”

²⁶ Canÿe semana tojanochnëngo ora, chë uatsjëndayënga cachiñe canÿe luarentše tmojánenefjna. Y Tomásnaca chëngaftaca yojtsemna. Masque chentše atámeniñe yojtsemna, Jesús tojánamashëngo, chëngbe tsëntsaca tojantsá y tojanéyana: —Atšbe ainaniñe tšabe ebionana tšëngaftangaftaca chaotsemna ca.

²⁷ Chora Tomásbioye tbojanियana: —Acbe ntšabuafja muentše mojué y atšbe cucuatše minÿe; acbe cucuatše miyëbo y atšbe costillaca mojué. Y ndošbuachiyá ndoñe matsmënana, sinó atše tijtayenama cochtsošbuáchiye ca.

²⁸ As Tomás tbojanियana: —¡Atšbe Utabná y atšbe Bëtsá ca!

²⁹ Chora Jesús tbojanियana: —Tomás, nÿe šconjínÿeyeca cojtsošbuaché. ¡Bëngbe Bëtsá chaoma puerte oyejuayënga chamotsemna chë nÿe ntjinÿcá tmojošbuachenga ca!

Ndayama quem librëša tmojanábema

³⁰ Jesús, chabe uatsjéndayëngbe delante inÿe bëts soyënga Bëngbe Bëtsabe obenánaca tonjëftsema, pero quem librésañe ndoñe quenatábemana. ³¹ Y quem librésañe soyëngna, entsábemana tšëngaftanga chašmotsošbuáchema, Jesús, chë Cristo y Bëngbe Bëtsabe Uaquiñá bétsemnama; y chc case, chábeñe chašmojtsošbuachese, chábeyeca chë nÿetsca tescama yomna tšabe vida chašmotsebonnama.

21

Jesús, canÿsëfta chabe uatsjéndayënga tojánëbëbuacna

¹ Chca tojanopasá chentšana, Jesús inÿe soye chabe uatsjéndayënga tojánëbëbuacna, Tiberias mar béjaye tsachañe. Chora mëntšá tojanopasá: ² Cánÿentše imojétsemna Simón Pedro; Tomás, chë Gemelo ca uabobainá; Natanael, chë Galilea luarocá, Caná pueblócá; Zebedeobe uaquiñata y Jesusbe inÿe uta uatsjéndayata. ³ Simón Pedro chënga tojanéyana: —Sëntsá beonga jashebuáyama ca.

As chënga tmojanjuá: —Bëngnaca ácaftaca fchanjá ca.

As tmojána y canÿe barquëshoye tmojánamashjna; pero chë ibeta tondaye tmonjáninÿena. ⁴ Ya yojtsebínÿana orna, Jesús chë tsachoca yojtsemna, pero chë uatsjéndayënga ndoñe imontsetátšëmbo cha Jesús yojamnama.

⁵ Chora Jesús tojanatjá: —Básenga, ¿tondaye šmonjashbuá ca?

Y chënga tmojanjuá: —Tondaye ca.

6 As Jesús tojanëyana: –Barquësha catsbioica chë atarraiësha mëtsena y beonga šmochanjáshebuaye ca.

As chënga chca tmojanma, y chora chësha jtabocnama ndoñe imontsobena, nyetsá beonga tmojánishëche causa. 7 As chë Jesusbe bonshana uatsjendayá, Pédrëbioye tbojanianyana: “¡Bëngbe Utabná entsemna ca!”

Simón Pedro chca soye tojanuena y cachora entsayá tojtaníchëtjo, er nduichëtjoná yojtsemna, y chë béjayoye tojanoshbuetše. 8 Chë inye uatsjëndayëngna chë barquëshañe tmojána, y chë atarraiësha jútjena beóngaca imojtsásjaye, er chë tsachocama bécoñe imojtsemna, nye canye patse metroca. 9 Fshantsoye tmojánastjajna ora, chënga tmojáninyena canye chebániñe pormániñe, y chentsna canye beona y tandëšnaca yojtsesegorana. 10 Chora Jesús tojanëyana: “Chë šmonjáshebuaye beonguentšana báseftanga miyëbo ca.”

11 Simón Pedro chë barquëshoye tojánamashëngo, y chë atarraiësha jútjena bëts beóngaca, uasjoónana tsachóntscoñe tojanëyamba. Mo canye patse y shachna bnëtsana y unga beóngaca; pero masque nyetsá beonga, chë atarraiësha ndoñe ntjuatanëcanana. 12 Chora Jesús tojanëyana: “Mabënga, šmochjase ca.”

Chë uatsjëndayënguentšana ni canya yontsenñémua cha jatjayama nda cha yojamnama, er nyetscanga imojtsetátšëmbo cha chë Utabná bëtsemnama. 13 Chora Jesús tojanobeconá, chë tandëše tojanca y chënga tojanatšatá, y chë beónacnaca cachcá tojanma.

14 Chóracna, Jesús ya unga soyama chabe uat-sjéndayënga yojtsanebëbuacana, obanënguentšana tojtanayenentšana.

Jesús, Simón Pédroftaca tojanoyebuambá

15 Jasama tmojanpochocá ora, Jesús, Simón Pédrëbioye tbojantjá: —Simón, Juanbe uaquiñá, ¿quemëngbiana más quešcbobonshana ca?

Y Pedro tbojanjuá: —Atšbe Utabná, aíñe. Aca condétatšëmbo atše aíñe cbondbobonshánama ca.

As Jesús tbojaniyana: —Atšbe entšanga, mo oveshatemëngcá imomnënga, cochtsanÿena ca.

16 Chora cachiñe tbojantjá: —Simón, Juanbe uaquiñá, ¿quešcbobonshana ca?

Y Pedro tbojanjuá: —Atšbe Utabná, aíñe. Aca condétatšëmbo atše aíñe cbondbobonshánama ca.

As Jesús tbojaniyana: —Atšbe entšanga, mo oveshëngcá imomnënga, cochtsanÿena ca.

17 Y unga soyama tbojtétantjá: —Simón, Juanbe uaquiñá, ¿quešcbobonshana ca?

Pedro puerte tbojanongmé, ya unga soyama “quešcbobonshana ca” tbonjantjá causa; y tbojanjuá: —Atšbe Utabná, aca lempe condétatšëmbo. Aca condétatšëmbo atše aíñe cbondbobonshánama ca.

As Jesús tbojaniyana: —Atšbe entšanga, mo oveshëngcá imomnënga, cochtsanÿena.

18 Ndegombre cbëyana: Más bobontse conjamna ora, conjanamana cach aca jtichëtjuana y ndëmoye jama cojtseboše choye jtsoñana; pero tanguá chacojtsemna orna, buacuatšënga cochanjatsbaná, y inÿa cmochantichëtjo y ndëmoye jama ndoñe chacontseboše choye cmochanjuánatse ca —Jesús tbojaniyana.

19 Chca tojánayana, ana jtsotatsëmbuama ntšamo Pedro jóbanama ibojamnama, y chë chca jóbanëse, Bëngbe Bëtsá corente bëtsá y obená bëtsemnama Pedro yochjáninÿanÿiyama. Y chca tojánayanentšana, Pédrëbioye tbojaniyana: —Smasto ca.

Jesusbe bonshana uatsjendayá

20 Pedro tojesanenostëtšantješé y tojáninÿe, Jesusbe bonshana uatsjendayá ústonoye yojtsaye. Cha enjamna chë monjansá ora, Jesús cabá ndóbana ora, chë Jesúsbioye más tonjanosjoná y tbonjantjá: “Bëngbe Utabná, ¿nda chë boshjuaná yochtsemna ca?” 21 Pedro chábioye tbojáninÿe ora, Jesúsbioye tbojantjá: —Atšbe Utabná, y cháftaca, ¿ntšamo yochjopása ca?

22 Chora Jesús tbojanjuá: —Atše quem luaroye jesabámëntscuana cha ainá chauesomñama atše stsebošëse, ¿aca ndayá chama cmatjátsëntšamna? Acna nÿe šmasto ca.

23 Chíyeca, chentšana, Jesucristbeñe ošbuáchiyëngbenache nÿetscanga imojánichamo, chë uatsjendayá ndoñe yochanjanóbana ca. Pero Jesusna ndoñe chca tonjánayana, sinó “atše quem luaroye jesabámëntscuana cha ainá chauesomñama atše stsebošëse, ¿aca ndayá chama cmatjátsëntšamna? ca”.

24 Mua endmëna chë uatsjendayá; cha entsichamo quem soyënga ndegombre yojamnama, y camuá quem librëšañe lempe tonjuábema. Y bënga mondëtatšëmbo cha ndegombre soye endóyebuambnama.

25 Jesús inÿe ba soyënga tonjëftsema; tša bëtsá soyënga endmëna, nderado lempe cada canÿe

soye tcojuábema y librëshangá tcojuapormá, atše
sëntsejuabná, nÿetsca chëshangá quem luarentše
ndoñe nanjuába.

Bëngbe Bëtsa Cabëngaftaca Entsoyebuambna New Testament in Camsá

copyright © 2009 Wycliffe Bible Translators, Inc.

Language: Camsá

Translation by: Wycliffe Bible Translators, Inc.

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Camsá

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-05-05

PDF generated using Haiola and XeLaTeX on 21 Feb 2024 from source files
dated 29 Jan 2022
19104c0e-9046-5ff3-82fb-eb838c88dcf9